




TUSI FAITAU ASO

2025

IULAI - TESEMA

**Ekalesia Faapotopotoga Kerisiano
i Amerika Samoa**

Aso Lua – Iulai 1: “Ola manuia ia Keriso–e le o se mea na e mafafauina”

Tusi – Mataio 7:1-7 *(Abundant life in Christ–not what you might expect!)*

Matua – f. 1: “Aua tou te fa’amasino atu, ina ne’i fa’amasinoina outou.”

O a foliga o le tagata o lo o soifua ma ola i le tele o ana tamao-aiga? E le tusa o ia ma upu nei a Iesu. Muamua, ia outou agalelei atu, ae ‘aua lava le fa’amasino atu. E le o le upu faifai, ae ia tatou va’ava’ai i o tatou lava fa’aletonu ma mea leaga uma lava o lo o fa’atoilaloina ai i tatou. Ia avea i tatou ma tagata ua matutua i le talalelei. Fetalai Iesu, “Aua tou te fa’amasino atu, ina ne’i fa’amasinoina outou.” Lua, o ai tatou te fa’asoa atu i ai le poto ma le tamao-aiga? O tagata ua ola manuia ia Keriso. Latou te le fia tuuina atu foi o latou tino e pulea e tagata valea ma le le alolofa i isi tagata.

I lenei vaitau o fa’asalalauga i luga o upegatafailagi, e taumafai lava le tagata lava ia e tele ni ana fa’atulima (*likes*), ma tele ni ona viiga. Ma ua i’u ai ina ua latou faia ni aga mataga i luga o upega tafailagi e faalumaina ai aiga. Ae peita’i, ua valaauiina e Iesu i tatou e fai ma auauna e tatou te fa’asoa atu Keriso ma le loto maulalo i e ua leiloloe, tusa lava pe teena i tatou. Ma le vaega mulimuli, o le tagata ua ola manuia ia Keriso, na te maua le loto maulalo. Ia pei i tatou o fanau iti, latou te faatoga atu i o latou matua i mea uma latou te manana’o i ai, ona faia lea mo i latou. O lea, o le agalelei, o le poto mai le Atua, ma le loto maulalo, ma le mafutaga vavalalata ma le mafana ma lo tatou Alii o Iesu Keriso, o foliga na o le tagata ua ola manuia ia Keriso.

Tatalo: Le Atua lo matou Tama, ‘aua lava ne’i ia te i matou ona fa’amasino atu, a ia matou fialia e faia lou finagalo, **Amene!**

Aso Lulu – Iulai 2: “Savavali ma tagata, o le agalelei tele o le Atua”

Tusi – Levitiko 26:9-12 *(Walking with humanity, God’s abundant goodness)*

Matua – f. 12: “Ou te fealuai foi i totonu ia te outou, e fai foi a’u mo outou Atua, e fai foi outou mo’u nuu.”

O nei fuaiupu o lo o fa’amatalaina ai le Feagaiga a le Atua ma Isaraelu, i lona agalelei ia i latou. Ua mafai ai ona latou uluola, pe afai latou te usiusita’i ma tausia ana poloaiga. O lona finagalo o lana mafutaga vavalalata lea ma ona tagata. Na folafolain mai i le tusi lenei i le fuaiupu e 11-12 le manuia e sili atu nai lo le manuia fa’aletino, o le sootaga vavalalata lea ma le Atua. O le finagalo lea o le Atua, ia toe faatasi ma ona tagata. Na ia faatinoina ia Iesu Keriso, i lona liu tino tagata. Na ia faia ai se fa’aleleiga e ala i le satauro.

E i ai taimi e fa’afuase’i ai ona lagona e le tagata le pa’i mai o le Agaga o le Atua. O se fialia e le mafai ona fa’amatalaina. O nisi e maligi ai o latou loimata. O nei lagona e le mafai ona galo. E fa’apupulaina ai o latou mata. A vaai atu i le matagofie o le foafoaga, latou te viia ai le Atua. E iai lava le aso e matua lagonaina ai e le tagata le pa’i mai o le Agaga o le Atua, ma tumau ia te ia lea lagona. E tupu ai le alofa ia Iesu Keriso. Ma lagona ai le matagofie o le pa’i mai o le Agaga o le Atua. O le fa’amanuiaga moni lea tatou te fia lagonaina.

Tatalo: Mafuta mai pea ia i matou e ala i lou Agaga Paia, **Amene!**

Aso Tofi– Iulai 3: “Fa’amanuiaina e avea ma fa’amanuiaga: lagolago tele”

Tusi Faitau – 2 Korinito 9: 1-15 *(Blessed to be a blessing: abundant support)*

Matua – ff. 6-7: “A o la’u lenei e fai tau, o le ua itiiti ana saito e lulu, e itiiti foi ana e selesele mai; a o le ua tele ana e lulu, e tele foi ana e selesele mai. Ia

taitoatasi ma foai e pei ona filifili i lona loto; aua ma le tiga, aua foi ma le faatauanaui; auā e alofa le Atua i le ua foai ma le loto malie.”

I aso anamua i Roma, e le masani tagata i le foaiina o meaalofo tupe. A o feagai le Ekalesia i Ierusalem ma sauaga ma le mativa, na amata ai e Paulo se saoga tupe e fai meaalofo ai mo isi ekalesia. Ae peita'i, sa lei taliaina e le ekalesia i Koronito. Na apoapoa'i Paulo ina ia fai le ekalesia i Maketonia ma fa'ata'ita'iga, e ui ina matitiva, ae lima foa'i, ma ia savavali i latou i upu latou te folafola atu, aua o i latou o tagata ua uma ona fa'akerisianoina. Ae taula'i ana a'oa'oga i le agaga fa'afetai ma agalelei atu. O lo o fa'amanuiaina pea e le Atua i latou o lo o fai ma fa'amanuiaga i isi tagata (Ken12:2). E iai fo'i le manatu fa'aletagata a foai atu ona toe totogi mai lea e le Atua i se fa'asiliga. Na suia e Paulo lenei manatu ina ua ia a'oa'o atu, ia fa'amuumua le agaga fa'afetai ma le agalelei atu. O se fa'amanuiaga sili le fai ma fa'amanuiaga mo isi tagata. Pe ititi se tupe tatou te foai atu, po o le fa'aavanoaina fo'i o tatou taimi mo isi, o se mea fiafia lea i le Atua.

Tatalo: Le Alii e, ia fai pea i matou ma fa'amanuiaga i isi tagata, Amene!

Aso Faraile – Iulai 4: “Talisapaia le manumalo a'ia'i o Keriso”

Tusi Faitau – 1 Korinito 15:51-57 (*Embracing Christ's abundant victory*)

Matua – ff. 54e-55: “*Ua fa'aumatia le oti i le manumalo. Le oti e, o fea o i ai lou manumalo? Le oti e, o fea o i ai lou tui?*”

E mata'ina upu a le Aposetolo, ona e sili atu le fefefe o tagata i le oti nai lo se isi lava mea i lenei lalolagi. Ua ia te ia se fa'aaliga. Ua faaali atu le Atua ia te ia i le mea lilo ma le matagofie. O le a ta'u mai e le leo o le pu-ole-manumalo se mea ofoofogia i le toe tu mai o Keriso. O le a toe fa'atutina e ua oti, ma o le a liua tagata o le Atua i le tino e lē pala ma e lē oti lava. Ua manumalo a'ia'i Keriso, ua ia fa'ato'ilalolina le oti. O le a la se vaaiga pe a tatou malamalama i lenei mea? Tatou te le toe fefefe i le oti. Auā ua fa'asa'olotoina i tatou mai le agasala. E tulaga ese le feiloaiga a Paulo ma Iesu i le ala i Tamaseko. O i latou na o malaga ua tutū ua le mafeganava'i, ua lagona lava e i latou le siufofoga, ae le iloa atu se tasi. O le mea lea e manaomia ai le Agaga Paia e fa'amatalaloto le feau matagofie o lo o tatou fa'alogi i ai. O le fa'atuatua o le ola mautinoa lea i le manumalo ai'a'i o Iesu Keriso i le oti. E mafai ai ona liua ma avatu o tatou loto ia te ia. Ia manatua, e fiafia le Atua i lana fanau o e faatuatua ia te ia.

Tatalo: Fa'afetai tele, le Ali'i e, Iesu, i lou manumalo, i le sa'olotoga ma le fa'amoemoe ua matou maua, Amene!

Aso Toona'i – Iulai 5: “Anoanoa'i ma le lava – tuputupu a'e ia Keriso”

Tusi Faitau – Filipi 4: 10-13 (*Abundance and lack – growing up into Christ*)

Matua – f. 13: “*Ou te mafaia mea uma lava ona o ia ua faamalosi mai ia te au.*”

A o tatou manatunatu i fa'amanuiaga a le Atua, ua fa'amanino mai e Paulo lana tali atu i taimi e utiuti ai lana fa'asoa. Na lafo atu e Filipi se meaalofo tau tupe e fesoasoani ia te ia. Ma ua lagonaina ai e Paulo lona agaga fa'afetai tele. Ua talia ma le fiafia e Paulo mea uma ua ia maua, tusa lava pe tele pe le lava. O le upu moni, o lona malosi e mai i le Atua. E le masalosalo lava ia, aua ua mautinoa e Paulo le alofa o le Atua, ua maua ai pea lona malosi faaleagaga. O se lu'itau lea mo le to'atele. E fa'aosoosoina pea i tatou i mafaufauga, ua tau

fesiligia ai le Atua pe aisea ua le fa'amanuia mai ai ia i tatou, pe a o'o mai tiga ma faigata o le ola mativa ma le le tagolima. A o'o mai fa'aosoosoga, ia tumau i le Alii, 'aia le masalosalo. E le o tu'ulafoaina e le Atua ona tagata fa'atuatua.

Tatalo: Le Atua e, fa'amalosi mai pea lou Agaga ia i matou i taimi matou te vaivai ai, Amene!

ANOANOA'I MA MANAOGA (ABUNDANCE AND WANT)

2. Oge (Scarcity)

Aso Sā – Iulai 6: “O le mauoa ma le tagata mativa”

Tusi Faitau – Faataoto 22:1-16 *(The rich and the poor)*

Matua – f. 9: *“O lē ua mataaloa e faamanuiaina o ia; auā e fofai atu e ia ana mea e ‘ai i le ua mativa.”*

O le a lau vaai ia te oe lava: o oe o se tagata mauoa po o se tagata mativa? O le a se vaai a isi tagata ia te oe ona o lou tamaoaiga? O le tagata lava ia ma lona fa'auigaina o le mativa ma le tamaoaiga. E le mafai e tupe ona fa'atauina le fiafia. Auā afai e le lava le fa'asoa, atonu o le a avea ma ala e tupu ai le popolevale ma le atoatoa ai le fiafia o le mafaufau. Ma, o le a mafai ona afaina ai fo'i le soifua maloloina. O le lē lava o le fa'asoa, o se tasi lea o manatu autu i a'oa'oga fa'atamaoaiga i nei ona po. Ua fa'amanatu mai e le tusi faitau, e oo mai fa'amanuiaga pe a tatou fa'asoa atu mo i latou o lo o mana'omia (f.9).

O le aseta aupito i sili ona taua mo i tatou, “Ia sili atu le mana'o ia ta'uleleia i le mana'o i le oloa e tele; ma le agalelei, ia sili le mana'o i lea, i lo ario ma le auro (f.1).” O le lotomualalo e maua ai le tamaoaiga, mamalu, ma le ola. Aua, “O le tau'i o le fa'amaulalo ma le mata'u i le Alii, o le oloa lea, ma le viiga, ma le ola (f.4).” Aua nei viia i tatou e tagata, a ia maua se viiga o le Atua i lo tatou ola. E le tauaigofie le tatou mafutaga vavalalata ma le Alii, ae ua lava le alofa tunoa o lo tatou Atua, tatou te mauoa ai. Po o le a lava le faigata o le le tagolima, ae o lou mana'o ina ia e ta'uleleia, agalelei atu, ma fa'amaulalo, o le oloa moni lea, e maua ai le viiga o le Atua, ma le ola.

Tatalo: Le Atua e, ia e faia se loto fofa'i mo a'u, e mafai ai ona ou fa'asoa atu i e matitiva, Amene!

Aso Gafua – Iulai 7: “Foa'i mo e matitiva” *(Providing for the poor)*

Tusi Faitau – Esoto 23: 10-13

Matua – f. 12: *“E ono aso e te fai ai au galuega, a o le aso fitu e te malolo ai, ina ia malolo ai lau povi ma lau asini, ia mapu foi le tama a lau auauna fafine, ma le tagata ese.”*

O Tulafono o le Feagaiga (Esoto 20:22-23:19) e foliga o se tuufaatasiga o tulafono eseese. O nei tulafono uma o lo o fetalai mai ai le Atua ia Mose, i le vaitau o lo o fa'afogaina ai e tagata Isaraelu le siufogoga o le Atua (20:22) ma lona fa'amamafa e tasi lava le Atua (20:23), ma le fa'amamafa i le tapuaiga e maua ai manuia (20:24). O le fuaiupu 13 o se lapataiga mulimuli lea ina ia tausia lelei tulafono uma ma 'aia nei fa'aleaogaina e se isi atua po o se tupua tulafono a le Atua. I le fuaiupu e 10-12, o lo o faaataata mai ai ni mamalu se lua o le numera 6 ma le numera 1. “E ono tausaga e te lulu ai saito i lou fanua, ma fa'aputu mea e tutupu ai; a o le tausaga e tasi e soso'o atu ai, e te tuu ia ma

ia tuu ai pea lava, ina ia aai ai o e matitiva i lou nu'u; o mea fo'i e totoe ia te i latou e aai ai o manu o le vao; ia fa'apea fo'i ona e fai i lou tovine ma lou to'olive." O lo o tusia i le Tusi Paia ia tatou alolofa ma tausi atu i e matitiva, o tagata ese, o tagata o lo o faigaluega ia i tatou, se'ia o'o lava i manu o le lafu, ma manu o le vao. O le alolofa ma le agalelei i tagata matitiva o le ogatotonu lena o galuega fai a so'o se tagata kerisiano. O le fa'atinoina lea o le Fa'ataoto 22:9, e pei ona tusia, "O le ua mataalofa e fa'amanuiaina o ia; aua e foa'i atu e ia ana mea e 'ai i le ua mativa." E mulimuli mai fa'amanuiaga i e lima foa'i.

Tatalo: Iesu Keriso e lo matou Ali'i Fa'aola, ia fa'atauaina pea e i matou le malologa o le Aso Sapati, Amene!

Aso Lua – Iulai 8: “O e matitiva ma le fa’amasinoga tonu”

Tusi Faitau – Levitiko 23: 15-22 *(The poor and justice)*

Matua – f. 22: *“A o outou selesele foi le seleselegasaito i o outou fanua, aua le faauma ou pito fanua pe a e selesele i ai; aua foi e te ao ni fua ua pauu i lau seleselega, a ia tuu mo e matitiva ma le tagata ese; o a'u o le Alii lo outou Atua.”*

O lo o fa'amatalaina e le Tausamiga o le Seleselega le Tausamiga o Vaiaso i le Esoto 23:16, ma o le ulua'i seleselega saito lea i le Esoto e 34:22. O lo o tusia lenei tala i le Aso Sa o lo o fa'amanatuina ai e le ekalesia le Tausamiga o le Seleselega. E ese le fa'atinoga o le Tausamiga o le Seleselega i Peretania, i le senituri e 21, ma le fa'atinoga e Isaraelu anamua, i le seneturi muamua. Ma e tumau pea fa'avae: I le Tausamiga o Vaiaso ua fa'aigoaina o le Aso Penetekoso, tatou te talia ai le afio mai o le Agaga Paia. E le o se aso e foa'i atu ai tupe po o mea taumafa. Auā e le mafai e a tatou meaalofa fa'aletino ona sulaina le Alofa silisili ese o le Atua, e ala mai i lona Agaga Paia. E pei ona fesili mai le pese: “I le ogatotonu o le tau malulu, e leai lava se mea e ola ai,” O le a ea se mea ou te avatu ia te ia, aua o a'u o se tagata mativa? O le tali lena o le fesili i le avatu lea o lou loto atoa. Pei ona ta'utino mai e Isaako Uati, “O le alofa e sili lona ofoofogia, e sili lona paia, e mana'omia lo'u agaga, ma lo'u ola, ma a'u mea uma.” I le tusi faitau o lenei aso, ua filifili le Atua e faailoa atu lona finagalo e ala i le tatou fa'asoa atu mo tagata matitiva ma le tagata ese, “O a'u o le Alii lo outou Atua (f.22).” E lagona e le Atua o tatou tiga.

Tatalo: Le Atua e lo matou Tama alofa e, foa'i mai pea le avanoa matou te fa'asoa atu ai au meaalofa i e manaomia lau fesoasoani, Amene!

Aso Lulu – Iulai 9: “E fa’afofoga le Ali’i i ē matitiva”

Tusi Faitau – Salamo 34: 1-7 *(The Lord hears the poor)*

Matua – f. 3: *“Ia outou faaneene atu i le Alii faatasi ma a'u; ma ia tatou vivii faatasi i lona suafa.”*

O lo o ta'utino mai e lenei Salamo, o le a fa'atasi le tagata mativa (f.6) ma le tagata puapuagatia (f.2), ma tagata o le Atua i le olioli. E iai le feso'otaiga o puapuaga o Tavita ma lenei salamo. Sa nofo fa'aunu'u o ia ona o lona fefe ia Saulo. Sa fa'ataga valea i luma o Kisa le tupu o Kata, le tasi o aai o Filisitia, le nu'u o Koliata. O se tulaga le lelei lea ua o'o ia Tavita, o ia o se tagata o le a fai ma tupu, ae o lo o lamatia lona soifua e Saulo ma ona fili.

O lo o fa'amanatu mai e le fai Salamo le taua o le tagata o lo o naunau lona loto i le Atua, e pei o Tavita. O lona fa'atuatua na fa'asaogalemuina ai lona ola.

Na tuua e ia ana uo, ma lona aiga, ma lona tulaga maua luga. O lona malosi na aumai i le Atua, i lona fa'atuatua ma le naunau atu o lona loto ia te ia. Na sisi'i ai ona lima i le Atua i lana viiga, i le taimi o lamatia lona soifua e ona fili. O le fa'amalosi fo'i lea a le fai Salamo mo i tatou. Ia sisi'i a'e o tatou lima i le Atua i lona viiga i le taimi e o'o mai ai puapuaga ma faigata.

Tatalo: Iesu e, ia tumau pea i lau afio le viiga ma le fa'aneetaga, Amene!

Aso Tofi – Iulai 10: “E le fa’agae’etia e le tamaoiga”

Tusi Faitau – Ruta 3: 1-15 *(Not impressed by riches)*

Matua – f. 11e: *“... O mea uma ua e fai mai ai ou te faia lava mo oe; auā ua iloa e le aai uma o lo’u nuu, o le fafine amio lelei lava oe.”*

O Poasa ma Ruta, o tua'a moni ia o Iesu e pei ona tusia e Mataio 1:5. O mātua foi i laua o mātua o le Tupu o Tavita. O se fa'aeaea lea i le tina o Ruta, ona o ia o le fafine o nuuese. Na fa'ailoa atu e Poasa ia Ruta, o ia o se fafine amio lelei lava ia (f.11). Ona o Ruta o se fafine o nu'uese, na ia susu'e ai le ufiuae o Poasa ma taoto ai, ina ia iloa o ia e Poasa. Ona fa'amanuia atu lea o Poasa ia Ruta ona ua ia le su'e atu sana tane i taulele'a, po o se mau'oa, ae ua manatu atu ia te ia, ua na o se toeaina.

E leai se malosi o le tagata na te pulea ai mala fa'alenuma, e pei o le oge, taua ma fevesiaiga, ma le gasegase, aemaise lava pe a afaina i sauaga, po o le manatu fa'apito, ma le le malamalama i le isi tagata. O Ruta o le fafine ua malulu lana tane, o le nu'u ese foi. Sa le mautonu. Ae ua alofa Poasa ia te ia ina ua fa'apea atu, “Fa'aafu mai ia lou pito ofu i lau auauna fafine.” O le talosaga a Ruta ina ia ufiufi mai ia te ia e malu ai o ia (f.9). O se ata matagofie lea mo i tatou. Ia tatou alalaga atu ia Iesu ina ia ufitia i tatou i lana fa'amagaloga, ina ia fa'amamaluina i tatou uma i lona Suafa.

Tatalo: Le Alii e, ufiufi mai ia i matou i le mana o lou toto paia, Amene!

Aso Faraile – Iuali 11: “Mea lelei mo e fia aai”

Tusi Faitau – Luka 1: 46-55 *(Good things for the hungry)*

Matua – ff. 49, 53: *“Auā o Lē e ona le mana ua faia e ia mea silisili mo a'u, e paia foi lona suafa ... Ua fagaina e ia i mea lelei e sa fia aai, a o e mau mea ua aufuaina atu e ia.”*

O le tusi faitau o lenei aso ua fa'aigoaina o le “Pese Vivi'i a Maria.” O lo o tuufaatasia ai le ofoofogia ma le mata'utia o le Atua i le maulalo o lona loto, ua ia manatu mai ai i le tagata na ia faia. Ua ta'u fa'alua atu ai e le agelu ia Maria, “Ua alofagia o ia e le Atua.” O ai lava le tagata ua ia manatu mai ai? E le o ni ana 'oa po o sona tulaga maua luga na filifili ai e le Atua e fanau mai ia te ia lona Alo. Na amata Maria i le viiga ma le valaau tapuai e pei o Tavita i le Salamo 34. O se mea lelei tele lea, aemaise lava mo aso tatou te lē fia vivii ma tapuai ai i le Atua. Faamanatu mai e Maria le fa'amaoni o le Atua i le tala fa'asolopito o Isaraelu. Ma ua talitonu Maria, e fa'aauau pea le fa'amaoni o le Atua i ona tagata seia o'o i le fa'avavau. E onomea ia i tatou le toe fa'afo'i i le Atua o le viiga, tusa lava pe le lagona e le tagata lona fia vivi'i atu. O le feau pito sili fo'i lea ona taua i le pese a Maria. O e matitiva ma fia aai, e maoona i latou i le malo o le Atua. O i latou o e fa'amaualuluga, e fa'ataapeapeina. A o i latou o e matitiva ma loto maulalo e toe fa'atutuina i latou.

Tatalo: Iesu Keriso e lo matou Alii Fa'aola, fafagaina pea i matou i lau upu ma ia ola pea Keriso i totonu o matou loto, Amene!

Aso Toona'i – Iulai 12: “O se vaifofō i le oge” (*An antidote to scarcity*)

Tusi Faitau – Kenese 47: 13-25

Matua – f. 13: *“Sa leai fo'i sina mea e 'ai i le nu'u atoa, auā ua matuā velavela le oge, ua lailoa fo'i le nu'u o Aikupito ma le nu'u o Kanana ona o le oge.”*

E tama lelei Iosefa i tala o le Tusi Paia. E le'i pa'u i le fa'asoosoga a le ava a Potifara. Sa fiafia le ta'ita'i o le falepuipui fa'apea Farao ia Iosefa. Sa tuuina atu e Farao le malo o Aikupito i lalo o lana va'avaaiga i le vaitau o le oge. Na fa'amanuiaina foi Iosefa e le Atua. Sa fa'amuumua e Iosefa le fa'asoina mai o ola o tagata Aikupito i le vaitau o le oge ina ua le lava mea taumafa, ma ua leai ni tupe. E foliga mai e sauua Iosefa i le fa'apologaina o tagata e galulue i le fa'aputuina o le saito. Ae na lavea'ia ai ola o le to'atele o tagata ina ua sau le oge. Na ao fo'i e ia lafoga ua tatau mo le vaitaimi ma toe tufatufa atu fatu saito e toe atinae ai a latou fa'atoaga. Sa faia e Iosefa se galuega lelei mo tagata uma e o'o lava i tagata o isi atunu'u. E le'i manatu fa'apito Iosefa i lona tama ma ona uso, ae na mafaufau Iosefa i le manuia mo le lautele o tagata. E le o le tali ea o le utiuti o le fa'asoa: O le alofa ma le agalelei?

Tatalo: Le Atua e, lo matou Tama. Ia matou tali atu ma le alofa ma le agalelei ia i latou o lo o mana'omia le fesoasoani, Amene!

O LE TUSI IA EPERU (1) (LETTER TO THE HEBREWS)

Aso Sā – Iulai 13: “O le tulaga ese o le taua o Iesu”

Tusi Faitau – Eperu 1: 1-13 (*Jesus' unique significance*)

Matua – ff. 1-2: *“O le Atua, na fetalai mai anamua i o tatou tamā e ala mai i perofeta, na auua'i mai i faiga eseese, a ua fetalai mai ia te i tatou i nei ona aso e gata ai e ala mai i le Alo, o le ua tofia e ia e fai mea uma lava mona tofi, na ia faia foi mea uma e ala ia te ia.”*

O lo o fai pea suesuega a tagata popoto o le Tusi Paia po'o ai na tusia le tusi o Eperu. Ae o le mea mautinoa, o ai lava le tusitala, e le galo ia i latou lo latou alolofa ia Iesu, ma e le uma ai lava lo latou fia talanoa ma ta'uta'u pea lona Suafa Paia. O lo o ta aofa'i e fuaiupu muamua o le tusi atoa le tulaga ese o le taua o Iesu Keriso. O Iesu ua tatou maua ai le fesootaiga tuusao ma le mafutaga vavalalata ma le Atua. E fa'aali sa'o mai lava le Atua; o lona Alo o le pupula ma le mamalu o le Atua. E le gata i lea, e silisili ese lava ia i lana galuega tala'i – e na o ia lava e mafai ona fa'amamaina agasala ma faatumauina mea uma i le mana o lana upu. I le ma lea, o lo o fa'amatalaina e Eperu 1:1-2 le galuega feso'ota'i a le Atua ma ona tagata e ala i fa'aaliga sa momoli atu e ana perofeta. Ae peita'i, ua fai lava Iesu ma fesootaiga sili aua o Iesu lava o le ala, upu moni, ma le ola. E le alu atu lava se tasi i le Tama pe a le ui atu ia te ia. O Iesu o le fa'amasino sili, ma le ositaulaga sili, ma le fa'aola o tagata uma.

Tatalo: Tama, o le na faia le lagi ma le lalolagi, ia fai o matou ola ma molimau i le alofa o Iesu Keriso, Amene!

Aso Gafua – Iulai 14: “O le mamalu o tagata uma ona o Iesu”

Tusi Faitau – Eperu 2: 5-18 *(The dignity of all humanity because of Jesus)*

Matua – ff. 7-8a: *“Ua e faamaulalo ane teisi o ia i agelu; ua e fa’apale ia te ia i le mamalu ma le viiga, ua e tofia foi o ia e pule i galuega a ou aao; ua e tuuina foi o mea uma lava i lalo o ona vae...”*

Ua ave i tatou e le tusitala o le Eperu i se malaga ma se vaauga loloto ia Iesu ina ua liu tino tagata. O lo o fa’amanatu mai i nei fuaiupu, e ui lava o Iesu o le Atua, ae na ia finagalo malie lava e liu tino tagata. Na avea o ia e pei o i tatou, i so’o se itu, na lagona fo’i e ia o tatou lagona uma, pe a tatou fiafia, o tatou fa’anoanoaga ma faigata, ma loto ua nutimomoia. Sei o tatou manatunatu ifo i le Atua, o le na faia le lagi ma le lalolagi, o le na fetalai ona iai lea o le aniva, ae na filifili lava o ia e fai ma tagata vaivai ma le maaleale. Na o’o o ia i tiga ma lu’itau o lenei olaga, na fa’alataina, fa’amomomoina, ma i’u i le oti. Aisea? Auā e alofa ma fa’atauaina e le Atua le tagata na ia faia.

E to’atele tagata e feola ma feoti i lenei lalolagi, ae latou te le iloa lava lona taua ma lona mamalu. E faitau miliona i latou uma ua aafia i sauaga, taua, ma le mativa i aso uma. O le to’atele o lo o soifua i se olaga sauaina, maasiasi, ma ua leai se fa’amoemoe. E fa’aapefa la ona tatou tapuai ia Iesu, ae tatou te le lagonaina le loto fa’amomomoina i le leaga o lenei faatusatusaga. O le finagalo o le Atua ia fa’apaleina i tatou uma i lona mamalu. Ia tatou maua uma lana amiotonu, olioli ma le filemu, mai lona Agaga Paia.

Tatalo: Faafetai ua fa’amamaluina i matou uma ona o Keriso, Amene!

Aso Lua – Iulai 15: “Iesu: o le lavea’i sili o tagata uma!”

Tusi Faitau – Eperu 3: 1-19 *(Jesus: the greatest liberator of all!)*

Matua – f. 3: *“Auā e ta’uaogaina o ia i le mamalu e sili i lo Mose, pei ona sili o le viiga o lē saunia le fale i lo le fale.”*

O Mose o se tagata taua i tala o Isaraelu. Na ia laveaiina Isaraelu mai le nonofo pologa i Aikupito; na aumai ia te ia tulafono e sefulu i le mauga o Sinai, ma tū fa’apuluvaga i le va o Isaraelu ma le Atua. E lei fesiligia lona fa’amaoni ma lona usita’i. Peita’i, o lo o fa’amanatu mai e le tusi faitau, e sili atu Iesu ia Mose. I le a le itu? E le gata o Iesu o se Aposetolo, a o ia fo’i o le Ositaulaga Sili. E le na o se auauna o ia i le fale o le Atua, a o Iesu o ia o le Alo o le Atua Soifua na fausia le fale. A o Mose, ua na o se auauna fa’amaoni i totonu o le fale. E le gata i lea, o Iesu na faatumauina le tausiga o le fale.

I le ma lea, na filifili Mose e le Atua e fai ma ta’ita’i na te lavea’i Isaraelu mai Aikupito. E fa’apena fo’i Iesu, na ia laveaiina i tatou mai le agasala i se auala e sili ona maua ma le ogaoga. Na taulima e Mose le tulafono e ta’u mai ai le finagalo o le Atua. A o Iesu na faataunuuina le finagalo o le Atua, e ala i lona maliu ma lona toetu. Afai la ua fa’asa’olotoina i tatou, e iai le vaega e tatau ona tatou faia: e le mafai ona tatou taofi mau i mea tuai sa saisaitia ai i tatou, auā e o’o mai ai le oti ma le nofo pologa. O lea, ia tatou taofi mau Keriso ma lana fa’aolataga i totonu o tatou loto, tatou te ola sa’oloto ai.

Tatalo: Le Atua e, lo matou Tama, ia ta’ita’iina pea i matou i le alofa tunoa ma le alofa mutimutivale o lau afio, Amene!

Aso Lulu – Iulai 16: “Malolaga fa’ale-Sapati mo tagata o le Atua”

Tusi Faitau – Eperu 4: 1-10 *(A Sabbath rest for the people of God)*

Matua – ff. 9-10: *“O lenei, ua tuuina mai pea o le malologa faasapati mo tagata o le Atua. Auā o le ua sao atu i lona malologa, ua malolo foi o ia i ana lava galuega, faapei o le Atua i ana lava.”*

O lo o fa’amanatu mai e le tusi faitau le malologa a le Atua tatou te tausia. E pei ona malolo le Atua i le aso fitu o lana foafoaga, e fa’apena foi ona malolo ona tagata. O lenei malologa ua le na o se malologa fa’aletino, ae o se malologa e sili lona taua e ala mai i lo tatou fa’atuatua ia Iesu Keriso. E sili atu nai lo le le faigaluega. E mafai ona fa’amalamalama atili e le upu Eperu, *“shalom,”* o lona uiga, ua tasi le Atua ma ona tagata i le loto ma le agaga. O le malologa lea e sau pe a fa’amaloloina le foafoaga uma. Ua mou atu le leaga, ae ua na o le fiefia atoatoa i le manumalo o Iesu. Ua filemu mea uma.

Pe a tatou va’avaai atu i luitau ma le pisi vale o lenei olaga, ia tatou manatua, o le malologa moni ma le filemu e maua ia Keriso. E le o le taofi o galuega mo lenei aso, ae o le sailiga o le malologa ia Keriso. Ia tuu atu ia te ia lo tatou fa’atuatua i lona fa’atolaloina o le leaga ma le amio le tonu i luga o le satauro, na ia saunia ai le fa’amagaloga o agasala ma toe fa’alelei le tagata ma mea uma na ia faia ma le Atua.

Tatalo: Tamā e, fa’afetai i lou filemu ua matou maua ia Keriso, Amene!

Aso Tofi – Iulai 17: “O se lapataiga ne’i pa’u atu”

Tusi Faitau – Eperu 6:1-20 *(A warning against falling away)*

Matua – ff. 19-20: *“Ua ia i tatou lena faamoemoega pei se taula o le agaga, e le matosina ma ua mausali, e oo fo’i i totonu i tala atu o le ie puipui, o le mea ua afio atu i ai Iesu, o le ua muamua atu mo i tatou; ua fai o ia ma ositaulaga sili e fa’avavau, e uiga fa’atasi ma Mekisateko.”*

O lo o fa’amatala e lenei tusi le eseese o le tagata o lo o tumau i le Atua ma le tagata o lo o ola femoumoua’i. O lo o fa’amatala e le tusi tala le tagata ua fa’avaivai ma ua le mafai ona ia pipi’i atu i le Atua. Ua pa’u ese ai le tagata ma le la mafutaga vavalalata ma Iesu. O se lagona e tupu i so’o se tagata i so’o se taimi, masalo fo’i o lo o tupu ia te oe. O fa’alavelave e tutupu i lo tatou olaga e mafua ai ona tatou fesiligia le alofa o le Atua. O puapuaga e fa’avaivaia ai lo tatou fia mafuta i le Atua, ma fa’atuatua ai le faitauina o lana upu. Ua motu ai le taula sa maua’a ai lo tatou fa’atuatua i le Atua ma ua le mautonu. O nisi e le o ni fa’alavelave tutupu i le olaga e pa’u ese ai, ae ona ua tau lava o le alu i le lotu ona o se mea ua masania’i ai, ae ua leai se uiga e alu ai i le lotu. Ua fa’aitiitia ai le fiefia e tapuai i le Atua. Ua fa’atusa ai e le tusi tala lenei tagata i se elelee ua ola ai na o vaofefe ma vao tuitui a’o lo o fa’asusuina e timuga-o le elelee lelei ua avea ma elelee e le mafai ona ola ai se laau.

O le upu moni, e le o i tatou o ni elelee leaga e le mafai ona ola ai se laau. Ua tusi fa’alaeiau mai le tusitala, ia tatou fa’ata’ita’i ia i latou o lo o fa’amaoni ma onosa’i. Afai o lo o fa’apena lou olaga i le taimi nei, ‘aue e te fa’anoanoa. ‘Aue le fa’atagaina le tiapolo na te saisaitia oe i ni mafaufauga sese. O lo o fa’atasi mai pea le Atua, ma silasila mai, ma ia mau pea lo tatou taula i le Atua.

Tatalo: Le Atua e, aua lava ne’i o matou pa’u’u ese ma lau afio, Amene!

Aso Faraile – Iulai 18: “Iesu e pei o Mekisateko le Ositaulaga a le Atua”

Tusi Faitau – Eperu 7: 1-28 *(Jesus like Melchizedek the priest of God)*

Matua – ff. 1-2: *“Auā o lenei Mekisateko, o le tupu o Salema, o le ositaulaga a le Atua silisili ese, o le na fetaiai ma Aperamo ina o foi mai o ia mai le fasiga o tupu, ma na faamanuia atu ia te ia; sa foi atu foi e Aperamo ia te ia mea e sefulu a’i o mea uma.”*

E mata’utia ma ofoofogia le tala ia Mekisateko! Na fetaia’i Aperamo ma se tagata lilo i le ala, na tali atu Aperamo ia te ia e peiseai o le Atua lava ia. E o’o lava i lona suafa e mata’ina. O le uiga o le upu Mekisateko o le “tupu o le amiotonu,” o ia fo’i o le “tupu o Salema,” ma le “tupu o le filemu.” O ia o se ositaulaga eleai sona amataga po’o sona gataaga. O ia o le “tupu o le amiotonu” ma le “tupu o le filemu.” Ma ua tapuai ia te ia Aperamo ma foi atu ia te ia le sefulua’i o ana mea uma. O le a la sa tatou e fai? Ia pei i tatou o Aperamo, ia tatou mataala i le fa’aali mai o le Atua, i le laumata fiafia o tagata e te le masani ai, i le avatu o le avanoa e ui ane ai se isi i ou tafatafa. O le ala lea tatou te maua ai le filemu o le Atua ma le amiotonu o Keriso. Aua e le sili ane lava se tasi. O Iesu Keriso lava o lo tatou “Ositaulaga Sili,” ma le “Tupu o le filemu.” Ua soloia e Iesu pa pupuni i le va o le Atua ma le tagata.

Tatalo: Fa’amalamalama mai pea le taua o Iesu le Ositaulaga sili, Amene!

Aso Toona’i – Iulai 19: “Ositaulaga sili o le Feagaia Fou”

Tusi Faitau – Eperu 8: 1-13 (*High Priest of a new covenant*)

Matua – f. 11: *“Latou te le a’oa’o atu foi taitasi i lē la te tuaoi, ma taitasi i lona uso, e faapea atu, la e iloa le Alii; auā e iloa a’u e tagata uma lava, o tagatānuu atoa ma alii.”*

O le Feagaiga Tuai sa fa’avae i le tulafono a Mose, e manaomia ai taulaga faifaipea mo le fa’amagaloina o agasala. Peitai, ina ua afio mai Iesu, ua fai o ia ma puluvaga o le Feagaia Fou, e ala i le taulaga ola na ia faia i luga o le satauro. Na ia fa’atoilaloina ai le agasala ma le oti. Ua liua ma toe fa’afouina ai o tatou loto. Ua tusia ai foi le tulafono a le Alii i o tatou loto. Ma ua maua ai le sootaga vavalalata ma Iesu Keriso, i le fa’atasi mai fo’i o le mana o lona Agaga Paia, ina ia tatou faia le finagalo o le Atua. Ia fa’atumulia i tatou i le loto fa’afetai mo Iesu lo tatou Ositaulaga Sili. Ia tatou fa’alatalata atu ia te ia ma le mautinoa, o ia o lo tatou Faitaulaga Sili, o lo o fautua mo i tatou, ma faia le fa’amagaloga, ma foi mai le alofa tunoa ma le ola atali.

Tatalo: Le Atua e, fa’aali mai pea Iesu Keriso le Ositaulaga Sili, Amene!

O LE TUSI IA EPERU (2) (LETTER TO THE HEBREWS)

Aso Sā – Iulai 20: “O le toto o Keriso” (The blood of Christ)

Tusi Faitau – Eperu 9: 11-28

Matua – f. 14: *“E le sili ea ona faamamāina o outou loto fuatia ifo ai galuega e oti ai, i le toto o Keriso, o le na avatua o ia e ia i le Agaga faavavau e fai ma taulaga e ponā i le Atua, ina ia outou auauna i le Atua soifua?”*

E te fiafia i le mea lilo? Ou te fiafia i potu tuufua. Ou te mafaufau loloto ai i le mea lilo. Pe onosefulu minute o o’u mafaufau loloto ai i se fa’aילו. E mafai ai foi ona ou tu’ufa’atasia se paso. E mafai ai foi ona alu lo’u mafaufau i se isi lalolagi. I le isi itu, i lo’u naunau ou te malamalama i le mea lilo, ae ou te matua le fiafia lava pe a ou le malamalama i le mea lilo.

E ia te a'u la le loto maulalo, i le taulaga na osia e Iesu Keriso, i le mata'utia ma le ofoofogia o le mea lilo. E le mafai e lo'u mafaufau ona fa'amatalaina. O se fuafuaga matagofie na faia e le Atua mo le fa'asa'olotoina seia o'o i le fa'avavau. Ua ou maofa ai i le liu tino tagata o le Atua, ina ua malie ma na liligi mai lona toto. Ina ia fa'amamaina le tagata, ma fa'amamaina o tatou loto.

Tatalo: Iesu, fa'afetai mo lou soifua foa'i fua, Amene!

Aso Gafua – Iulai 21: “O le taulaga e tasi mo tagata uma”

Tusi Faitau – Eperu 10: 1-18 *(The sacrifice once for all)*

Matua – f. 14: *“Auā o le taulaga e tasi ua faaatoatoaina ai e ia e faavavau o e ua faapaiaina.”*

Na e lagonaina ea le fia fa'amagaloina o au agasala? E iai le manatu fa'apea a ou matua'i tatalo, ma tagitu'i i le Atua, ona tali mai lea o le Atua. O le upu moni ou te lei malamalama atoatoa i le taulaga na osia e Iesu Keriso. O lo o fa'ali manino mai e le tusi o Eperu 10:1-18, e iai le tulaga e le atoatoa ai le osigataulaga i le Feagaiga Tuai. Sa manaomia le osia o le taulaga i manu e ufiufi ai agasala, e faiso'o ae le atoatoa. E le mafa'atusatusaina le taulaga na faia i manu ma le taulaga na osia e Iesu Keriso i lona soifua na foaina mo i tatou. Ua na o le taulaga lava na faia e Iesu Keriso na mafai ai ona tatou maua ai se mafutaga vavalalata ma le Atua ma lona mamalu. O le taulaga e tasi na faia e Iesu Keriso ua fai ma so'otaga e le motusia ma le Atua seia o'o i le fa'avavau. O le upu moni ua le toe mana'omia lo'u taumafai e fa'atosina mai le Atua, ina ia talia a'u talosaga. Ua le toe mana'omia fo'i lo'u taumafai e fa'agaetia le Atua i le tele o a'u galuega. Ae ua lava lava le taulaga na osia e Iesu ou te maua ai lou filemu. O le taulaga na osia e Iesu Keriso ua mafai ai ona ufiufi a'u mai le agasala. Ua ou manumalo ai ona o Iesu Keriso.

Tatalo: Iesu Keriso e lo matou Alii Fa'aola, fa'afetai tele i le taulaga ua uma ona e faia mo le Laveaina o lo matou ola, Amene!

Aso Lua – Iulai 22: “O le valaau ia tutumau” *(A call to persevere)*

Tusi Faitau – Eperu 10: 19-39

Matua – f. 22: *“Ina tatou faalatalata atu ia ma le loto faamaoni i le faatuatua ua mautinoa lava, o sausuina o tatou loto nai le manatu ifo ua leaga, o taelea foi o tatou tino i le vai manino.”*

Na e mata'u i le Atua? A'o o'u tamaititi ou te vaai so'o o ita lo'u tama, masalo ona o le tele o ana galuega. Na matuai ita lo'u tama i lo'u uso ina ua pa'u le ipu malamalama ma ta'e. E oso fa'afuase'i lona ita, o le mea lena matou te fefefe ai. Ua avea le ita o lo'u tama ma mea ua aafia ai lo'u talitonuga i le Atua. Ua fa'amaite mai e le tusi fauitau le loloto o le galuega na faia e Iesu Keriso e ala i lona toto. Ua mafai ai ona tatou ulufale atu i le mea paia, ma fa'atasi ma le Atua. Ua mafai ai fo'i ona tatou o atu ma o tatou loto atoatoa ma le moni o lo tatou fa'atuatua ia Iesu Keriso ma fa'atasi ma ia i lona mamalu. Ua fa'amanino mai foi e le tusi tala, le fa'amasinoga e fetaia'i ma le tagata ua ia le tutumau i lona fa'atuatua. Na feoti i latou uma i le vao. O le fa'asalaga lea e tusa ma le fa'amasinoga na o'o i le fanauga Isaraelu ina ua le usitai i latou i le Atua i le vaitau o Mose.

Tatalo: Le Atua e, ua le toe fefefe i matou i le saua mai o isi, Amene!

Aso Lulu – Iulai 23: “E ala i le fa’atuatua” (By faith)

Tusi Faitau – Eperu 11: 1-22

Matua – f. 6: *“A leai foi se faatuatua e le mafai ona fiasia mai o ia; auā e tatau i lē alu atu i le Atua ona talitonu o loo soifua o ia, o ia foi na te tauia mai o e matuā saili ia te ia.”*

E iai se taimi na e mafaufau ai ua lava lou fa’atuatua? Sa ou fefe i le fuaitau lea, ma o lea lava e ia te a’u le mata’u, aua faimai le fuaiupu lea, “e le fiasia le Atua ia te oe pe a leai sou fa’atuatua.” “O le fa’atuatua o le fa’alagolago lea i mea ua fa’amoemoe iai, o le mautinoa lea o mea e le o vaaia (f. 1).” O le fa’atuatua e mafai ona fa’aliliuina i le gagana Eleni o le “fa’atuatuaina.” O le “fa’atuatuaina” o le Atua na ia foafoaina ai le vanimonimo. Na “fa’atuatuaina” e Noa le Atua ina ua ia fauina le va’a e fa’asao mai ai Noa ma lona aiga ma manu ta’i lua i le ituiga. Na “fa’atuatuaina” e Aperaa mo le Atua, ua ia foa’i atu ai lona atalii o Isaako e fai ma taulaga. Aua na talitonu Aperaa mo “fa’atuatuaina” e ia le Atua na te toe fa’atuina mai Isaako nai e ua oti.

Ua ou filifili e fa’atuatuaina le Atua aua ua na silafia le mea e sili ona lelei mo a’u e ala ia Iesu le Ali’i Fa’aola. Ma o le taimi lava ou te fa’avaivai ai, ma vaivai lo’u fa’atuatua, ou te valaau i le mana o le Agaga Paia e fa’apupula mai le ala ou te alu atu ai i le Atua i le fa’atuatua.

Tatalo: Iesu Keriso, ua matou fa’atuatuaina lau lava afio, Amene!

Aso Tofi – Iulai 24: “Se a fo’i la’u e toe fai atu?” (What more shall I say?)

Tusi Faitau – Eperu 11:23-40

Matua – ff. 39-40: *“O i latou uma ia o e na ta’uleleia ona o le faatuatua, na le maua e i latou le mea na folafolaina; ina ua saunia e le Atua se tasi mea e sili ona lelei mo i tatou, ina ia le faaatoatoaina i latou pe a le i ai i tatou.”*

E foliga mai e tele ni toa o le talalelei o lo o fa’amatalaina e Eperu 11, ae o se vaaiga i ona tua atu, e tele o latou vaivaiga: o le ita o Mose na iu ai i le fasioti tagata; o le fefe o Kitona na mafua ai ona lafi; na mulilua Tavita ma fasioti tagata. E le ona o so latou malosi, ae ona o le Atua o lo o galue ia i latou e ui i lo latou le atoatoa. Ae sa faivavega le Atua i o latou vaivaiga, ua avea ai i latou ma faata’ita’iga o le faatuatua e pei ona aumaia e le tusi o Eperu.

Tatalo: Le Atua e, fa’afetai auā a ou vaivai ona e malosi ai lea, Amene!

Aso Faraile – Iulai 25: “Lapataiga mo e ua teena le Atua”

Tusi Faitau – Eperu 12:14-29 (A warning against refusing God)

Matua – ff. 28-29: *“O lenei, ua maua e i tatou le malo e le mafai ona luluina, ia tatou faafetai ai, tatou te auauna ai i le Atua ma le migao, ma le mata’u ia fiasia mai ai o ia. Auā foi o lo tatou Atua o le afi maamaa ia.”*

E iai se taimi na e fia taumafa ai i se meaai e te fiasia iai ae ua leai se taimi e kuka ai ona ua e vaivai mai lau galuega? O le taimi fo’i lena e manaia ai le pizza ananafi sa i totonu o le pusa aisa poo se meaai e mafai ona fa’avevela fa’avave i le ogaumu palagi mo nai minute se lua. Ou te manatua ai le tala ia Esau sa fia ai ona fa’atau lea o lona tofi o le ulumatua. I nei ona po ua fia fa’amalieina vave i tatou pe a fia taumamafa i fale’aina o lo’o mafai ona oka mai ai taumafa. Sa iai fo’i i se vaitaimi na matua lava le onosai i le sooga o le ata fa’asolo. A’o nei vaitaimi ua faigofie ona matamata i luga o upega tafailagi.

O lo'o faamalosi mai le tusi tala o Eperu "ia tatou fa'afetai a'i, ma auauna i le Atua ma le migao, ma le mata'u ia te ia, ina ia fialia mai o ia, aua o lo tatou Atua o le afi ma'amaai lava ia (f.28-29)." Ua ou sauni e fa'apaiaina lo'u nei ola, ina ia 'aua ne'i o'u ita pe faitatala ma fai ni tala tau fa'aleaga. E mafai fo'i ona ou fa'aitiitia le taimi ou te fa'aaogaina e matamata ai i ata le aoga i luga o upega tafailagi. Ua ou sauni e fa'amamaina lo'u nei ola mo Keriso.

Tatalo: Su'esu'e mai ia te a'u le Atua e, aua ua e silafia mea uma, i o'u mafaufaga ma o'u lagona, Amene!

Aso Toona'i – Iulai 26: "Ia tūmau le alofa o le tasi i le tasi"

Tusi Faitau – Eperu 13:1-25 (*Keep on loving each other*)

Matua – ff. 6, 8: "O le mea lea tatou mafai ai ona fai atu ma le loto tele, O le Alii o lo'u fesoasoani ia, ou te le fefe lava i se mea e faia e tagata ia te au ... O Iesu Keriso e le liu lava ia, o ananafi, ma le asō, e oo foi i le fa'avavau."

E fa'aiuiu le tusi o Eperu i le fa'amanuiaga faatasi ai ma se apoapoiga: "Aua nei galo ia te outou ona agalelei ma alolofa atu; aua o taulaga fa'apena e fialia ai le Atua (f.16)." "Ia tumau le fealofani o le au uso. 'Aua le galo le alofa i tagata ese. Ia manatua e ua noanoatia. Ia manatua fo'i e ua agaleagaina. Ia fa'amamaluina le fa'aipoipoga e tagata uma (f.1-4)." Ona fa'apea atu lea o le tusi tala, "ia aunoa ma outou le matape'ape'a ae ia outou malilie i mea ua uma ona foa'i atu e le Atua. "Ou te le tuua lava oe, ou te le tuulafoai lava ia te oe. Aua o le Alii o lo'u fesoasoani ia, ou te le fefe lava i se mea e faia e tagata ia te a'u (f.5-6)." Ou te talitonu ea e le mafai e le Atua ona tu'ulafoaina o a'u? E le o fa'atasi mai ea le Atua ia te a'u? E le o le Atua ea o lo'u fesoasoani? "O Iesu Keriso e le liu lava ia, o ananafi, ma le aso, e o'o fo'i i le fa'avavau (f.8)."

Tatalo: O lau afio e le liu, o ananafi, ma le aso, e o'o i le fa'avavau, Amene!

TA'UTINOGA O LE FA'ATUATUA (PROFESSIONS OF FAITH)

1. Iloaina o Iesu (Recognizing Jesus)

Aso Sā – Iulai 27: "Ua vaai Peteru ia Keriso: Alo o le Atua Soifua"

Tusi Faitau – Mataio 16:13-17 (*Peter sees Christ: Son of the living God*)

Matua – ff. 15, 17: "Ona fetalai atu lea o ia ia te i latou, A o outou, pe se a la outou upu ia te au, po o ai? Ona tali mai ai lea o Simona Peteru, O oe o le Keriso, o le Alo o le Atua soifua. Ona tali atu ai lea o Iesu ia te ia, Amuia oe Simona Paiona; auā e le se tagata na ia faaali atu ai ia te oe, a o lo'u Tamā o i le lagi."

E iai le taimi e manino ai la tatou vaai ma tatou talitonu ai, ae iai fo'i le taimi e le manino ai. Na tali atu Peteru ia Iesu, "O oe o le Mesia, o le Alo o le Atua Soifua" ona fa'aamuia atu lea o Iesu ia Peteru aua e le o se tagata na ia fa'aali atu ai ia te ia, ae o lona Tama o i le lagi. E lei iloa e isi so'o le tali o le fesili. Masalo na le fialia i latou ia Peteru ona ua latou le iloa le tali ae ua mate'ia e Peteru. Ua atoa nei le 1,700 o tausaga o le Fono i Naisia na tusia ai le Faatuatuaga i Naisia. A tatou mafaufau i le Fa'atuatuaga i Naisia, e iai le manatu tatou te fialia i le manatu o Peteru, ae iai fo'i le lagona o le le fialia i le tali a Peteru, ona e fua lava le lagona o le tagata ia i lana ia vaai i le Atua. Tatou te talitonu ea i le molimau a Peteru o Iesu Keriso o le Alo o le Atua Soifua, ma o ia lava o le Mesia?

Tatalo: A’oa’o mai matou te iloa ai le taua o le molimau a Peteru, Amene!

Aso Gafua – Iulai 28: “Talitonu ma le lē talitonu” (*Belief and disbelief*)

Tusi Faitau – Mareko 9:14-27

Matua – f. 24: *“Ona alaga loa lea o le tamā o le tama, ua fai atu, Le Alii e, ua ou faatuatua; ia e fesoasoani i lo’u le faatuatua.”*

Ina ua le pasi fa’alua la’u suega i le gagana fa’a Farani, ua sau lava ia te a’u le musu e toe su’e. Ae mavae tausaga e sefulu ma le fa, na ta’u mai i la’u faiaoga, e fa’amalosia le gagana Eleni i la’u aoga fa’aseminare. O le isi foi suega fa’alegagana e tataua lava ona pasi. Sa iai lava ia te a’u le masalosalo pe pasi le gagana Eleni ona o a’u suega sa fai muamua i le gagana fa’a- Farani na le pasi. Ae ua ou te’i lava ina ua sau le suega ou te pasi ma togī maua luga.

I le tala ia Mareko, na masalosalo le tama ona o le tulaga ua o’o iai lona atalii i lona ma’i. E leai lava se tasi na mafai ona fa’amaloloina lona atalii. Ua mau tala lenei tama i tala ave o Iesu. Na iai pea i le tama le masalosalo ona o isi tagata na ave iai lona atalii ae le i mafai e i latou ona fa’amalolo i lona atalii. Na vaaia e Iesu le masalosalo o lenei tama ona ia fai atu lea, “E mafaia mea uma lava i le fa’atuatua.” Ona alaga ai lea o le tama, ua fa’apea ane, “Le Alii e, ua ou fa’atuatua; ia e fesoasoani i lo’u le fa’atuatua.” E lei fesili Iesu i se isi lava mea, ua na o le fa’atuatua ua malolo ai lona atalii.

Tatalo: Foai mai le fa’atuatua e malolo ai ma’i i lou Suafa Iesu, Amene!

Aso Lua – Iulai 29: “Ua talitonu Toma” (*Thomas Believes*)

Tusi Faitau – Ioane 20: 26-29

Matua – f. 29: *“Ua fetalai atu Iesu ia te ia, Toma e, ua e faatuatua , auā ua e vaai mai ia te au. Amuia o e lē vaai mai, a e faatuatua mai pea.”*

Na manaomia e Toma le taimi e vaai ai i manu’a o Iesu ma tago atu iai ona lima ona talitonu lea. E ui lava ua iloa atu e Toma le suiga o le au so’o sa latou vaai ia Iesu ae na le talitonu lava Toma. Na fia fa’amaonia e Toma o Iesu lava lea ua toetu mai. O le taimi lava na vaai ai Toma ia Iesu ma tu’u lona lima i manu’a o Iesu, ona ia alaga lea, “Lou Alii e, ma lo’u Atua e!” Ua fetalai atu Iesu ia te ia, “Toma e, ua e fa’tuatua, aua ua e vaai mai ia te a’u. Amuia o e le vaai mai, a e fa’atuatua mai pea (f.29).”

Tatalo: Iesu Keriso e, fesoasoani mai i lo matou ola le talitonu, Amene!

Aso Lulu – Iulai 30: “I le Suafa o Iesu” (*In Jesus’ name*)

Tusi Faitau – Galuega 3: 11-16

Matua – f. 16: *“O lona suafa foi, ona o le faatuatua i lona suafa, ua faamalosi ai e ia lenei tagata ua outou vaavaai i ai, ma outou iloa; o le faatuatua mai ia te ia, ua foai atu ai ia te ia lenei faamalosi o lona tino i o outou luma uma lava.”*

Na tatala mai le faitotoa i le Suafa o Iesu ina ua fa’amaloloina le tagata pipili i le tusi o Galuega. O le igoa o Ene na tatala mai ai le faitoto’a i se galuega, ae o le Suafa o Iesu na tatala mai ai le faitoto’a mo le tagata ese o lo’o manaomia se fesoasoani. O le tamaoaiga o le Atua e le manaomia ni auro ma ni ario (f.6) ae ua na o le Suafa o Iesu Keriso le Nasareta. E iai tagata ua le toe taliaina e o latou aiga, nu’u, ma ekalesia, e pei o lenei pipili. Ae na taliaina lenei pipili e Iesu, faimai ua savali ma oso i luga ma vivii atu i le Alii.

Tatalo: Keriso e, fa'afetai tele i le mana o lou Suafa Paia, Amene!

Aso Tofi – Iulai 31: “Molimau Peteru i le fa’aeaina o Iesu e le Atua”

Tusi Faitau – Galuega 5:27-32 (*Peter’s witness that God exalted Jesus*)

Matua – f. 31: *“O ia ua aveina ae e le Atua i lona aao taumatau o le Alii i le ma le Faaola, na te avatua ia Isaraelu le salamo ma le faamagaloina o agasala.”*

O le talitonuina o se tasi e tusa lava pe sa’o pe sese, o se talitonuga e malosi tele. E fa’apena le talitonuga o Peteru ia Iesu, ina ua ia molimau ua siitia Iesu i luga e le Atua. Ina ua molimau Peteru ia Keriso, na ta’usalaina o ia e ta’ita’i o le lotu. O lo latou taofi mamau i lo latou talitonuga, na le mafai ai ona latou taliaina le molimau a Peteru. Ua o’o ina lamatia ai ma lona soifua.

I le seneturi e fa, na tusia ai e ta’ita’i o le Ekalesia le Fa’atuatuga o Naisia. Sa tele lava ni felafoa’iga na fai i le taumafaiga o le *Nicene Creed*. E le mafai ona fetu’utu’unai o tatou manatu pe afai ua mausali lo tatou talitonuga i se taofi e tasi. E pei ona tali atu o Paulo ma le au Aposetolo, “E sili lo matou anaana i le Atua nai lo le anaana i tagata. O le Atua na toe fa’atu mai Iesu nai e ua oti. Ua aveina ae Iesu e le Atua ma tu’u i lona itu taumatau. O Iesu lava o le Alii ma le Fa’aola na te avatua le salamo ma le fa’amagaloina o agasala.”

Tatalo: Foa’i mai pea le loto tele matou te anaana ai i lau afio, Amene!

Aso Faraile – Aok 1: “Molimau Ioane i le natura ma le tulaga o Keriso”

Tusi – Ioane 1:29-34 (*John the Baptist witnesses to Christ’s nature and status*)

Matua – ff. 32-34: *“Ua molimau fo’i Ioane, Na ou iloa le Agaga ua afio ifo mai le lagi, peisea se lupe, ua nofo i ona luga. Ou te le’i iloa o ia, peita’i o ia na auina mai a’u e papatiso i le vai, na fetalai mai o ia ia te au, O le e te iloa le Agaga ua afio ifo i ai, ma nofo i luga ia te ia, o ia lava lea na te papatiso i le Agaga Paia. Ua ou va’aia fo’i, ma ou molimau o ia lava le Alo o le Atua.”*

O Ioane le papatiso, e ui o ia o le leo o lo’o alaga i le vao, ae sa ia le iloa se mea o le a tupu ia Iesu, pe ana le papatisoina Iesu. O lea molimau ina ua iloa e Ioane le papatiso, *“le Agaga ua afio ifo mai le lagi, peisea se lupe, ua nofo i ona luga (f.32).”* Ua i ona luma le Tama’i Mamoe a le Atua, o le Alo o le Atua; o le tagata ua i ai le pule e fa’amagaloina ma aveesea agasala a le lalolagi. I se taimi mulimuli ane sa falepuipui Ioane le papatiso, a e foliga ua tau manatunatu pea ia Iesu. Pe le o ia o le Alo o le Atua? Po ua mao a luma i lea tagata? Na ia auina ai ona soo e fesili ia Iesu, O oe ea le maliu mai, pe fa’atali i se tasi? Ua tali Iesu, ina o atu ia ma ta’u atu ia Ioane, mea na oulua va’ai ai. Ua pupula tauaso, fa’atuina mai e ua oti, e avatu fo’i e Ia le Talalelei mo e matitiva.

Tatalo: Fa’afetai le Atua, ua e fa’aalia mai ou ala ma lou mamalu, Amene!

Aso Toona’i – Aokuso 2: “O Keriso, i lona tulaga Atua, na faamaulaloina”

Tusi Faitau – Filipi 2: 5-11 (*Christ, in nature God, became humble*)

ff. 5-7: *“Ia ia te outou foi lenei manatu o ia Keriso Iesu, o le sa uiga faatasi ma le Atua, e lei manatu ia o se mea e uu mau lona tulaga tutusa ma le Atua; a ua sasa’a atu o ia e ia lava, o fai mona le uiga o le pologa, i lona fanau mai faapei o tagata.”*

O Keriso sa uiga faatasi ma le Atua, e lei manatu ai o ia i lona tulaga tutusa ma le Atua. Ua uunaia e Paulo tagata talitonu e faatino lea gaioiga matagofie

ina ia manatu i le pologa e faapei ona fai ai Keriso i sootaga ma tulaga uma. A o tatou manatunatu ia Iesu, Timoteo, ma Epaferoti, ia tatou taumafai e ola ma le lē manatu faapito. A ia maua le alofa faamaoni, ma auauna atu faapei o Iesu na fai ma malamalama e faasusulu atu le malamalama i se lalolagi pogisa.

Tatalo: Le Alii e Iesu, ia ta'ita'i ina pea i matou e fai ma auauna o lou Tala Lelei. Ia faaauau ai matafai o le pologa ina ia maua le olioli, Amene!

TA'UTINOGA O LE FA'ATUATUA (PROFESSIONS OF FAITH)

2. O Iesu o le Alii (Jesus is Lord)

Aso Sā – Aokuso 3: “O Iesu o le Ali'i” (Jesus is Lord!)

Tusi Faitau – Roma 10: 6-17

Matua – ff. 8-9: *“A o le a ua fai mai ai? Ua latalata ia te oe le upu, o i lou gutu ma lou loto; o le upu lea o le fa'atuatua o matou o tala'i atu ai; afai e te ta'utino i lou gutu i le Ali'i o Iesu, ma fa'atuatua i lou loto ua toe fa'atuina mai o ia e le Atua nai e ua oti, e fa'aolaina ai oe;”*

A o foufou malaga i lenei vaiaso, ua tatou iloilo se mataupu iloga na faailoa mai e Paulo i le va'ava'ai i se isi itu i le ulutala. O lea faamanatu e uiga i le faaolataga ua tatou iloa ia Iesu na faatuina mai o ia mai le oti i le aso tolu. O lea faaolataga na ala mai i le Atua. O le folafola atu o Iesu o le Alii, o se manatu maoa'e, a o lo'o tumau pea le malosi o lea vaaiga i aso nei. Peita'i, o lo'o fa'ailoa mai i lea iloiloga i se isi vaaiga, o se faatinoga e sili atu e faatusa i le pule saua. Atonu o se malosiaga tau tamaoaiga, poo mana'oga e pulea ai taunu'uga o folafolaga. O Iesu o le “Alii,” o lea se tautinoga a Paulo, a o se faa-mafanafanaga mo tagata lutaia, Eleni, atoa ma tagata uma. *“E faaolaina i latou uma o e valaau i le suafa o le Alii (f.13)”*. O le fesili tele, pe faapefea nisi latou te le faatuatua, “O Iesu o le Alii”?

Tatalo: Le Alii Iesu e, ia taumamau o matou manatu mai le pule, a ia matou manatua lou faaolataga, Amene!

Aso Gafua – Aokuso 4: “O lo'u mamalu...?” (Mine be the glory ...?)

Tusi Faitau – 2 Korinito 4: 1-6

Matua – f. 5: *“Auā matou te le tala'iina i matou, a o Keriso Iesu le Alii; o i matou nei foi o a outou auauna ona o Iesu.”*

O le faitauga e toe mafaufau ai pea i se iloiloga mai i faamatalaga o le aso ua tuana'i atu; “Ua faamaulalo tulaga Atua o Keriso.” O Iesu Keriso sa uiga faatasi ma le Atua, a ua faamaulalo o ia e ia lava. O lea se tautinoga ua aumaia ai se iloiloga e uiga i le mamalu. *“Auā matou te le tala'iina i matou, a o Keriso Iesu le Alii.”* O le ta'utinoga a Paulo e tusa ma lo latou valaauina. E faapefea ona malamalama i le Atua? Pe faapefea fo'i le mamalu? O lea mamalu e faasoa ai pea lagona e uiga i le malamalama e aveesea ai le pouliuli.

Tatalo: Ia tumau pea i lau Afio le mamalu ma le viiga e faavavau, Amene!

Aso Lua – Aokuso 5: “Faia se tautinoga lelei”

Tusi Faitau – 1 Timoteo 6: 11-16 (Making the good confession)

Matua – f. 12: *“...tago atu ia i le ola faavavau, na valaauina ai foi oe, ma ua e ta'utino atu i le ta'utinoga lelei uma o molimau e toatele.”*

O lea mau na faailoa atu ai e Paulo ia Timoteo lona atalii i le faatuatua; o ia o le tagata o le Atua. Ia tau le taua i la le faatuatua ia maua ai le ola. O le faitauga mo lenei aso, o loo faamamafa mai ai le faatuatua, o se ta'utinoga. Ua tala faasoa le aposetolo i le pologa ia ava i o latou matai, ina ne'i upuleagaina le suafa o le Atua ma le a'oa'oga. E faapea fo'i i le mauoa aua ne'i faamaualuga, a ia agalelei atu, ia mataalofa, ma foai fua e pei o le Atua soifua na foai tele mai o mea uma lava. Ia gauai i le upu e ola ai, o le Alii o Iesu Keriso, ma le amio Atua. O Iesu fo'i sa ta'utino ma le faamaoni ia Ponotio Pilato ma i'u i lona maliu; o vaivaiga ia faaletagata; pepelo ma le oti. O le ta'utinoga lava o Iesu na faaeaina ai o ia ma avea o le Alii o alii, o le Tupu o tupu. O lea faailoga i le faatuatua o se ta'utinoga uiga ese ma e matautia e lē masao i ai se tasi.

Tatalo: Le Atua alofa, ia matou ta'utino atu lou mamalu, Amene!

Aso Lulu – Aokuso 6: “O lona uiga, o oe lenā?”

Tusi Faitau – Mataio 14: 22-33 *(So, that's who you are?)*

Matua – ff. 31e-33: *“Ona la o ae lea i le va'a, ona malu ai lea o le matagi. Ona o mai ai lea o e na i le vaa, ua ifo mai ia te ia, ua faapea mai, “E moni, o oe lava o le Alo o le Atua.”*

Pe na i ai se taimi na suia ai lou iloa o se tagata? Ua atuatuva le 'ausoo, ae fesili Peteru e fia faamautinoa, ona fetalai lea o Iesu e faamautinoa ona soo. O le a'oa'oga o lo o aumaia e le tala, po le a lava le tetele o matagi, afa, ma aitu latou te va'avaai i ai, ia tumau le faatuatua 'aia ma le masalosalo vale.

O nei vaitaimi e mafai ai ona tatou vaai atili atoatoa po o ai lena tagata – ia malamalama atoatoa ia i latou. E foliga mai o le mea lenā na oo i soo o Iesu i lenā vaa. E oo mai i le taimi lea, atonu na latou iloa o ia o se tasi tagata faapitoa. O le faatinoga lava o le filifiliga e mulimuli atu ia te Ia. E ui lava i lea, latou te le'i sauni e feiloai ma ia i se taimi poo itu aso faapea. Ma o lenei ua ia taofia le afa ma taofia i latou mai le taunuu atu i le matafaga! E le o se mea e ofo ai, a ia faatuatua "E moni, o oe o le Alo o le Atua. O le Eleni e latou te le manino pe latou te va'avaai ia Iesu o se Alo o le Atua (o se tagata amioatua moni), ae latou te vaai o le Atua o lo'o galue ia te ia.

Tatalo: Le Atua e, fa'ailoa mai lau Afio i a matou ta'utinoga, Amene!

Aso Tofi – Aokuso 7: “Ina ia tasi” *(Being one)*

Tusi Faitau – Ioane 17: 20-26

Matua – ff. 21e, 23: *“fa'apei o oe le Tama o i totonu ia te au, o a'u fo'i o i totonu ia te oe, ia tasi i latou i totonu ia te i taua; ina ia talitonu le lalolagi ua e auina mai a'u. O le mamalu fo'i ua e foai mai ia te au, ua ou foa'i atu ia te i latou, ina ia tasi o i latou, fa'apei o i taua ua tasi; o a'u o i totonu ia te i latou, o oe fo'i o i totonu ia te au, ina ia fa'aatoatoaina i latou ia tasi; ina ia iloa ai fo'i e le lalolagi, na e auina mai a'u, ma e alofa mai ia te i latou, fa'apei ona e alofa mai ia te au.”*

O lenei faitauga o se tasi o fa'aaliga e sili ona matagofie: o le fa'ata'ita'iga o le lotogatasi o le 'au Kerisiano – e maua'a i le lotogatasi ma Keriso, ae maua'a le faatuatua. O lo o tatalo Iesu mo ona soo ina ia tofusua i lona mamalu ma faailoa se auala i lona mamalu. O lea mamalu e uiga i le loto gatasitasi e atoatoa ma mausali ai le faatuatua ia Iesu Keriso. E mafai faapefea ona tatou maua le loto e tasi e pei o le Atua i totonu o Iesu, o Iesu foi i totonu o le Atua?

Tatalo Faafetai mo le lotogatasi matou te mauaa ai i le faatuatua, Amene!

Aso Faraile – Aokuso 8: “O le tau o le alofa” (*The cost of love*)

Tusi Faitau – 2 Korinito 4: 10-14

Matua – f. 10: “O loo tauave i le tino e le aunoa le fasiotia o le Alii o Iesu, ina ia faalia foi le soifua o Iesu i o matou tino.”

O loo mafatia le aposetolo i le tauaveina o le tino o le Alii o Iesu ia faailoa ai pea le faamaoni o le alofa tunoa o le Atua i o latou tiga uma. Pe faalumaina, po o a faigata na oo ia Paulo ma lana misiona, a o le faamoemoe ia soo le atu Asia e oo lava i le lalolagi le Tala lelei ia Iesu Keriso. A o latou *tino augavale* ua lafotuina i lalo ina ia saunia ai i le mamalu faavavau o le Atua. O le lototigā ma le loto nutimomoia, ma le leai o se fesoasoani, ua teena ma tuuaia. O le alofa na afua ai nei mea uma. O le alofa o lona uiga o le auai, ona o le tau i le alofa. O le alofa o le tauaveina o tiga, e ofoina atu. O a tau o le alofa? O i fea fo’i e maua ai le tau i le faatinoina o le alofa?

Tatalo: Faasoa mai e faatumauina le alofa faamaoni i lau Afio, Amene!

Aso Toona’i – Aokuso 9: “E pei o le tinā, pei o le afafine”

Tusi Faitau – 1 Ioane 5: 1-13 (*Like mother, like daughter*)

Matua – ff. 1, 4: “Aua o i latou uma o e fanau mai i le Atua, e manumalo i latou i le lalolagi; o lenei foi le manumalo e manumalo ai i le lalolagi, o lo tatou faatuatua lava.”

Ua apoapoai Ioane i faaaoaoga o le alofa e faatinoina mo soo se tagata. O le alofa i le Atua o le alofa lea i lona aiga. O le alolofa i fanau a le Atua ona ua tatou alolofa i le Atua. Ma e tatou te faaalua lo tatou alofa i le Atua e ala i le usiusitai i poloaiga a le Atua; e sili ona taua o le alofa i le Alii o lo tatou Atua e maua ai le malosi atoa. O le alolofa atu i tagata uma ona ua tatou iloa e alofa ina mai foi le Atua. Ma ua tatou iloa o le alolofa i le Atua e afua i le faatuatua ma le mautinoa o lona lava alofa e faamaoni. E faapefea ona faaalua lea ituaiga alofa i se lalolagi feitagai, ma le leai o se ola fealofani?

Tatalo: Iesu e, ia fesoasoani mai ia matou olaina lea alofa e faaaauu pea i lo matou ola fai soo, Amene!

O LE EVAGELIA A LUKA (*THE GOSPEL OF LUKE*)

1. O a tatou fa’amuamua (*Our priorities*)

Aso Sā – Aokuso 10: “Amoina o tatou satauro” (*Carrying our cross*)

Tusi Faitau – Luke 14: 25-35

Matua – f. 26: “Afai e sau se tasi ia te a’u, a e le ‘ino’ino i lona tamā, ma le tinā, ma le avā, ma le fanau, ma uso, ma tuafāfine e o’o lava i lona ola, e le mafai ona fai o ia mo’u soo.”

O le valaau e avea ma soo o le Alii, e ofo le ola atoa, e le toe manatu i aiga poo se isi lava mea. O le loto fuatiaifo, e manaomia ai le alofa atu i le Atua ma le tautinoga atoatoa i le tuuina atu o le ola, e aunoa ma le popole i lona lava ola. O se tautinoga e leai se fefe, ae faafiti i le lalolagi, ma mulimuli ia Iesu, o se valaaulia e silisili i mea uma. O le tau i le alofa. O le mulimuli i poloaiga a le Atua e aofia ai le taliaina o le Atua e tauave ai le mamafa tu o le

satauro. O le mulimuli foi i le Atua, o le tuua o lou fale ma lou aiga, o mea totino, e o'o foi i le saogalemu o le ola. O le sini o lenei a'oa'oga o le usita'i ma faalogo nai loo o mea uma. O le afio mai o Iesu, ua faamanino mai e tatau ona faatauunuina le togioa. O lea faamoemoe taua o le toe faatuina o le malo o le Atua i le lalolagi. I lenei mau, ua lu'iina ai e Iesu le 'aufaalologologo; O ai ua sauni e foa'i lona ola ina ia galulue faatasi ma Ia?" Ua faatusa i e na mulimuili ia Iesu, ia pei i latou o le masima, e faia se suiga tele i le olaga o tagata uma; aua ne'i muta le masima pe afai e avea i latou ma ala e fausiaina ai le malo o le Atua, ma manumalo faatasi ma le Atua i lona malo e faavavau. O ai ua sauni e ofoina atu o lona ola atoa mo le Atua, ae le mo ia lava, poo lona aiga?

Tatalo: Foai mai le lototele ia mumuli i lau Afio ma le loto atoa, Amene!

Aso Gafua – Aokuso 11: “O le mamoe na sē ma le tupe na leiloa”

Tusi Faitau – Luka 15: 1-10 *(A lost sheep and coin)*

Matua – f. 7: *“Ou te fai atu ia te outou, e fa'apea fo'i ona tele o le olioli i le lagi i le tagata agasala e to'atasi e salamō, a e itiiti i e amiotonu e to'aivagafulu ma le to'aiva e lē tusa i ai le salamō.”*

O le faitauga o ananafi, sa faailoa ai e Iesu o matafaioi e tauaveina i le avea ai ma soo, e mulimuli atu ia te Ia. Peita'i, o lenei aso ua faaalua ai mea na faia e le Atua i lona lava alofa tunoa mo tagata uma; i le fia avea ai ma soo e faia lona finagalo. O le muimui o le au Faresaio ma le au tusiupu; *'Ua fai mai o ia o le avefeau mai le Atua, ae na te le mafaia ona tausia le tulafono!'*

A o se ata manino i le tusitusiga a Luka, o loo tausia lava e Iesu le tulafono, o Iesu foi o le tulafono a le Atua, le ala o le amiotonu o le alofa e le maluelue. E saili e le Atua i le ua leiloa, o le Atua e mulimuli ia i latou e pei o se leoleo mamoe e saili lana mamoe ua se ese, e saili lava ina ia maua; e pei fo'i i le fafine na leiloa se tasi o ana tupe siliva taua, atonu o se vaega o lana meaalofa mo se faamoemoe taua, a o lea ua saili, na saili lava ina ia maua lea na i'u lava ina maua. Atonu, na finagalo Iesu i le 'au tusiupu ma le 'au Faresaio ina ia liua o latou manatu faiaina i le salamo ma le lotomaulalo. Ae peita'i, sa latou manatu lava e le tatau ona latou salamo, atonu o le ala lea, ua latou misia ai le avanoa e manumalo faatasi ai ma Iesu i le malo o le Atua.

Tatalo: Le Atua agalelei e, fa'afetai i lou mafutaina pea o i matou ma lou sa'ili mai i ala tonu matou te savavali ai, Amene!

Aso Lua – Aokuso 12: “O se atali'i ua le iloa” *(A son is lost)*

Tusi Faitau – Luka 15: 11-32

Matua – f. 32: *“Ua tatau fo'i ona tatou fialia ma olioli, auā o lou uso lena na oti, a ua ola mai; na le iloa fo'i, a ua maua.”*

E to'atele na faalogo ma iloa tala e uiga ia Iesu, o se tagata e agamalu ma loto maulalo. O se ata faapea latou te iloa mai i le faatinoga sa faia e le tamā. O tu ma aga faa-Iutaia, e latou te le taliaina se faatinoga o le faalumaina. E faapea se vaaiga i le to'atele o matua, latou te le taliaina uiga o le faalumaina. O lo latou mo'omooga, ia ola usiusita'i le fanau. Peita'i, o lenei tala, o le a tatou vaavaai ai i se isi gaioiga e faeaina ai le to'ilalo ma le faalumaina. E tusa lea ma faatinoga o le agamalu ma le lotomaulalo. O lea faatinoga sa avea ma ala ua lē toe talitonuina ai le tamā i lana matafaioi e tusa ai ma lea tala.

O le tele o taimi tatou te ole atu ai i le Atua mo se fesoasoani. E i ai fo'i taimi e osofia ai lagona aua ne'i o tatou faalavelave i le Atua, pe tatou te lagona e lē alofa mai lava le Atua. E oo foi i lo tatou tuua'ia o le Atua i mea faaletonu e tutupu i lo tatou ola. Pe tatou te manatu fo'i o mea leaga na tatou faia e le mafai ona faamagaloina. Ae o lenei tala ua faailoa mai ai ia i tatou o se ata uiga ese lea ua faalia mai e le Atua. O le atalii na alu ese mai lona tamā, ae ua faafeiloai e lona tama i lona alofa mutimutivale, ua ave ia te ia i le fale ma faaofu, faaseevae, ma tuu i ai le mama i lona lima.

Tatalo: E faiaina lava le tagata, a o loo e tuuavanoa mai lava, Amene!

Aso Lulu – Aokuso 13: “O le Pule togafiti poto” (*The shrewd manager*)

Tusi Faitau – Luka 16: 1-18

Matua – f. 8: *“Ua vivi'i atu le ali'i i le auauna amiolētonu, auā ua na togafiti poto: auā e sili le poto o tagata o le olaga nei, i lo latou tupulaga, i lo tagata o le malamalama.”*

O lenei mataupu o loo auamaia ai se ata o le mauoa ma le auauna na tofia e fai ma pule ua togafiti poto. I le avea ai ma se tasi o tofiga mauululuga, e tele ai faaosoosoga, e pei o lenei tala. A o sauni le mauoa e faate'a le na tofia e avea ma pule, na togafiti poto le auauna pule e faia se tusi, o lea tusia e tului mo le totogiina o aitalafu i le mauoa. I lea faataoto na faamatalaina e Iesu, e le o faataua ai se nonogatupe, teugatupe, poo le tupe fo'i. O loo ia faamatalaina lea tala faa-le-faataoto. O se tala e faamanatu mo le au faalogologo ma i latou uma sa auai, e oo lava i le fanauga a Isaraelu, e tatau ona avea i latou ma pule i mea na foafoa e le Atua, ma tausi i ana poloaiga. O le pule e tausi lelei ai le foafoaga o le Atua. O le pule e faasalalauina le malamalama o le Atua.

O le tali atu o Iesu i le 'au Faresaio e tusa ma mala o loo lumana'i, ina ia faamallosia i latou e tusa ma tulafono o le Atua. Ia faasilisili atu ona paia ma talia faapitoa mo atunuu uma, ina ia laveaiina ai i latou e le Atua faatasi ma tagata uma. O lea faamallosi o loo aumaia ai se fesili, 'O le ā se mea e mafai ona faia pe a oo ina faafesaga'i ma lenei mala? E mafai faapefea ona suia le togafiti pepelo, o le faailoaina o oe lava, ma faaoga meatotino a le Atua e fai ma au togafiti poto, e saili ai ni au uo ma viiga; i le avea ai o tatou ma pule e "faamalamalamaina atunuu uma ma le lalolagi atoa" e tusa ma le finagalo o le Atua?"

Tatalo: Le Atua e, ua tu'uina mai se sa'olotoga matagofie i lau fanau i lo matou ola fefaasoa'i, Amene!

Aso Tofi – Aokuso 14: “O le mau'oa ma Lasalo”

Tusi Faitau – Luka 16: 19-31 (*The rich man and Lazarus*)

Matua – f. 31: *“Ua fai ane o ia ia te ia, Pe afai latou te le fa'alogo ia Mose ma le 'auperofeta, e ui lava ina tu mai se tasi nai e ua oti, latou te lē mafafai lava.”*

O lenei faataoto o loo faaalia ai se tagata mauoa sa ola i se olaga taugata. E na te le amanaia tagata matitiva. E pei o Lasalo sa i lona faitotoa. Ina ua mavae le oti, na faamāfanafanaina Lasalo i le fatafata o Aperaamo, a o mafatia le tagata mauoa i Seoli. Na faaoga e Iesu lenei faataoto e faamamafa ai aafiaga o le ola e faavavau i se filifiliga faalelalolagi. O le taua o le ola usitai i Afioga a le Atua, aua e le toe aoga ona salamo pe a mavae le ola. Peita'i, o lea faataoto na faamatala e Iesu, o loo faailoa atu mo tagata Isaraelu e tatau ona

faia se filifilga faapitoa. O le Afioga o le Atua o loo latou taulimaina, e tatau ona alolofa atu i e matitiva, o fafine ua oti a latou tane, o fanau ua matua oti, o le tagata ese, ma e o loo sulufa'i i le fia ai poo le fia inu. O lea se faatatau ia faia manu e le'i tuai. O le malo lenei na afio mai ai Iesu e faatuina. Po ua outou faatasi ea ma le Atua, ma va'avaai i le alofa ma le loto faamagalo; pe leai?"

Tatalo: Fesoasoani mai Agaga Paia, faaaga i matou e faasusulu atu lou malamalama i le lalolagi, Amene!

Aso Faraile – Aokuso 15: “Agasala, fa’atuatua ma tiute - aga o le mālō”

Tusi Faitau – Luka 17: 1-19 *(Sin, faith and duty – kingdom values)*

Matua – ff. 15-16: *“O le tasi o i latou, ua na iloa ua fa’amaloloina o ia, ona toe fo’i mai lea o ia, ua vivi’i atu i le Atua ma le leote tele; ua fa’apa’u fa’o ia i ona vae, ua fa’afetai mai ia te ia; o le Samaria fo’i o ia.”*

Sa tele se taimi na faafesaga'i ai Iesu ma le au Faresaio na latou faitioina galuega a Iesu, ma le faia ai fo'i o se mafutaga mo tagata ao lafoga ma 'tagata agasala', e oo lava i tamaiti ma fanau laiti. O loo faamatalaina e Iesu se auala e tatau ona amio ai ona Soo. Afai e tausisi pea le au Faresaio i nei tulafono uma, o le toatele o tagata o le a le mafai ona tausia. O le faia o tagata ona o le tulafono e nofosala i latou ona ua latou teena le alofa o le Atua. Afai e faailoa mai e se tasi ua latou faia se mea sesē, e tatau ona faamagaloina lava i latou. E le mafai ona tatou toe totogi ina le Atua i mea ua Ia tuuina mai ia i tatou. E ao ona taumafai e mulimuli i ana tulafono ma ola ai e pei o Iesu i lona soifuaga atoa, e ola e tusa ai ma faatonuga o Afioga a le Atua.

Tatalo: Le Alii e, faafetai i auala e ao ona matou faatinoina ai lou alofa, a ia totoina i o matou loto, Amene!

Aso Toona'i – Aokuso 16: “O le o'o mai o le mālō”

Tusi Faitau – Luka 17: 20-37 *(The coming of the kingdom)*

Matua – ff. 20-21: *“Ua fesili mai ia te ia le au faresaio, Pe o'o mai afea le malo o le Atua? ua tali atu o ia ia te i latou, E lē o'o mai le malo o le Atua ma le va'aia e mata. E le fai ane fo'i tagata, Fa'auta, o iinei! Pe fa'apea, O iila! Auā fa'auta, ua i ai lava ia te outou le mālō o le Atua.”*

O lea ua faaiuina le faitauga atoa o lenei vaiaso i lenei mataupu o se valaau faamalosi i matafaioi faa-Kerisiano; o le faamagalo, ia ola talitonu, ia auauna atu, ma ia ola sauniuni mo le Malo o le Atua. O nei a'oa'oga ua uuna'ia ai i tatou ina ia ola i le faatuatua, faamagalo atu ma ia limafoa'i, e faataunuu lava o tatou tiute tauave faa-Kerisiano i le lotomaulalo, e atia'e le loto faafetai, ma tausisi i le iloa lelei o le faatasi mai o le Atua. O lenei mataupu ua valaauina ai i tatou i se faatuatua e aafia ai vaega uma o lo tatou olaga ma faailoa atu ai a tatou amio e tusa ma le ola fegalegaleai ma le ola fealofani. O nisi tagata e faauigaina lenei valaaulia o le iuga o le lalolagi e pei ona tatou iloa, o le Afio Faalua mai o Iesu e aumaia le malo o le Atua, le pule a le Atua i le lalolagi. Peita'i, o tagata sa fetalai i ai Iesu o loo feagai ma se mala e ono suia ai le lalolagi poo le Ierusalema o loo latou aumau ai. O le a fa'aleagaina ai le Malumalu i Ierusalema. E mafai faapefea ona faaagaina i tatou e momoli ma faailoa le malo o le Atua?

Tatalo: Le Atua e, ia avea i matou ma tagata o lou malo, Amene!

O LE EVAGELIA A LUKA (THE GOSPEL OF LUKE)

2. Ia sa'ilia mea alofa lelei a le Atua (To seek our God's good gift)

Aso Sā – Aokuso 17: “O le finau maua'i a le fafine ua oti lana tane”

Tusi Faitau – Luka 18: 1-17 (*The persistent widow*)

Matua – ff. 2-3: “Ua fa'apea atu, “Sa i le tasi a'ai le fa'amasino, ua lē mata'u i le Atua, e lē ava fo'i i tagata; sa i lea a'ai fo'i le tasi fafine ua oti lana tane, ua alu atu ia te ia, ua fa'apea atu, la e fa'amasino atu i le ua i ai a'u mea.”

A o tatou i ai i lenei soifuaga, e tele ni lu'itau e feagai pea ma la tatou savaliga umi i lenei lalolagi. O le faitauga o lenei aso, ua fa'amatama mai ai le fafine finau ua oti lana tane. O lona finau ina ia sa'ili i amiotonu i lē ua i ai ana mea. O le tagata e naunau i le faia o le mea sa'o, ina ia manino ma malamalama tagata uma. Na ia lototele ma ia fa'a'iloa ona lagona i lū ua fai ma fa'amasino i le nu'u, ina ia faia i'uga i auala sa'o. O le fe'au o lo'o fa'a'iloa mai e lenei fa'ata'oto, o le Atua o le fa'amasino i le amiotonu. E le'o fa'apea ua lē manatu mai le Atua ma lē faia le fa'amasinoga mo le tagata, a e fa'amalosia mai ia u'una'ia pea o tatou loto e finau i le faia o le mea sa'o. E i ai taimi ua musuā ai o tatou lagona i le fa'a'iloa o le mea sa'o, ona o le vā feagai ma nisi tagata. A e galo ai iā i tatou, ua tatou 'alo mai le faia o le finagalo o le Atua. O le Atua lava ia e faia le fa'amasinoga tonu mo i tatou uma. Pau la tatou galuega, ia faia mea uma i le auala sa'o ma le loto mamā. Ona moni lea o la tatou auunaga i le Atua ma lo tatou vala'auina.

Tatalo: Le Atua fa'afofoga tatalo e, foa'i mai le lototele ina ia matou faia ai fa'ai'uga sa'o i le loto mamā, Amene!

Aso Gafua – Aokuso 18: “Tasi le mea e te lē o maua”

Tusi Faitau – Luka 18: 18-43 (*One thing you lack*)

Matua – f. 18: “Ua fesili mai fo'i ia te ia le tasi ali'i, ua fa'apea mai, “Le a'oa'o lelei e, se a le mea ou te faia, ou te maua ai le ola fa'avavau?.”

O le afio mai o Iesu, na fa'afouina ai lagona o tagata matitiva e ala i ana a'oa'oga. O lo'o fa'a'iloa mai i le faitauga o lenei aso, ese'esega o le mau'oa i le tino ma le mau'oa i la le Agaga. E tele manuia ua ia maua peita'i, ua lē iloa ona ola fa'asoa atu i nisi o mana'omia le fesoasoani. O le ola e fa'avavau o lo'o tausiniō uma ai le 'au fa'atuatua. A o le fesili e fa'atupu manatu, fa'apefea ona tatou maua le ola e fa'avavau? Ua tatou 'ae'ae lea manu ua ulu i manuia o le Atua ua tatou maua. A e tasi lea o vaivaiga o lo'o feagai pea ma le tagata i lenei vaitau. Ua avea le tele o tamaoaga ua maua, ma ala ua punitia ai la tatou va'ai i nisi o lo'o mana'omia le fesoasoani. A o le finagalo o le Atua na momoli mai e Iesu, ia tatou fa'asoa atu manuia o le Atua ua tatou maua i ē o lo'o mo'omia. E leai fo'i se aogā o le tele o mea tatou te maua, a e lima mau ma leai se ola fa'asoa i nisi. O a lava mea ua tatou maua, ia foa'iina iā i latou o lo'o sa'ili mo se fesoasoani. O lo tatou ala lea i mālō ua saunia e le Atua mo i tatou uma.

Tatalo: Le Atua agalelei e, ia e fa'atupuina le loto foa'i iā i matou ina ia o matou fesoasoani ai i nisi o lau fanau o lo'o mana'omia, Amene!

Aso Lua – Aokuso 19: “Sakaio le ao lafoga”

Tusi Faitau – Luka 19: 1-27 (*Zacchaeus the tax collector*)

Matua – ff. 8-10: *“A ua tu mai Sakaio, ua fa’apea mai i le Ali’i, “Fa’auta, le Ali’i e, o le a ou vaeluaina atu a’u mea i e matitiva; afai fo’i ua ou ave mea a se tasi i se ala pepelo, ou te tau i atu ai e ta’ifa.” Ua fetalai ane Iesu ia te ia, “Ua o’o mai le fa’aolataga i le aiga nei i le asō, ina ua fai o ia ma atali’i o Aperaamo. Aua ua sau le Atali’i o le tagata e sa’ili ma fa’aola i le na le iloa.”*

Ua fa’aali i upu o le tatou matua, ua ao fa’asili e Sakaio le lafoga a tagata e sa’ili ai lona tamaoauga. Na fa’ailoa e Iesu i tagata le mālō o le Atua ma le ola e fa’avavau. O le ala tonu e tatau ona savalia e tagata, ina ia tini tau lau le fa’amoemoe i le ola e fa’avavau. A o le vaivaiga lea na feagai ma Sakaio, ina ua mana’o tele i le ‘oa o le lalolagi; a e galo ai le Atua ma lona mālō. O le olaina o le finagalo o le Atua, o le ala lena i lona mālō ma le ola atali. O le tamaoauga i le lalolagi ua tatou maua, o manuia o le Atua na ia foa’i fua mai. Peita’i, e i ai taimi tatou te lima mau ai ma le maua le ola fa’asoa i nisi o loo mana’omia. E leai fo’i se uiga e tele ai mea ua tatou maua, a e aunoa ma le ola fa’asoa.

Tatalo: Ia avea i matou ma fesoasoani tatau i e ua matitiva, Amene!

Aso Lulu – Aokuso 20: “O se ulufale manumālō” (A triumphal entry)

Tusi Faitau – Luka 19: 28-48

Matua – ff. 36-38: *“O malii ane o ia, a ua latou fofola o latou ofu i le ala. Ua latalata o ia i le ifoa’i o le mauga o Olive, ona afua ai lea o le olioli o le au so’o uma na vaaia e i latou; ua fa’apea ane, “Ia manuia le tupu o lo’o malii mai i le suafa o le Ali’i; o le manuia i le lagi, o le vi’iga fo’i i mea aupitoaluga.”*

O le malaga atu o le Ali’i o Iesu i Ierusalem, o le fuafuaga ua fa’ata’oto e le Atua i le amataga o le galuega fa’aola a Iesu. O le sauni atu o Iesu e tali i ona tīgā ma faigata o le oti. A o le alalaga o tagata ina ua ulufale atu i Ierusalem, ina ua afio mai le Alo o Tavita. O le finagalo alofa lea o le Atua mo le tagata agasala, ina ia lē fano se tasi e fa’atuatua iā te ia, a ia maua pea le ola favavau. O le tunoa o le alofa o le Atua i le lalolagi, na ia ofoina atoa mai ai le soifua o lona Alo o Iesu Keriso. O le tupu o le lalolagi uma a e na ia savalia ala o le loto maulalo, na ti’eti’e i asini ma ulufale atu i Ierusalem. O le fa’ailoga o le filemu ua ia momoli mai mo le lalolagi, ma fa’aolaina ai tagata uma. Ua tele ituaiga ta’ita’i ua tatou molimauina i nei aso. Ua avea ia tofiga ma ala ua so’ona fai ai le pule ua latou maua. A o Iesu Keriso lava ia, o le ta’ita’i na ia fa’atupu le filemu i mafutaga a tagata ua vevesi. Na ia fa’atupu le mautinoa i loto o tagata ua lē mautonu ma ua masalosalo. Ia avea pea Iesu e fai ma uō mamae i lo tatou ola, e tausoaina la tatou savaliga i lenei lalolagi.

Tatalo: Fa’asino mai ou ala matou te auauna atu ai i lau Afio, Amene!

Aso Tofi – Aokuso 21: “Fa’ata’oto i tagata mautotogi”

Tusi Faitau – Luka 20: 1-26 (Parable of the tenants)

Matua – ff. 13-16: *“Ona fai ane ai lea o le ali’i e ona le tovine, Se a se mea ou te faia? Ou te auina atu lo’u atali’i pele; atonu latou te ava mai ia te ia. A ua iloa atu o ia e tagata galulue i vine, ona latou fetautalatala’i ai lea, ua fa’apea ane, O le suli lena, ina tatou fasioti ia te ia, e maua ai le fanua mo i tatou. Ua latou tuli ia te ia i tua o le tovine, ma latou fasiotia. Se a fo’i le mea e faia ia te i latou e le ali’i e ona le tovine? E alu atu ia ma fa’auma ia tagata galulue i vine, e tu’u atu fo’i le tovine i nisi tagata.”*

O lo tatou vala'auina mai le Atua, e tofu lava le tagata ma le galuega o loo galue ai. O le amana'iaina e le Atua o le tagata fa'atauva'a, ina ia aogā o tatou aso i lenei lalolagi. O le avea ma ta'ita'i o ni galuega, e le'o se galuega e faigofie lona fa'atinoina. O taimi ua solo lelei, o taimi fo'i e feagai ai ma fa'afitauli. E ui lava i tofiga ua fa'aeaina ai so tatou fa'atauva'a, ua fai ma ala e faigofie ai ona ofi mai ai fa'afitauli. O le upu moni, ua lē toe faigofie nei aso ua tatou i ai. Pei ona tatou molimauina ta'ita'i o faigamālō, aiga, nu'u ae maise Ekalesia. O nisi o ta'ita'i ua so'ona fai le pule ona o tofiga mauualuluga, ona galo lea o le manuia mo tagata lautele. A o meaalofa ia a le Atua na foa'i fua mai mo i tatou, ina ia faia ma fa'autauta ma le loto mauualo. O le fe'au taulogologo a le Talalelei, o le Atua o le fa'amasino mo tagata uma. Pau la tatou galuega, o le fa'atino o tatou tiute ma faiva ua vala'auina ai i tatou. Ua na'o le Atua e silafia mea uma tatou te faia, ma ia tau i lo tatou ola ofoina mo ia ma lona finagalo i so'o se ala.

Tatalo: Fa'amalamalama ou ala matou te faatino ai lou finagalo, Amene!

Aso Faraile – Aokuso 22: “O se atali'i o ai le Keriso?”

Tusi Faitau – Luka 20: 27 - 21: 4 (*Whose son is the Christ?*)

Matua – ff. 41-44: *“Ona fetalai atu lea o ia ia te i latou, “Pe fa'aapefea ona fai mai tagata, o le Keriso o le Atali'i ia o Tavita? Aua ua fai mai Tavita lava i le tusi o Salamo, Na fetalai atu le Ali'i i lo'u Ali'i, Ina nofo ia oe i lo'u itu taumatau, se'ia ou faia e ua fai oe mo latou fili ma mea e tu ai ou vai. O lenei, ua ta'ua o ia e Tavita o lona Ali'i, pe fa'aapefea ona fai mona atali'i?”*

O faiga a le Atua e faigata ona malamalama i manatu o le tagata. O manatu fo'i o le tagata e le'o le finagalo lea o le Atua. O le fanau mai o Iesu e ala mai iā Maria le taupou, o le ala mauualo na uia e le Atua e fanau mai ai le Mesia ma le Fa'aola mo le lalolagi. O le molimau a le 'au su'esu'e o le Feagaiga Fou e uiga iā Iesu, o lo'o taumafai e fa'amatala Iesu ma lona tupu'aga i le lalolagi. E pei o le molimau a Luka i le faitauga o lenei aso. O vavega na ia faia, ua tūmati'e i le Talalelei ona o galuega e lē mafai e se tagata ona fa'atino. E ui lava i le ofoofogia o ana galuega, a e na faigata ona taliaina e nisi o ia o le Alo o le Atua.

O fuafuaga a le Atua i le ola o le tagata, e taunu'u lava i lona taimi tataua ua ia finagalo ai. O le poto ma le atamai, o meaalofa a le Atua ua tu'uina mai i le lalolagi; e sa'ili e le tagata ina ia maua le lumana'i manuia. O le fa'amoemoe, ia ta'uleleia so tatou fa'atauva'a pe a 'ausia matātī'a mauualuluga i tulaga o a'oga. A e tasi lea o vaivaiga o lo'o feagai pea ma le tagata i lenei fo'i vaitau. Ua maua le poto ma le atamai, a e ua leai se fa'autauta ma galo ai le Atua e ou mea uma lava. Ua avea lea ma ala e sa'ili ai vi'iga o le tagata i galuega ua fa'atino. Ae le o le finagalo lea o le Atua mo i tatou.

Tatalo: Fa'afetai i lou amana'iaina o so matou fa'atauva'a, Amene!

Aso Toona'i – Aokuso 23: “Fa'ailoga o le i'uga o tausaga”

Tusi Faitau – Luka 21: 5-38 (*Signs of the end of the age*)

Matua – ff. 32-33: *“Simona e, Simona e, fa'auta, ua mana'o tele Satani ia te outou, ia lulu ia te outou pei o le saito, a ua ou fa'atoga mo oe, ina ne'i mavae lou fa'atuatua; a o oe fo'i, pe a liua mai oe, ona e fa'amalosī ai lea i ou uso.” Ua fai mai o ia iā te ia, “Le Ali'i e, ua ou sauni ta te ō fa'atasi ma oe i le fale puipui atoa ma le oti.”*

O le saunoaga a le Ali'i ua na silafia loto o ona so'o ua atuatuva'e. O le tali a Simona na iloa ai ua lē mautonu ona manatu, a o sauni Iesu e tali i tīgā o le oti. Ua silafia e Iesu, ua taumafai Satani e lūlū i manatu ma lagona a ona so'o. E ui i le tele o aso na o latou mafuta ai, a e na faigofie lava ona ofi le fili ma taumafai e liua loto talitonu o so'o o Iesu. A o le gasologa masani lea o le soifuaga o lo'o tatou i ai nei. O a lava mafutaga ua lelei ona tatou faia, e telē le avanoa e mafai ai ona ofi mai le fili. Ona fai lea ma ala e mou ai lagona lelei ma manatu ia maopoopo a tatou mafutaga. E i ai lava fo'i fa'aailoga tatou te iloa ai mea e tutupu i le gasologa o lenei soifuaga. O le fesuia'iga o tala i le tau, a o le gataifale fo'i i le sua mai ma le toe mou atu. A e ua fa'amanatu e Iesu i ona so'o, ia mau pea le to'ovae o le fa'atuatua i le Atua. O a lava faigata e feagai ma lo tatou ola i lenei lalolagi, lafo i le Atua lo tatou ola mautinoa.

Tatalo: Fa'amalosia pea e lau Afio i matou i taimi e lē mautonu ai o matou lagona, ma tau fa'avaivai ai le ola fa'atuatua ona o mea e tutupu, Amene!

FA'AMALOSI'AU (ENCOURAGEMENT)

Aso Sā – Aokuso 24: “Fa'amalosi i ē loto vaivai”

Tusi Faitau – 1 Tesalonia 5: 12-18 (*Encourage the disheartened*)

f. 14: “Matou te ‘ai’oi atu fo’i ia te outou, le ‘au uso e, ia outou apoapoa’i atu i e amio fa’atalanoa, ia fa’amafanafana i e loto iti, ia fesoasoani i e o vaivai.”

Ua tatou taunu'u mai i le masina lona 8 o lenei fo'i tausaga 2025. Ua tulata i le si'ui o galuega fa'agasolo ma le fegāsoloa'i o tatou tagata e fa'atino o tatou faiva. Ua tuana'i atu nisi o faigata o le ola na feagai ma i tatou o lenei tausaga. A o le autū o lenei vaiaso, o le **Fa'amalosi'au** mo i tatou uma. I le tau fa'amae'a ai o galuega fa'atino o lenei fo'i tausaga ma lo tatou vala'auina. O upu a le Aposetolo o Paulo i Tesalonia e fa'amalosi i le 'au fa'atuatua, ia fesoasoani i ē ua vaivai ma ia tatalo pea i le Atua e lē aunoa. O le fa'amanatu a le matua nau alofa i ē ua talia le Atua ma lona finagalo, e ala iā Iesu Keriso. O le galuega a le Aposetolo na vala'auina ai e le Atua, o lona fa'aailoa mai lea o le finagalo o le Atua ma ofoina le fesoasoani i ē o loo mana'omia. A o tatou aga atu i le fa'ai'uga o lenei tausaga, ia o tatou faia galuega fesoasoani mo nisi o loo mo'omia le fesoasoani. Tasi lea o misiona e aofia ai tagata uma i lona fa'atinoina. O le fa'aavanoaina o tatou taimi e faia ai galuega alofa mo nisi, o le finagalo lava lea o le Atua ua tatou faia. O ai lava o loo feagai ma so'o se fa'afitauli o le ola, ia tu'u atu o tatou tau'au e fesoasoani iā i latou. Ia maua pea lo tatou ola fetausia'i lelei ma le nofo fealofani. O le ola lena fa'a-Keriso e pei ona fa'amanatu mai e le Aposetolo. O le tatou faia o le finagalo o le Atua, o le moni lena o la tatou auunaga i le Atua ma lona finagalo.

Tatalo: Le Atua e, ia manino la matou va'ai i ē o mafatia i lenei soifuaga ina ia mafai ona matou fesoasoani i o latou mafatiaga, Amene!

Aso Gafua – Aokuso 25: “Fa'amafanafana i lo'u nu'u”

Tusi Faitau – Salamo 24: 1-10 (*Comfort my people*)

Matua – ff. 1-2: “O le lalolagi ma mea ua tumu ai o a le Ali'i ia; o le atu laulau ma e o nonofo ai. Aua o ia lava na fa'avaeina ai i luga o le sami, ma fa'atau ai i luga o vaitafe.”

O mea uma ua tatou maua i le Fofoaga, o galuega mamana a le Silisili'ese. O lona matagofie fo'i, ua fa'atumauiua lea i le lalolagi uma. O upu ia ua fai ma tatou matua, o upu fa'amalosia i le nu'u o le Atua. E fa'alototele ia i latou i taimi o faigata ma le ola pologa i nu'u 'ese. O le alaga o le loto e taula'i pea le va'ai i le Atua, i aso uma o lenei soifuaga. A o'o ina lütia i tatou i Puava, o le Atua lava e to'a i ai le au peau. O le upu moni, e tutupu pea matagi i liu o le va'a. Ua lē toe faigofie nei aso ua tatou i ai. Ua ala ese'ese mai fo'i le tele o fa'afitauli ua a'afia ai lo tatou ola. Ua avea ma ala ua fa'avaivai ai lo tatou ola mafuta i le Atua ma fa'atuatua i lona mafuta mai. A o upu a le fai Salamo, o le Atua e maua ai lo tatou fa'amafanafanaga sili. E lē fesiligia fo'i lona mafutaina o i tatou i aso uma o lenei soifuaga. O le fa'avae o le ola i le lalolagi ma mea uma ua tatou maua i lana fofoaga. O a mea faigata o le ola e fetaia'i ma i tatou i le ala, ia manatua, o le Atua e maua ai lo tatou mapusaga filemu i aso faigata.

Tatalo: Foa'i mai le lototele e mafai ai ona matou fetaia'i ma fa'afitauli o lenei soifuaga, Amene!

Aso Lua – Aokuso 26: “Fa’aa’oa’o i le loto maulalo o Keriso”

Tusi Faitau – Filipi 2: 1-11 (*Imitating Christ's humility*)

Matua – ff. 3-4: *“Aua ne'i faia se mea e tasi ma le finau vale, ma le mitamita fua; a ia ta'itasi outou ma manatu ma le loto maulalo, ua sili nisi ia te ia. Aua ne'i ta'itasi ma va'ava'ai i ana lava mea, a ia ta'itasi ma va'ava'ai i mea a isi.”*

O nisi ia o upu fa'amalosia a le Aposetolo o Paulo mo le Ekalesia i Filipi. A o i ai Paulo i le falepuipui, na auai le Agaga o le Ali'i i taimi o feagai o ia ma faigata. O le fa'amalosia o le Agaga i lana auauna, na ia tusi atu ai i le 'au fa'atuatua i Filipi. O le feau fa'amalosia mo le Ekalesia, ia faia mea uma i le loto maulalo ma le olioli. Ia tumau pea le ola i a'oa'oga a le Ali'i e pei na tala'iina atu. O le fa'amanatu a le matua moepō, na ia polili ai le fa'atuatua o le Ekalesia i Filipi. E feagai pea le tagata ma faigata o le ola, a e lē avea ia fa'afitauli e fa'avaivai ai le ola talitonu i le Atua. Ia tumau pea i le Atua ma lafo ia te ia lo tatou ola mautinoa, ona tatou maua lea o le lototetele e tali ai i faigata pe a o'o mai.

Tatalo: Le Tamā alofa e, ia fa'amalosia pea e lou agaga o matou loto ina ia mafai ai ona fa'asoa atu lou filemu i taimi faigata, Amene!

Aso Lulu – Aokuso 27: “Aua le fa’avaivai” (Do not be discouraged)

Tusi Faitau – Teuterenome 31: 1-8

Matua – f. 8: *“O le Ali'i fo'i, o ia na te savali i ou luma; lua te fa'atasi ma ia, na te le tu'una oe, na te le lafoa'i ia te oe; aua e te fefe, aua fo'i e te mata'u.”*

O Mose o le auauna ua iloga ona tala i lana auaunaga i le Atua. O le ta'ita'i iloga ia Isaraelu. E ui i lana auaunaga ma lona ola talitonu i le Atua, e le'i avea lea ma ala na te ulufale ai i le nu'u folafolaina. Auā o le finagalo o le Atua, e le'o manatu ia o le tagata.

O se fa'amanatu tāua fo'i lea mo i tatou le 'au Kerisiano uma. O le upu moni, e lē tumau ai pea mafutaga ma i latou e pele i o tatou loto. E i ai taimi e tatou te savalia ai ala tīgā o le oti, ona mafatia lea o lagona i le fa'anoanoa. A o upu o le tatou matua, o a lava mafatiaga e feagai ma i tatou; e lē tu'ulafoa'iina e le Atua ona tagata. Aua fo'i le avea le mafatia o tatou lagona i le fa'anoanoa, ma ala e vaivai ai lo tatou fa'atuatua i le Atua. O le gasologa masani lea o lenei

soifuaga, tatou te lē i ai pea i lenei lalolagi. Ua saunia e le Atua lo tatou nu'u i le ola e fa'avavau, o le so'otaga lena e toe maua ai mafutaga ma i latou ua mua-mua atu. Tatou savavali pea i luma ma fa'amalolosi, e fai le Atua ma ta'ita'i-tama i lo tatou ola i aso uma o lenei soifuaga e lē tumau.

Tatalo: Le Ali'i e, fa'amalosia mai pea Lou Agaga mo i matou, Amene!

Aso Tofi – Aokuso 28: “O le Atua e lavea'i” (*The God who rescues*)

Tusi Faitau – Salamo 18: 1-19

Matua – f. 3: *“Ou te vala'au i le Ali'i, e tatau ona vi'ia o ia; o le a fa'aolaina ai a'u i e ua ita mai ia te a'u.”*

O mea uma i le lalolagi o a le Atua ia. O loo fa'asoa mai pea afioga a le Atua i tala e fa'amalosia ai la tatou savaliga i lenei fo'i vaiaso. O upu a le fai Salamo e fai ma fa'amanatu iā i tatou, a o tatou i ai i lenei vaitau lē faigofie o le ola. I le tele o fa'afitauli e tutupu pea, a e o loo tatou maua pea le mapusaga filemu ona o le auai mai o le Atua. O lagona o le fai Salamo ua fa'aailoa mai ai iā i tatou, o a lava faigata e feagai ma le tagata, e lē mafai ona tu'ulafoa'i tatou e le Atua. O lona alofa e lē liliu ma le tagata e ui ina galo i le tagata le Atua, a e tūmau pea o ia iā i tatou. Ua fa'afia ona tatou o ese mai le Atua? O se fesili e fa'atupu manatu ma mafaufau ai le tagata fa'atuatua i lona vā feagai ma le Atua. E lē tonu pea se tagata i ona lava manatu. E i ai taimi e ese'ese ai o tatou lagona, ona tutupu lea o maseiga i lo tatou vā nonofo ai. A o upu a le fai Salamo, aua ne'i galo le Atua i mea uma tatou te faia. Mafuta pea i le Atua e ala i le tatalo, ina ia mausalī lo tatou vā feso'ota'i. Ona lē fesiligia lea o lona auai mai ma lavea'i lo tatou ola a o tatou i ai i lenei soifuaga.

Tatalo: Vi'ia lau Afio, ona o lou lē tu'una o matou lau fanau i aso uma o lenei soifuaga lē faigofie, Amene!

Aso Faraile – Aokuso 29: “Mo ia na te mafaia” (*Now to him who is able*)

Tusi Faitau – Efeso 3: 7-21

Matua – ff.16-17: *“Ina ia foa'iina ia te outou e tusa ma le faula'i o lona mamalu, ia fa'amalosia outou e le mana e lona lava Agaga i le tagata i totonu, ia nofo mau fo'i o Keriso i o outou loto i le fa'atuatua; ina ia maua'a ma fa'avaeina outou i le alofa.”*

O le avea ma suli va'ai o le Atua i le lalolagi, o le galuega e lasi ona fa'afitauli. O a lava lo tatou taumafai ia lelei le galuega a le Atua, e i ai lava fo'i faitioga e lagona pea. O le avea ma so'o upu i le vā o le Atua ma tagata, e lē faigofie lona fa'atinoga. E fetaia'i pea le 'aufaigaluega ma lu'itau o le galuega, a o le Atua e tū i matagi 'olo e tautai folau la tatou auaunaga. Ua tele fa'afitauli tatou te molimauina i lenei vaitau o le galuega a le Atua. Ua fai le galuega a le Atua e sa'ili ai le tamaoiga o nisi ma taumafai e fāōa le vi'iga o le Atua. Peita'i, o le amana'iaina o i tatou e le Atua e ala i lo tatou vala'auina, ia manatua pea lona tāua. O le alofa tunoa o le Atua, ia avea lo tatou ola e tautua ai lona finagalo i le lalolagi. E ui lava i so tatou vaivai ma fa'atauva'a, e fa'aaogaina pea i tatou e le Atua i so'o se ala. Ia faia galuega ma lo tatou vala'auina ma le fa'amaoni, lototele, filigā ma ia alofa i le Atua.

Tatalo: Le Atua e, fa'afetai i lou amana'iaina o so matou fa'atauva'a e fai ma ave fe'au o lau Talalelei, Amene!

Aso Toona'i – Aokuso 30: “Fa'amalosi'au e ala i le upu”

Tusi Faitau – Galuega 15: 30-35 (*Encouraged through the word*)

Matua – f. 35: *“O Paulo fo'i ma Panapa ua nonofo i laua i Anetioka, ma isi fo'i e to'atele, ua a'oa'o ma folafola atu le afioga a le Ali'i.”*

O le galuega tala'i a le Aposetolo, na logo ai le lalolagi uma i le Talalelei a le Atua. O lona soifua galue na ofoina atoa i le Atua, e tautua ai lona finagalo mo le lalolagi uma. O upu e o fa'atasi ma galuega fa'atino, ina ia mafai ona olaina e tagata uma. Peita'i o le Atua ma ana fuafuaga, o ana afioga e avea ma fa'amalosi mo le tagata i aso uma. O lona fa'aali mai i ona tala i le Tusi Paia, e fafagaina ai pea lo tatou ola fa'atuatua. E i ai le malosi'aga fa'apitoa i upu tatou te fa'alogo ai pea. O le fa'amalosi lelei mo loto ma agaga o tagata, ina ia o fa'atasi ma galuega a le tino. Ia avea afioga a le Ali'i, e fai ma vai fofō i o tatou loto mafatia, pe a fesouaina lo tatou ola i peau laga vale o fa'afitauli.

Tatalo: Fa'amatala loto e lau Afio iā i matou le tāua o au afioga, ina ia o matou iloa lona feso'ota'i mai, Amene!

E AUNOA MA SE IGOA (WITHOUT A NAME)

Tagata le fa'aigoaina (*Unnamed people*)

Aso Sā – Aokuso 31: “O toa fa'alēiloga”

Tusi Faitau – 2 Tupu 4: 8-17 (*Unsung heroines and heroes*)

Matua – ff. 12-13a: *“Ua fai atu o ia ia Kiasi lana auauna, Vala'au ia i lena tama'ita'i Sunema. Ona vala'au lea o ia ia te ia, ona tu mai ai lea o ia i ona luma. Ona fai atu lea o ia ia te ia, Fa'auta, ua tigaina oe ona o i maua i nei sauniga uma, se a se mea e faia mo oe?”*

E tāua o tatou igoa i so'o se tagata. O le ā lona uiga? O le igoa e iloa ai lo tatou ta'u, o lo tatou tupu'aga ma le fa'asinomaga. O le igoa o se mea e fa'asoa ai tagata uma o le lalolagi. Ua fa'ailoa mai e le tatou matua, le fafine Sunema ma le galuega na ia faia. O le fesili mo se tau'i e faia mo ia, ona ua tigaina i sauniga uma na ia tapenaina. A o tatou faia ni mea lelei mo aiga, nu'u fa'apea Ekalesia, ona ta'u lea o tatou igoa ona o le fa'aeaea sa tatou faia. E fa'apea fo'i pe a o tatou faia ni mea fa'aletonu, o tatou igoa lava e ta'u. O lona uiga, e tāua o tatou igoa i lo tatou ola i lenei lalolagi. Ia tatou fa'atāuaina o tatou igoa ma ia faia pea mea sili, ona maua lea o lo tatou ta'uleleia. O lo tatou ta'uleleia ma le ta'uvalea, o lo'o i o tatou lava lima.

Tatalo: Fa'amanatu mai e lou agaga, le tāua o matou igoa i lenei soifuaga ua matou ola ai, Amene!

Aso Gafua – Setema 1: “Tala e le masani ona fa'amatalaina”

Tusi Faitau – 2 Tupu 5: 1-5 (*A story seldom told*)

Matua – ff. 2-3: *“Na o atu 'au a Suria, na latou au mai fo'i mai le nu'u o Isaraelu le tasi teine itiiti o le taua, ua fai ma auauna a le avā a Na'amanu. Ua fai atu o ia i lona matai tama'ita'i, Se anoa! ana i ai lo'u ali'i i le perofeta o i Samaria, po ua fa'ate'aina e ia lona lepele.”*

E tāua lo tatou malamalama i lo tatou talafa'asolopito. O lo'o fa'ailoa ai mea na tutupu i le amataga ma nei aso ua tatou i ai. O le talafa'asolopito o le Fa'aolataga e ala iā Iesu Keriso, ua manino ma malamalama lona fa'aali mai.

O lo'o atagia fo'i i tala fa'amatala o le Feagaiga Tuai ma le Feagaiga Fou. Ua fai pea ma fa'amanatu mo i tatou i aso ma taimi o lenei soifuaga. E tatau fo'i ona atagia le faia o le galuega alofa i totonu o tatou mafutaga. O le fesili, e fa'aapefa ona tatou faia le galuega fa'aola mo nisi? E lasi manatu ma lagona o le tagata ma le fa'asoa i le fesili. A e e mafai ona tatou faia le galuega fa'aola mo nisi, i le galulue fa'atasi, ia tasi le loto ma ia taula'i i le Atua la tatou va'ai. O le tatou faia o galuega alofa i o tatou tua'oi, o le Atua lava lea ua tatou alolofa i ai.

Tatalo: Ia matou maua le lotogatasi e faia ai galuega alofa mo isi, Amene!

Aso Lua – Setema 2: “O tala fou, faitau uma e uiga i ai!”

Tusi Faitau – Mareko 1: 29-31 *(Extra, extra, read all about it!)*

Matua – ff. 30-31: *“Sa ta'oto ai fo'i le tinā o le avā a Simona i le ma'i vevela; ona latou ta'uina atu loa lea o ia iā te ia. Ona sōsō atu lea o ia iā te ia, ua tago ifo i lona lima, ua fa'atū iā te ia i luga; ona mavae loa lea o lona ma'i vevela, ona auauna lea o ia iā te ia.”*

E tele vavega na faia e Iesu i lona fo'i vaitau, a e sa faigata lava ona taliaina e tagata. O ma'i na ia fa'amālōlō fa'aapea fo'i lona fa'atūina mai o ē ua feoti. O le finagalo o lona Tamā na afio mai ai e fa'atino mo le lalolagi. E ui i le te'ena e tagata, e le'i fa'avaivai pe taofia ai le galuega fa'aola a Iesu Keriso. Na faia lana galuega ma le loto atu i lona Tamā, lea lava na taunu'u ai le manuia. O tala tusia o le Ali'i ma lana galuega i le lalolagi, e tāua lo tatou faitau pea i ai ina ia malamalama. Ia su'esu'e manino i le uiga moni o lana galuega e pei na afio mai ai i le lalolagi. O lona agaga e fesoasoani mai i o tatou tagata, e fa'amatala i o tatou loto ina ia maua le manino. O lana galuega alofa i le lalolagi, lea ua fa'aolaina ai i tatou uma ona o lona alofa tunoa. O a lava ma'i o le tino e a'afia ai i tatou, ua na'o ia lava le foma'i sili i o tatou mafatiaga.

Tatalo: Ia taulau pea i lau Afio lo matou fa'atuatua , Amene!

Aso Lulu – Setema 3: “Mo le ‘au pa'ia uma” (For all the saints)

Tusi Faitau – Mareko 12: 41-44

Matua – f. 43: *“Ona vala'au atu lea o ia i ona so'o, ua fetalai atu ia te i latou, “E moni, ou te fai atu ia te outou, o mea a lena fafine mativa ua oti lana tane, ua lafo i le mea e teu ai tupe, ua sili ia i a latou uma na lafo i ai.”*

O lo tatou ola tautua i le Atua i taulaga, tasi lea o vaega tāua o la ta auaunaga. O le foa'i ma le loto ua malie, e sili lea i fofoga o le Atua ma lona silasila mai. A o ona manuia na ia foa'iina mai, e tatau fo'i ona tatou ofoina mo ia ma lana galuega. O le soifua fa'atōina mo le Atua, ua masani ai le tagata Samoa mai lava i le amataga. O le ālāfua na fa'ata'oto e tua'ā ua afe moe le malaga, ina ia tatou solisoli mulivae ai i a latou galuega. A e a nei aso ma ona suiga? Ua mua'i fa'atōina le 'oa mo tatou mana'oga, a e ua ave i le Atua mea ua totoe. Ona sa'ili lea o so tatou alofaga ina ua lē lava le fa'asoa. O a mea ua tatou maua i o tatou lima, ia ofoina mo le Atua ma lana galuega. Auā e sili le manuia o lē foa'i, nai lo'o lē na te talia.

Tatalo: Ia matou fiafia i le soifua foa'i e tautua ai lau galuega, Amene!

Aso Tofi – Setema 4: “O fuafuaga faataotooto e sili ona lelei”

Tusi Faitau – Mareko 14: 1-9 *(The best laid plans)*

f. 9: *“E moni, ou te fai atu ia te outou, o nu’u uma lava i le lalolagi e tala’iina ai lenei tala lelei, e ta’ua ai fo’i lenei mea ua fa’ia e ia, e fa’amanatu a’i ia te ia.”*

O le fesili mo le ‘au fa’atuatua uma, o le a le Talalelei? O le finagalo o le Atua mo le lalolagi, ina ia fa’asaoina i tatou uma. O lona alofa tunoa mai mo i tatou, na ia lē fa’atoetoe muliola a e ua ofoina mai Iesu Keriso e lavea’i i tatou. O le Talalelei mo le lalolagi uma, ina ia pupula lona malamalama i nu’u uma ma le atu laulau. Ua vala’auina i tatou ina ia o tatou ō e fai nu’u uma ma so’o, e ala i le fa’a’ailoa atu o le Atua ma lana Talalelei. O lona alofa tulituliola pea mo le tagata, ina ia lelei pea lo tatou vā feso’ota’i ma lo tatou Atua. O lana fa’atōfālā’iga mo le lalolagi, lea na avea ai Iesu Keriso ma Talalelei mo i tatou uma. Ia tatou fa’a’ailoa atu pea i le lalolagi le matagofie o le Talalelei a le Atua, ina ia maua pea nisi agaga mo ia ma lona mālō.

Tatalo: Ia matou faia galuega uma ma le loto atu i lau Afio, Amene!

Aso Faraile – Setema 5: “O mea loloto natia” (*Hidden depths*)

Tusi Faitau – Mareko 14: 12-16

Matua – ff. 13, 14: *“Ona aau atu lea e ia o ona so’o e to’alua, ma na fetalai atu ia te i laua, “Ina o ia oulua i le ‘a’ai, tou te fetaia’i ai ma le tagata o ave le vai omea, lua te mulimuli atu ia te ia; e iloga fo’i le mea na te ulufale atu i ai, fai ane ia i le matai o le aiga, O ifea lo’u afeafe, ou te ‘ai ai le paseka ma o’u so’o?.”*

O le savalia e Iesu o le ala i le satauro ma lona maliu, na ia saunia ai le talisuaga mulimuli ma ona so’o. O le fa’amoemoe, ina ia fa’a’ailoa i ona so’o ua latou i ai i le taunu’uga o lana galuega. Na latou mafuta i aso e tele ma molimau i vavega na ia fa’ia, ia fa’apea fo’i ona latou molimau i lona maliu. O le finagalo o le Ali’i o Iesu e mafuta ma ona so’o i se nofoaga e lē i loa e nisi. E ma’eu a le alofa o le Atua mo le lalolagi, ma lona auina mai o lona Alo e suitulaga i le tagata. Na uia ala maulalo, a e ia fa’aeaina i lona alofa tunoa. O lona soifua na ofoina atoa ma e togiolaina le lalolagi agasala. O lona alofa lea o lo’o manatua pea e le tagata, i le fa’amanatuina o le paseka i le fa’amanatuga. Ia fai lea ma fa’amanatu lelei mo i tatou, le tāua o lona maliu ua tatou maua ai le ola atālī.

Tatalo: O lou maliu Keriso e ui magalo ai le tagata agasala, Amene!

Aso Toona’i – Setema 6: “O le ā se taua o i le igoa?” (*What’s in a name?*)

Tusi Faitau – Ioane 20: 1-10

Matua – f. 2: *“Ona momo’e lea o ia, ua alu ia Simona Peteru ma le tasi so’o sa alofaina e Iesu, ua fai atu ia te i laua, “Ua latou ave’eseina le Ali’i i le tu’ugamau; matou te lē iloa fo’i le mea ua latou tu’uina ai o ia.”*

O le manumālō o le Iesu i le tu’ugamau ma le oti, na laga ai le fa’atuatua o le tagata i le Atua o lo’o soifua pea. Ua lē mautonu manatu o le ‘ausoo ina ua logo tala i le mea ua tupu iā Iesu. Ua latou fesiligia ma ua lē talitonu i le mea na va’aia. A o le Atua ma lona fa’aali mai, e faigata ona malamalama i le tagata. O le toe tū mai o Iesu, o le atoaga lea o le fa’atuatua o le tagata talitonu i le Atua. Pe a o tatou manatu i galuega a le Atua, e mālō o tatou loto. O le afio mai o Iesu ma ia aumai le fa’aolatagata mo le lalolagi, ua tū mati’e i le Talalelei a le Atua. O Iesu Keriso na maliu i le satauro ma tanumia i le ele’ele, o lona toe soifua manumālō i le oti ma le tu’ugamau. Lea ua tatou mautofiga ai lona mālō e fa’avavau, e ala i le talia o ia i le salāmō ma le fa’atuatua fa’amaoni.

Tatalo: Ia avea le taulaga na saunia e Iesu ma sulu i o matou loto, Amene!

FAITAUGA MAILE 1 SAMUELU (1)

(READINGS FROM 1 SAMUEL)

Aso Sā Talalelei

Aso Sā – Setema 7: “Tautoga a Hana” (Hannah’s vow)

Tusi Faitau – 1 Samuelu 1: 1-18

f. 11: *“Ua ia tautō fo’i, ua fa’apea atu, Le Ali’i o ‘au e, afai e te silasila mai i le puapuga o lau auauna fafine, ma e manatu mai ia te a’u, a e le fa’agalogalo mai i lau auauna fafine, ma e foa’i mai i lau auauna fafine se tama tane, ona ou foa’i atu lea o ia i le Ali’i i aso uma o lona ola; e lē o’o fo’i se tafi i lona ulu.”*

O le vā feso’ota’i o le tagata ma le Atua, o talosaga molia i lea aso ma lea aso. O le auala o feso’ota’iga e maua ai le mafutaga e mo tagata uma. E avanoa fo’i mo taimi ma aso uma o lenei soifuaga. O le tautoga a le tinā o Hana i le Atua ma lona augani ai i le Atua mo se tama tane mo ia. E ui ina ulagia e tagata ona e lē mafai ona fanau, a e ua fa’aalia ai le silisili ‘ese o galuega a le Atua. O lana pule aoao i mea uma na ia faia, ma e finagalo lava o ia e taunu’u o tatou mana’oga e pei ona tatou feso’ota’i atu ai iā te ia. E tofu lava le tagata ma ona mana’oga. E lē tutusa uma fo’i mafua’aga tatou te tatalo ai i le Atua. O le upu moni, a lē taunu’u mea tatou te manana’o ai, ona tu’ua’ia lea o le Atua. Peita’i ua silafia e le Atua o tatou mana’o, o lo’o i lona taimi tatau ua ia finagalo e fa’ataunu’uina ai o tatou mana’o. ‘Aua ne’i fa’avaivai lo tatou mafuta atu i le Atua i aso uma e ala i tatalo. E tali mai lava le Atua i le aso ma lona taimi.

Tatalo: Ia faia lava lou finagalo, a e aua ne’i faia o matou loto, Amene!

Aso Gafua – Setema 8: “Tautoga ua fa’ataunu’uina” (A vow fulfilled)

Tusi Faitau – 1 Samuelu 1: 19-28

Matua – ff. 25, 27, 28: *“Ua latou fasi le tasi povi, ona avatu ai lea o le tama ia Eli... O le tama nei na ou tatalo atu ai; ua foa’i mai e le Ali’i ia te a’u le mea na ou fa’atoga atu ai ia te ia. O a’u fo’i ua ou tu’uina atu o ia i le Ali’i; ua tu’uina atu o ia i le Ali’i i aso uma e ola ai o ia; ona ifo ai lea o ia i le Ali’i i lea mea.”*

O le loto ua fa’amalieina i mea lelei ua faia e le Atua mo le tagata, e tatau lava ona fa’afetai i le Atua i lona alofa. A o lagona fa’agae’etia o le tinā ia Hana ma le tamā ia Eli, na faia ai le taulaga i le Atua ona ua tali a la tatalo. O le toe ofoina o le tama ua la maua i le Atua, o le tali atu ma le loto fa’afetai ma lagona ua me’eme’e ona o mea ua faia e le Atua mo i laua. O le vā feso’ota’i a le tagata fa’atuatua ma le Atua ua mausali i le talitonu. Ua tele tamaoauga o le Atua ua tatou maua ma tatou fa’aaogaina. O le gataifale ma le vao, ua maua fua ai mea e tausi ai lo tatou ola i le tino. O lona alofa ua fa’asafua mo le lalolagi uma, ina ia ola sa’oloto le tagata. Peita’i ua galo i le tagata ona fa’afetaia le Atua ona o mea ua tatou maua. Ua tatou ‘ae’ae lea manu ua ulu, a e galo ai le Atua o lē ou mea uma lava. Ia manatua le fa’afetai i le Atua i aso uma ma taimi uma.

Tatalo: Fa’afetai tele le Atua ona o lou fa’ataunu’uina o matou mana’o i ou taimi tatau ua e finagalo ai, Amene!

Aso Lua – Setema 9: “O le vala’au a Samuelu” (The call of Samuel)

Tusi Faitau – 1 Samuelu 3: 1-21

Matua – ff. 19-20: *“Ua tupu Samuelu, sa ia te ia le Ali’i, ma ua le mafai ia te ia ona i’u vale sina ana upu. Ua iloa e Isaraelu uma, e pau mai i Tanu e pau mai i Peresepa, ua fa’amaoni Samuelu e fai ma perofeta a le Ali’i.”*

O le vala’auina o Samuelu, o le fa’amoemoe o le Atua na fa’ata’oto mo ia mai lava i le amataga. E ui ina fa’atauva’a i le va’aiga a tagata, a e o le Atua e fa’aogaina le tagata i so’o se ala ua ia finagalo ai. O le vala’auina e le Atua, e ui mai i le ala e lē amana’iaina e le tagata. A o ala fa’atauva’a ia o lo’o sa’ili mai ai e le Atua le tagata e fa’aoga i lana galuega. Ua anoanoa’i tofiga ese’ese ua fa’aeaina ai i tatou i lenei fo’i vaitau. O nisi ua avea tulaga tofi ua fa’asausili ai i manatu ma ua lē iloa ai le vā ma nisi. A o tofiga ua tatou maua, e lē o ni tofiga e sa’ili ai ni o tatou lava vi’iga ma salusalu ai ni o tatou mamalu. O le Atua lava ia na vala’auina i tatou uma, e galulue ma faia lona finagalo i le lalolagi. Ia faia la tatou auunaga ma le loto atu i le Atua ina ia atagia ai lona finagalo.

Tatalo: Ia matou iloa ona faia galuega ma le loto atu i lau Afio, ina ia atagia lou finagalo i a matou fa’atinoga, Amene!

Aso Lulu – Setema 10: “E pei e fa’ataulāitu” (As if by magic)

Tusi Faitau – 1 Samuelu 4: 12-22

Matua – ff. 17, 18: *“Ua tali mai le na au mai le tala, ua fa’apea mai, ua sosola Isaraelu i luma o Filisitia, ma ua tele le fasi o le nu’u; ua maliliu fo’i ou atali’i e to’alua, o Hofeni ma Fineaso; ua avea fo’i le atola’au a le Atua. Ua o’o ina ta’ua mai e ia o le atola’au a le Atua, ona paū ai lea o ia i tua nai luga o le nofoa i tafatafa o le faitoto’a, ua gau lona ua, ua oti ai o ia, auā o le toeaina, ua mamafa fo’i ia. Na ia fa’amasino ia Isaraelu i tausaga e fagafulu.”*

O ala o le tagata e le’o le finagalo lea o le Atua. Pe a tatou manatu i le mafutaga a Isaraelu ma le Atua, o se mafutaga le’i faigofie. O le nu’u e fesiligia pea le Atua pe a fetaia’i ma faigata, a e lē talituālimaina e le Atua le fa’ameo ma le oi o ona tagata. E saunia e le Atua auala e fa’asaoina ai ona tagata mai faiga lē alofa a isi mālō. A e mafua fo’i ona feagai ma faigata, o le nu’u e lē usita’i i le vā feagai ai ma le Atua. E a’oa’iina pea e le Atua Isaraelu, ona ua fultua ma ia i le latou mafutaga. O le fa’asaoina e le Atua o lona nu’u mai lima o Filisitia, na iso ai lagona o le ‘autau a Filisitia. A o auala e saunia e le Atua mo le tagata, e faigata ona iloa e se tagata. Ua na’o le Atua lava e mafaia mea uma i lona mana silisili’ese. E feagai pea i tatou ma lu’itau o le ola. E faigata fo’i ona tatou sa’ili ni auala e fa’asaoina ai i tatou. A e ia tu’utasi lo tatou fa’amoemoega i le Atua, e saunia auala e fa’asaoina ai lo tatou ola.

Tatalo: Ia fa’alagolago pea i lau Afio, e te saunia auala e lavea’iina ai lo matou ola mai le fili o lenei lalolagi, Amene!

Aso Tofi – Setema 11: “Ua toe fo’i tagata i le Atua”

Tusi Faitau – 1 Samuelu 7: 1-12 (The people turn back to God)

Matua – f. 3: *“Ua fai atu Samuelu i le aiga uma o Isaraelu, ua fa’apea atu, Afai tou te fo’i atu i le Ali’i ma o outou loto atoa, ina tu’u ese ia o atua ese ia te outou atoa ma Asaira, ma sauniuni atu o outou loto i le Ali’i, na o ia tou te auauna i ai; ona lavea’i lea o ia ia te outou ai lima o Filisitia.”*

O le Atua ma lona alofa e lē liliu mo le tagata. E tele taimi o le soifuaga tatou te o ‘ese ai ma le Atua, a e na te le’o tu’ulafoa’iina i tatou ina ia fano i le

agasala. O lona alofa sa'ili ma lona taumulimuli pea iā i tatou, ina ia mautinoa lo tatou saogalemu. Ua lē masino le mau fa'afitauli i lenei vaitau ua tatou i ai. Ua fai lava fo'i o tatou loto i nisi o taimi, a e galo le Atua ma lana musumusuga. A o upu a le tatou matua, ia fo'i i le Atua ua na'o ia e tatau ona auauna i ai. O a lu'i tau ma fiaiaga o le lalolagi ua tatou molimauina, aua le avea ma ala tatou te o 'ese ai ma le Atua. Ia manatua pea le Atua ma ia taula ia te ia lo tatou ola auauna, ona mautinoa lea o lo tatou saogalemu i mea e tutupu i le ola.

Tatalo: Ia taula pea i lau Afio lo matou ola auauna, e faigofie ai a matou galuega e fa'atino, Amene!

Aso Faraile – Setema 12: “Usita'ia lapata'iga” (Heed the warnings)

Tusi Faitau – 1 Samuelu 8: 1-22

Matua – ff. 19-20: *“A e le mafafai le nu'u ona fa'alogo i le upu a Samuelu, ua latou fai mai, E leai lava, a e fai lava so matou tupu; ia pei o nu'u uma i matou, ia fa'amasino mai lo matou tupu ia te i matou; ia alu atu fo'i o ia i o matou luma, ma ia tau i o matou taua.”*

O le tagata ma ona manatu e lē tumau i se mea e tasi. E femoumoua'i ma lē mautonu i taimi uma. Ua manino mai i le tatou matua, le ola o le tagata ua fesiligia le Atua ma lana ta'ita'iga. Ua fa'alagolago ma le mana'o e fai so latou tupu, a e galo ai le Atua o le tupu sili ia o le lalolagi uma. E ui i le taumafai atu o Samuelu e fa'ailoa ia i latou le finagalo o le Atua, peita'i ua musuia manatu o le nu'u e talia. E lē sologa lelei pea aso o lo tatou ola i le lalolagi nei. Tatou te naunau fo'i ia faia o tatou lava mana'oga. Ona tutupu mai lea o fa'afitauli, ona toe manatua lea o le Atua ma lana ta'ita'iga. Ia manatua pea, o le Atua e pule aoao i le lagi atoa ma le lalolagi. Ua tau lē maua se filemu i le lalolagi i nei aso, ona ua fai lava ta'ita'i o mālō ta'itasi. O le fa'amanatu a le Talalelei, ia faia fa'ai'uga tatau mai le Atua, ina ia manuia tagata nu'u. O le finagalo lena o le Atua, ina ia tatou maua le nonofo fealofani. Ia fai le Atua o ta'ita'i sili mo i tatou uma, ona manuia lea o le lumana'i.

Tatalo: Ia fai pea lau Afio ma ta'imua sili i lo matou ola, Amene!

Aso Toona'i – Setema 13: “Ia tasi!” (Be the one!)

Tusi Faitau – 1 Samuelu 9: 15-10:2

f. 21: *“Ona tali atu ai lea o Saulo, E le o a'u ea le sa Peniaminā, o le itu aiga aupito itiiti i Isaraelu, o lo'u aiga fo'i ua topito ona fa'atauva'a i aiga uma o le itu aiga o Peniamina? O le a le mea e te fetalai mai ai upu fa'apena ia te a'u?”*

O le tula'i mai o Saulo e fai ma tupu, na telē lona a'afiaga i lona vā ma tagata. Ua fa'au'uina o ia e le Atua e fai ma tupu e auala mai i lana auauna o Samuelu, ua avea lea ma ala ua ia va'ai mauualalo ai i nisi tagata. Ua galo iā Saulo o meaalofo ua ia maua e mai le Atua. E ui i lona tulaga mauualuga o le tupu, na pa'ū i faigata ma feagai ma fa'afitauli ona ua fa'amaualuga i ona manatu. O se fa'amanatu fo'i lea mo i tatou le fanau fa'atuatua a le Atua. E tele meaalofo sili a le Atua ua tatou maua. Ua tatou sa'a ai ma'a o mālīe i lenei lalolagi ua tatou i ai. Aua ne'i avea lea ma ala e punitia ai la tatou va'ai i nisi o lana fanau. Ia maua pea le loto fesoasoani ma ia alofa i ē o lo'o mana'omia le fesoasoani. Auā o mea uma ua tatou maua, ua maua i le alofa fua mai o le Atua i le lalolagi. Ia tatou fa'asoa atu meaalofo a le Atua ua i o tatou lima, i o tatou

tuā'oi o lo'o taumafai e sa'ili fesoasoani. Ona moni lea o la tatou auaunaga i le Atua, ma tautua lona finagalo i so'o se ala.

Tatalo: Ia matou fiafia e fa'asoa atu au meaaloa i o matou tuā'oi, Amene!

FAITAUGA MAI LE 1 SAMUELU (2) (READINGS FROM 1 SAMUEL)

Aso Sā – Setema 14: “Ua fouvale Saulo” (Saul rebels)

Tusi Faitau – 1 Samuelu 13: 5-15

Matua – f. 9: *“Ona fai ane lea o Saulo, au mai ia te a'u se taulaga mū ma se taulaga fa'afetai; ona fai ai lea e ia le taulaga mū.”*

O le tula'i mai o Saulo e fai ma tupu o Isaraelu, na iloga lona tula'i mai. A ua avea lea ma ala ua galo ai iā Saulo le finagalo o le Atua e ala i ana auauna. O le finagalo o le Atua na auala mai i lana auauna o Samuelu, peita'i, ua manumālō mana'o o Saulo ma ona manatu ae fa'atuana'i le finagalo o le Atua.

O tofiga ua valā'uina ai i tatou e le Atua, o lona amana'iaina o so tatou fa'atauva'a ma lona fa'aogaina o i tatou. E galo i le tagata le Atua pe o'o ina solo lelei pea aso o lo tatou ola. O nisi fo'i o taimi ua tutuli pea la tatou fa'alogi, i le musumusuga a le agaga o le Atua i mea e ao ona tatou faia. Ua fai lea ma matāvai o fa'afitauli e tutupu pea i lo tatou ola galulue. Tatou te fa'ameo fo'i i le Atua ma tu'uia lona agaga fesoasoani mai i a tatou galuega. A o la tatou filifiliga sa'oloto, o le faitalia o le tagata e lagona ai le Atua ma faia lona finagalo. Ia manatua pea, o a lava fa'afitauli e fesoua'ina ai la tatou savaliga; o lo'o i ai pea le Atua ma i tatou i aso uma.

Tatalo: Le Atua alofa e, fa'afetai tele i lou mafutaina o i matou i taimi ma aso uma o lenei soifuaga o loo matou i ai, Amene!

Aso Gafua – Setema 15: “Tavita ma Koliata” (David and Goliath)

Tusi Faitau – 1 Samuelu 17: 38-47

Matua – f. 40: *“Ua ia ave lona to'oto'o i lona lima, ma ua filifili i ma'a lamolemole e lima mai le alia, ua fafao ai i le 'ato o le leoleo mamoe sa ia te ia, (o le taga fo'i lea) ma le ma'atā i lona lima; ona fa'alatalata atu lea o ia i le Filisitia.”*

Ua malamalama ma manino le tala iā Tavita ma le toa malosi o Koliata. O loo aumai ai le fa'ailoga o le tagata e ola fa'alagolago i le Atua, e mafai ai so'o se mea. E ui i le mana'o o Saulo ma naunau ia fa'aoga ofutau mo le saogalemu o Tavita, a e ua mautū i le Atua le ola talitonu ma le fa'atuatua o Tavita. O le fa'atauva'a o Tavita i le va'aiga a Koliata, na tu'u fa'afeagai e le Atua ina ua fa'ato'ilaloina le toa ta'uta'ua o Filisitia.

I lenei vaiseuga o le soifuaga ua tatou i ai, ua lē masino le tele o fa'afitauli e aliali mai. E i ai taimi ua lagona ai le vaivai ma tau mou ai lo tatou ola talitonu i le Atua pe a o'o mai faigata o le ola. Ua tatou fa'alogologotigā i le tele o mea fai o loo feagai ma i tatou. A e ua toe fafagu mai mo i tatou le faitauga o lenei aso, po o le ā lava le tetele o fa'afitauli ma faigata o le ola; ia mausalī pea le fa'atuatua i le Atua soifua. E fai o ia ma o tatou talipupuni pe a āfātia la tatou savaliga i lenei lalolagi. O le Atua e tū pea i matagi 'olo e fa'atonu folau i lo tatou ola, ma ia faia mea sili mo lana fanau. Ia lafo i le Atua lo tatou ola mautinoa, ona tatou maua lea o fa'alumaga lelei e avagalimaa'i.

Tatalo: Foa'i mai le lototele matou te feagai ai ma faigata o le ola, Amene!

Aso Lua – Setema 16: “Tavita ma Ionatana” (David and Jonathan)

Tusi Faitau – 1 Samuelu 19: 1-7

Matua – f. 4: *“Ua tautala lelei Ionatana ia Saulo lona tamā ia Tavita; ua fai atu fo’i ia te ia, Aua ne’i agaleaga le tupu i lana auauna o Tavita, auā e le’i agaleaga o ia ia te oe; a ua agalelei lava o ia ia te oe;”*

So’o se faigā uō lava, e lē solo lelei pea aso uma, e pei o le tala i le faigā uō a Ionatana ma Tavita. Ua tulaga maua luga Tavita i le vaegā ‘au a Saulo. Ua fai ma ala e tīgā ai lona loto, ona o le maoa’e o le tula’i mai o Tavita e fai ma ta’ita’i ‘au. A o Ionatana na ia lavea’i ai le soifua o Tavita ina ua lamatia e Saulo.

O le lalolagi ma lona gasologa, e feagai pea i tatou ma lu’itau o le ola. O le faigā uō a Tavita ma Ionatana, o se toe fafagu lelei lea mo i tatou uma. Ua lasi fa’afitauli ua tutupu mai i nei aso i mafutaga fa’a-le-uō, ma ua maumau ai le soifua ma ola o nisi. O tupulaga talavou ua fai ma vaisū le pule i le ola, ona o mea e tutupu i mafutaga. O le sauāina o tinā ma fanau i aiga, ona o le loto ita ua tupu tele. Ua faigata ona sa’ili le loto maulalo e fa’atupu ai le filemu, a e ua pulea e le loto ita ma ua leiloa ai le vā fetausia’i. A o Ionatana ma lona alofa iā Tavita, na ia sa’ili i le loto maulalo ina ia maua pea le filemu ma le fealofani i le la’ua mafutaga. O a lava faigata e feagai ma i tatou i totonu o mafutaga fa’auō, ia maua le loto maulalo e sa’ili ai le filemu. Ia tausia le vā fetausia’i lelei isi, ona maua lea o le fealofani ma le nonofo lelei.

Tatalo: Le Atua o mafutaga, foa’i mai le loto fou iā i matou ina ia matou fai ai mafutaga fa’a-le-uō i le fealofani ma tausia lelei le vā feso’ota’i, Amene!

Aso Lulu – Setema 17: “Tavita ma Saulo” (David and Saul)

Tusi Faitau – 1 Samuelu 24: 1-12

Matua – ff. 11-12: *“Lo’u tamā e, ia e silasila mai fo’i i lou pito ofu i lo’u lima, auā o lo’u sesele ‘ese i lou pito ofu, a ua ou le fasi ia te oe, ia e iloa ai, ma e silafia, ua leai se leaga, po o se fouvale ia te a’u, ma a’u lē agaleaga ia te oe; a o oe, o lo’o e lamalama ia ou oti ia te oe. Ia fa’amasino e le Ali’i ia te i tā’ua nei ma oe, ma ia tau atu e le Ali’i ia te oe ona o a’u; a o lo’u lima, e le o’o lea ia te oe.”*

O le mafutaga a Saulo ma Tavita e le’i faigofie ona o lagona fouvale o Saulo iā Tavita. Na maua luga iā Tavita lona fa’amamaluina o tulaga tupu o Saulo, ona ua fa’au’uina e le Ali’i. O le ala lea na ia tausia va’a tele ai i lo la’ua vā feagai ai ma le tupu o Saulo. Ua silafia e le Atua le fete’ena’iga i le vā o Saulo ma Tavita e pei ona i ai i le faitauga o lenei aso. A o le fa’ailoa atu e Tavita iā Saulo, le tele o avanoa na ia maua e tau ai lona taumafai e fasioti iā te ia. Ua manino ma malamalama iā i tatou le i’uga o le tala. A o le ā se fe’au tāua o lo’o atagia mai i le mafutaga a Saulo ma Tavita? E tele pea mafutaga ua tatou osiosi fa’atasi i lenei soifuaga. O mafutaga i totonu o aiga, nu’u, atunu’u fa’apea le Ekalesia. Peita’i, e i ai lava ona fa’aletonu e tutupu pea. O le upu moni, e i ai taimi ua lē ō gatasi ai le futia ma umele i manatu ma lagona, ona tutupu lea o fa’afitauli i totonu o tatou mafutaga. Ua fai lea ma afuaga ua lē maua ai so tatou nonofo fealofani ma le ola fetausia’i. Ua fa’amanatu mai le Talalelei mo i tatou, ia tatou faia mafutaga fesaga’i ma le loto mamā. Ia faia ma le loto atu i le Atua, ina ia o tatou lagonaina le tāua o mafutaga e osia i le fealofani.

Tatalo: Le Atua pule aoao, ia fai oe ma fa’amasino i lo matou ola mafuta ma mea uma matou te faia i lenei soifuag, Amene!

Aso Tofi – Setema 18: “O le Taulāitu o Enetoro” (*The Witch of Endor*)

Tusi Faitau – 1 Samuelu 28: 3-20

Matua – ff. 16-17: *“Ona fai mai lea o Samuelu, O lea fo’i e te fesili mai iā te a’u, pe afai ua afio ‘ese le Ali’i iā te oe, ma ua fai oe mona fili? Ua faia lava e le Ali’i le mea na ua fetalai mai iā te a’u; ua sae’eseina e le Ali’i le mālō nai iā te oe, ua tu’u atu ai i le tasi tagata, o Tavita lea. Auā ua e le fa’alogo i le si’ufofoga o le Ali’i, ma ua e le fa’ao’o lona to’asā tele iā Ameleka, o le mea lea ua fai ai e le Ali’i lenei mea iā te oe i nei ona aso.”*

O le Atua o le fa’amasino o le amiotonu i mea uma e faia e le tagata. O tofiga ma galuega ua tatou galulue ai, o mea ia a le Atua. O lona lava finagalo e fai ai lana pule faito’atasi, i le ave’eseina lea mai le tagata. O manatu faualuga o Saulo, na fa’aeaina ai Tavita e le Atua ma avea ai o ia ma tupu mo Isaraelu. Ua silafia e le Atua, e te’ena pea e Saulo lona finagalo e ala mai iā Samuelu lana auauna. Ia fai fo’i lea ma fa’amanatu tāua mo i tatou uma. Aua ne’i avea tofiga maua ua tatou maua, e punitia ai la tatou va’ai i le Atua. Ia ta’imua pea le Atua i le fa’atinoga o tatou faiva ma tiute ua tatou galulue ai. Ia avea tofiga ua tatou maua e auauna atu i tagata, a e le’o le auauna mai o tagata iā i tatou. Ia faia la tatou auaunaga ma loto atoa i le Atua, ona manuia lea o ta faiva alofilima o loo tatou feagai ai.

Tatalo: Fa’amalamalama mai e lou Agaga, le tāua o le e auauna i tagata ma tofiga ua matou maua mai iā te oe, Amene!

Aso Faraile – Setema 19: “Toe mālō mai le mea na lēiloa atu”

Tusi Faitau – 1 Samuelu 30: 1-8 (*Winning back that which was lost*)

Matua – f. 6: *“Ua atuatuva tele lava Tavita, auā na tautala le nu’u e fetogi iā te ia i ma’a, ina ua tigā loto o le nu’u uma ta’itasi i ona atali’i ma ona afafine; a ua fa’amalosi Tavita lona loto i le Ali’i le Atua.”*

O Tavita o le auauna e mau lona loto i le Atua. E ui ina lamalama e Saulo e fasioti, a e le’i manumālō le ita i lona loto. Na ia tausia le vā ma Saulo ona o tulaga tupu ua fa’au’uina ai e le Atua. E le’i polepolevale Tavita a e na ia sa’ili ma mafuta pea i le Atua, ma maua ai lona malosi fa’afouina pea. Lea lava na fa’aeaina ai o ia e le Atua, i le avea ai ma tupu mo lona nu’u. E foliga fa’apea mea e tutupu i lo tatou ola ma lona gasologa. Ua faigata ona maua le filemu, pe a manuia nisi tagata. Ua tatou taumafai fo’i e sa’ili auala e fa’aleaga ai nisi ua fa’amanuiaina e le Atua. A e ua fa’amanatu mai le Talalelei mo i tatou, ia maua le loto maulalo e talia ai manuia o le Atua ua tatou maua. O a lava manuia ua ia foa’iina mai, ia talia ma le fiasia. E i ai le taimi o le Atua, e fa’aeaina ai i tatou i manuia sili ua ia finagalo ai.

Tatalo: Le Atua e, ia fa’atupu le loto fiasia i o matou loto i manuia ua matou maua, Amene!

Aso Toona’i – Setema 20: “Maliu o Saulo” (*Death of Saul*)

Tusi Faitau – 1 Samuelu 31: 1-13

Matua – ff. 11-12: *“Ua fa’alogo e ua nonofo i Iapese Kiliata i le mea ua faia e Filisitia ia Saulo; ona tula’i lea o tagata totoa uma, ua savavali atu i latou, ua atoa le po; ua latou ave le tino o Saulo ma tino o ona atali’i nai le pa o Petesani, ona o atu lea o i latou i Iapese; ona latou susunuina ai lea o i latou.”*

Sa o tatou fa'asoa i tala'aga o Saulo i lenei vaiaso. Ua fa'ai'uina i le maliu o Saulo ma ona atali'i. A o le fesili fa'atupu manatu, e fa'apefea ona tatou manatua pea i latou ua maliliu? Pe manatua i ni galuega po o ni mafutaga? O le manatuaina o e ua maliliu, e tele auala e manatua ai pea e le tagata. O nisi taimi, ua tatou va'ai i na'o mea tatou te fia va'ai ai, e manatua ai i latou. A e galo ia i tatou, galuega alofa na o latou faia a'o tatou mafuta ai. Sa fiasia nisi ina ua maliu Saulo ona ua manatua na'o ona leaga ma fa'aletonu. O fa'aletonu ma leaga Saulo, ua fai ma falea'oga atamai i lo tatou ola. E a'oa'o mai ai le tau'aveina o tofiga e tatau ona olaina. E lē gata i lea, e i ai fo'i galuega lelei na ia faia a o avea ai o i ma tupu i lona vaitau. Ia tatou manatua pea i latou ua afe moe le malaga, i ni o latou fa'aletonu fa'apea fo'i mea leleina o latou faia.

Tatalo: Fa'afetai le Atua, ua avea le soifuaga o i latou ua afe moe le malaga ma a'oa'oga tāua i lo matou ola, Amene!

PĀLENI (BALANCE)

Aso Sā – Setema 21: “O mea uma ua paleni” *(Everything in balance)*

Tusi Faitau – Failauga 3: 1-8

Matua – ff. 1, 4: *“O le mea ma lona tausaga i mea uma, ma ona lava po i mea uma lava i lalo o le lagi;... o ona po e tagi ai, ma ona po e 'ata'ata ai; o ona po e taufaitagitu'i ai, ma ona po e sa'asa'a ai.”*

O upu ia o le Tusi a Failauga, e lagona pea i taimi o sauniga o maliu. O taimi o le loto fa'anoanoa ma le loifofoga maligi, ona ua motusia le mafutaga ma nisi. A e o lo'o ta'oto ai le taumafai o le Tusi o Failauga, ina ia o gatasi taimi fiasia o le soifuaga o le tagata; fa'apea fo'i ona taimi fa'anoanoa. A o le gasologa masani lea o le soifuaga o lo'o tatou ola ai. O aso o le fiasia, fa'apea fo'i aso o le loto mafatia ma fa'anoanoaga. Ua mae'a ona fa'ata'oto e le Atua, le alafua o lo tatou ma lona gasologa ina ia paleni aso o lo tatou ola i le lalolagi lē tumau.

O upu a le atunu'u, e lē lagi lelei pea aso uma. O le upu moni, e fetaia'i pea i tatou ma faigata o lenei soifuaga. E i ai aso e lagona ai lo tatou loto mafatia ma lagona fa'anoanoa, pe a motusia mafutaga ma nisi e pele i o tatou loto i le oti. A o le fe'au tauologologo a le Talalelei, ia o tatou iloa ona fa'apaleni aso ma taimi o lo tatou ola. Aua fo'i ne'i avea aso faigata ma fa'anoanoaga, e fa'avaivai ai lo tatou ola fa'atuatua i le Atua. O le finagalo alofa lena o le Atua e ala i lana foafoaga, ina ia paleni mea uma ma lona gasologa.

Tatalo: Le Atua agalelei, fa'amalamalama e lou Agaga ia matou iloa fa'apaleni mea e tutupu i lo matou ola i le lalolagi nei, Amene!

Aso Gafua – Setema 22: “Tausaga e lulu ai, ma tausaga e selesese ai”

Tusi Faitau – Kenese 8: 20-22 *(Seedtime and harvest)*

Matua – f. 22: *“O aso uma o le lalolagi e le toe utuvā ai o tausaga e lulu ai, ma tausaga e selesese ai, o le ma'alili fo'i ma le vevela, o le vaitoelau ma le vaipalolo, o le ao fo'i ma le po.”*

O lenei lalolagi ua tatou ola ma soifua ai, ua tu'umatāmaga e le Atua lona gasologa i ona lava taimi. O fesuia'iga o le tau i le agi malū o le savili, o le fana'e mai o le tai ma le toe mou atu; fa'apea fo'i le oso a'e ma le toe goto ifo o le lā. A o le avanoa tāua tatou te mafaufau ai ma molimau i galuega mamana a le

Atua Silisili'ese. Ua avea fo'i lea ma falea'oga atamai mo i tatou uma, a o tatou i ai i lenei soifuaga. O le tapenaina e le Atua o le lalolagi fou e ala ia Noa, lea o loo tatou fa'aauaina pea lea feagaiga.

O upu ua masani ai le fa'alogo, o le fuata ma lona lou. Ua fa'amanatu mai le Talalelei mo i tatou uma, o a lava fa'afitauli tatou te feagai ai, e fa'aauau pea gasologa masani o le soifuaga. O le Atua e tū pea i matagi 'olo e fa'atonu folau i la tatou savaliga faifai pea i lenei lalolagi. Ia taula'i pea la tatou va'ai i le Atua i taimi o tatou fa'afitauli, ona lē fesiligia lea o le taunu'uga o la tatou savaliga.

Tatalo: Le Atua e, fa'afetai mo lau foafoaga ua fai lea ma fa'amanatu tāua iā i matou, o lo'o galue pea lau Afio i fesua'iga o tau ese'ese, Amene!

Aso Lua – Setema 23: “E mana'omia fo'i e le fanua le mālōlō”

Tusi Faitau – Levitiko 25: 1-7 (*Fields need to rest, too*)

Matua – ff. 3, 4a: *“E ono tausaga e te lulu ai sito i lou fanua, e ono tausaga e te teuteu ai lou tovine, ma fa'aputu ai ona fua. A o le fitu o tausaga e fai ma sapati lea e mapu ai le lau'ele'ele, o le sapati i le Ali'i.”*

O le gasologa o le lalolagi ua tatou i ai, o le alafua na fa'ata'oto e le Atua mai lava i le amataga. O le feso'ota'iga o le tagata ma mea uma o lana foafoaga. E pei o le fetalaiga a le Ali'i na tu'uina i lana auauna o Mose, e pei ona fai ma matua o lenei fo'i aso. O le fa'aaogaina o aso e 6 e galuea'ina ai le fanua, a o le aso 7 e mālōlō ai. O le ata manino o le feso'ota'iga o le ola ma le isi ola. E pei ona i ai le autū, “E mana'omia fo'i e le fanua le mālōlōga.”

O lo'o tatou i ai i lenei vaiaso ma lona fa'amamafa o le **“Paleni.”** I le soifuaga ua masani ai le Samoa, o le galuea'ina lea o fanua mo le tausiga o aiga. O fua o fa'a'ele'eleaga e tausi ai le ola i le tino, ina ia fa'afouina pea lo tatou malos. A o le fa'amanatu mai a le autū o lenei aso, e mana'omia fo'i e fanua le mālōlōga mo sina taimi e pei fo'i o i tatou. Ia paleni o tatou taimi galulue ma taimi e mālōlō ai. Ua uma ona fa'ata'oto mai e le Atua, le alafua tatou te savavali ai i lenei lalolagi ma le soifuaga ua taou ola ai. Pau la tatou matāfaioi tau'ave, o le galulue i le taimi tataua fa'apea fo'i le taimi e mālōlō ai.

Tatalo: Le Atua pule aoao, fesoasoani mai lau Afio ina ia o matou iloa le tāua o le mālōlōga i le tagata ma lau foafoaga atoa, Amene!

Aso Lulu – Setema 24: “Ao ma le pō, malamalama ma le pogisā”

Tusi Faitau – Kenese 1: 14-19 (*Day and night, light and dark*)

Matua – f. 14: *“Ua fetalai mai fo'i le Atua, Ia i ai i le vā nimonimo o le lagi o mea e malamalama a'i, e iloga ai le ao ma le po; ia fai fo'i ma fa'ailoga, ma tau, ma aso, ma tausaga.”*

A o tatou va'ava'ai i le lalolagi ma lona foafoaina, e mādōfa le loto i galuega a le Atua. I lona fa'asolo mai i le mea na faia i le ulua'i aso e o'o lava i le fa'a-i'uga. O le ao ua avea ma malamalama, ma le po ua avea ma pogisa. Ua tatou fa'aaogaina le ao e fa'atino ai galuega ma tiute ua tatou galulue ai. E fa'apea fo'i ona i ai galuega e fa'aaogaina ai le po. A o le matagofie o le Atua, e atagia pea i ana galuega. O le lā e na te fa'atupuina le malamalama tele i lalolagi atoa i le ao, a o le masina ma fetu e fa'ailoa mai le matagofie o le Atua i le po. A o le feso'ota'iga o lana foafoaga i mea uma ua i le lalolagi fa'apea ma le lagi. E atagia i lana foafoaga ma le 'auala na faagasolo ai le foafoaina, le fa'atōfāla'iga

a le Atua ina ia paleni vaega uma o lana foafoaga ma le tagata. O loo ta'oto ai lona finagalo mo le tagata ina ia tausi lelei ma ola fiafia i le lalolagi na ia faia i le amataga. O lona uiga, o a lava faiva ma tiute e fa'atino i le ao, ia faia galuega ma le fiafia i mea ua tatou maua. Ia galulue pea manū o ao, ona fai lea o le po e mālōlō ai. O nei aso ma lona gasologa, ua tu'u fa'afeagai e nisi galuega a le ao ma le po. Ua fai ma ala e atagia ai ua lē paleni tatou galuega fai ma le finagalo o le Atua mo i tatou. O le fea'u tauologologo a le Talalelei, ia fa'afetaia pea le Atua ma lana foafoaga ua tatou ola ai. Ia faia ma le loto fiafia ma ia tatou iloa le matagofie o lana foafoaga i aso uma.

Tatalo: Le Atua foafoa, fa'afetai i lou fa'ama'ite o mea lelei i lo matou ola ma lou alofa fua mai i le lalolagi e ala i lau foafoaga, Amene!

Aso Tofi – Setema 25: “O le Atua ma Kaisara” (God and Caesar)

Tusi Faitau – Mataio 22: 15-22

Matua – ff. 21-22: *“Ona fetalai atu ai lea o ia iā te'i latou, “O lenei, o mea a Kaisara, ia outou avatu iā Kaisara; a o mea a le Atua ia avatu ia i le Atua.” Ua latou fa'alogo ai, ona latou taufaiofo ai lea; ua latou tu'ua ia, a e o 'ese.”*

Sa mōafo le 'au Faresaio i tali a Iesu, e uiga i lafoga o loo totogi i le Empaea o Roma. Peita'i, ua fa'aali manino e Iesu ia i latou, e lē na'o le ola fa'aletino e taula'i i ai le va'ai. Lea na ia saunoa manino ai i upu ia ua fai ma tatou matua. O le afio mai o Iesu i le lalolagi e momoli mai le finagalo o lona Tamā, na ia talatala ai uiga moni o afioga a le Atua. E le gata i lea, na fa'aailoa ai e Iesu le soifuaga o lo'o tatou ola ai ma ia paleni. O la tatou auunaga i le Atua ma lana galuega, o le ofoina o le soifua ma le ola fa'apea fo'i le tamāoaiga ua tatou maua. O le fa'amanatu a le Talalelei, ia paleni itu uma o le tatou auunaga i le Atua ma lona finagalo. O le soifua fai taulaga i le Atua, e lē na'o tupe e iloga ai lo tatou ola tautua i lana galuega. O a lava manuia o le Atua ua i o tatou lima, fai lena ma taulaga e vi'ia ai le Atua. Ia faia ma le loto mamā ma o tatou tagata atoa, ona moni lea o la ta auunaga i le Atua ma lona finagalo i so'o se ala.

Tatalo: Le Atua alofa e, fesoasoani mai ina ia matou iloa ona fa'a paleni le ola i le lalolagi nei ma lou mālō e fa'avavau, Amene!

Aso Faraile – Setema 26: “Afai tatou te ola pe tatou te oti”

Tusi Faitau – Roma 14: 5-9 (If we live or if we die)

Matua – ff. 7-8: *“Auā e leai so tatou e ola mo ia lava, e lē oti fo'i se tasi mo ia lava; auā afai tatou te ola, tatou te ola mo le Ali'i, pe afai e oti, e oti mo le Ali'i; o lenei, pe ola pe oti i tatou, o tagata lava o le Ali'i i tatou.”*

O le soifuaga ma lona gasologa, e lua ona vaega tāua. O le ola ua tatou maua ma le oti o le ala i le mālō e fa'avavau. Ua tatou ola fiafia i lalolagi na tu'uina i ai tatou e le Atua, e tausi ma fiafia i lana foafoaga. O lona fa'amoemoe lea mo tagata uma, ina ia tausi ma fai le lalolagi ma nu'u e tapena ai lo tatou ala i mālō. O aso o lo tatou ola, ia faia galuega uma ua vala'auina ai tatou. A o le tapenaga lena o lo tatou ola i le mālō fa'avavau ua ia saunia. A o tatou soifua pea i lenei lalolagi, ia tatou ola fiafia manū o maua le avanoa. Ia faia mafutaga ia lelei ma ia maua pea lo tatou nonofo fealofani. A o'o mai le vala'au a le Ali'i, ia tūmau pea lo tatou fiafia i lo tatou ola. O le ola e fa'avavau, ua saunia lea e le Atua mo tagata uma, o e fa'atuatua ma talitonu iā te ia e lē aunoa.

Tatalo: Faatupu lo matou fiafia e ofo atu ai mo lau Afio, Amene!

Aso Toona'i – Setema 27: “Tino paleni” (*Balanced body*)

Tusi Faitau – 1 Korinito 12: 14-26

Matua – ff. 24-25: “*A ua fa'atatauina e le Atua le tino uma, ua ia tu'uina fo'i le ava i le itu tino ua vaivai; ina ne'i i ai i le tino se maseiga, a ia fetausia'i fa'atasi uma itu tino.*”

O le tausia o le soifua maloloina o le tagata, o le matāfaioi tau'ave a le tagata ina ia tausia lelei. E le gata ia maua pea le malosi i le tino, a e ia paleni fo'i ma le malosi i le fa'aleagaga. O upu a le Aposetolo o Paulo, o loo fa'ailoa mai ai le tāua o tatou tino ma lona aoga. O loo taula'i le fa'asoa a Paulo i le fa'aleagaga o le tino – o le feso'ota'iga lea o itu tino ta'itasi ua mafai ona fausia ai le tino atoa. A afaina le itu tino e tasi, e fa'apena fo'i ona lagona e le tino atoa. O lea ua mamanu e le Aposetolo le ata va'aia o tatou tino ma lona tāua, ina ia malamalama le tagata ma ia tausia lelei. O le autū o lenei vaiaso e fa'apea, “**Paleni.**” O le ave o le fa'amamamua i o tatou tino ia tausia lelei, ina ia paleni galuega a le tino ma le agaga. Ua fa'atua o tatou tino o le malumalu ia o le Atua, auā e tāua lo tatou ola i le silafaga a le Atua. A lelei ona tatou tausia o tatou tino, o le lelei fo'i lea ona tausia lelei le malumalu o le Ali'i. E afio o ia i totonu o tatou tagata. A lelei ona tatou tausia o tatou tino, i aso uma o lenei soifuaga. Ua anoanoa'i a'afiaga ua a'afia ai o tatou tino i nei aso, ona o fuāla'au fa'asāina ma lē tausia lelei le soifua maloloina. A o lea ua toe fa'amanatu mai le Aposetolo, ia tausia lelei le malumalu o le Atua ina ia paleni.

Tatalo: Fa'amalamalama mai e lou Agaga, le tāua o le tausia lelei o matou tino; le malumalu e te nofo tūmau ai i o matou loto, Amene!

SI'OSI'OMAGA FOU, LU'ITAU FOU (*NEW SETTINGS, NEW CHALLENGES*)

1. Itu'aiga femalagaai ma maumausolo (*A travelling, wandering race*)

Aso Sā – Setema 28: “Fa'atuatua – malaga i le mea e lē iloa”

Tusi Faitau – Kenese 12: 1-3, 10-20 (*Faith – journeys into the unknown*)

f.1: “*Ua fetalai mai le Ali'i ia Aperamo, Ia tu'ua e oe lou nu'u, ma tagata o lou nu'u, ma le aiga o lou tamā, a e alu atu i se nu'u ou te fa'asino atu ai iā te oe.*”

O faiga fou a le Atua i le ola o le tagata, e taunu'u i lona taimi tataua uma ona ia fa'atulagaina. Ua tatou savalia le amataga o lenei vaiaso i le fa'atonuga a le Atua i lana auaina o Aperamo, e tu'ua mea uma a e alu atu i le nu'u e na te fa'asino mai mo ia. O se fa'atonuga e aunoa ma se ta'iala e iloa ai e Aperamo, po o fea e aga'i i ai. Peita'i o le soifua fa'atuatua o Aperamo, na ia tula'i ai ma fa'ataunu'u le finagalo o le Atua. O ala o le Atua, e le'o manatu ia o le tagata. O le fegasoloa'i o le fanau a le Atua i mea e lē iloa, o lana fa'atōfāla'iga ina ia manuia le soifuaga o le tagata i le lalolagi. O le tofotofoina e le Atua o le fa'atuatua o Aperamo, o se fa'amanatu tāua fo'i lea mo le 'au Kerisiano.

E tofua le tagata ma le vala'auina mai le Atua. O galuega ua vala'auina ai i tatou e galulue ai, o tōfiga ia a le Atua. E fa'aaogaina ai o tatou aso, a o tatou i ai i lenei soifuaga lē tumau. A o la tatou auainaga i le Atua e faia pea i aso uma. O le upu moni, tatou te fesiligia le Atua pe a o'o mai fa'afitauli i lo tatou ola, ona o tatou manatu ua lē mautonu. Ua tatou fa'atamala fo'i ma tu'u fesili

i le Atua ma lona vala’auina o i tatou. A o lea ua fa’amanatu mai le Talalelei, ia lafo i le Atua lo tatou faamoemoe e ala i le faatuatua ia te ia.

Tatalo: Le Atua agalelei e, ia e fesoasoani mai iā i matou ina ia lelei pea la matou fa’alogo i lou vala’au mai, Amene!

Aso Gafua – Setema 29: “O ai, o a’u? Ioe, o oe!” (*Who, me? Yes, you!*)

Tusi Faitau – Esoto 3: 7-13

Matua – f. 11: *“Ona fai atu lea o Mose i le Atua, O ai ea a’u nei, ou te alu atu ai ia Farao, ma a’u aumaia le fanauga a Isaraelu mai Aikupito?”*

O Mose ma lona vala’auina e faia le finagalo o le Atua, na masalosalo ona lagona le vala’au a le Atua. E le’i fefe fo’i Mose e feagai ma le Ali’i ina ua vala’au e le Atua e alu e aumai lona nu’u mai Aikupito. O se vala’au e le’i faigofie i le soifua tautua o Mose i le Atua ma lona finagalo. E ui i le auai o le Atua ia Mose e pei ona ia fa’ailoa i lana auauna, a e na fesiligia lava e Mose le Atua.

O lo tatou vala’auina mai le Atua, e auala ese’ese lona fa’aali mai. O a lava fo’i ni o tatou vaivaiga fa’aletagata, e amana’iaina pea i tatou e le Atua i ana tōfiga. O lo tatou fa’atauva’a, e fa’amauaualugaina i tatou e le Atua, i la tatou auaunaga ma le faia lea o lona finagalo ua vala’auina ai i tatou. O le upu moni, e agasala pea le tagata i lona vā feagai ai ma le Atua. A e peita’i, e lē avea lea ma ala e liliu ai le alofa mai o le Atua i le tagata na ia faia. Ua na’o le Atua e silafia o tatou loto ma o tatou tagata lilo, ma le alafua ua uma ona ia fa’ata’oto mo i tatou uma. E pei ona fetalai le Atua ia Mose **“Ou te iai pea ma oe”** e fa’apena fo’i lona fetalai mai mo i tatou uma.

Tatalo: Le Atua e, fa’aali mai ia i matou lou finagalo ma le mea e ao ina matou faia e auauna ai i lau Afio ma lau galuega, Amene!

Aso Lua – Setema 30: “Leai se toe fo’i i tua” (*No turning back*)

Tusi Faitau – Esoto 14: 26-31

Matua – f. 29: *“A o le fanauga a Isaraelu, na latou savavali i le iliti tai mātūtū i totonu o le sami; ua fai fo’i le suāsami ma aupā ia te i latou i lo latou itu taumatau ma lo latou itu tauagavale.”*

Tasi lea o meaalofo tāua na foa’i e le Atua mo le tagata, o le loto e faia ai ana fa’ai’uga sa’oloto. E ese’ese uma lava a tatou filifiliga tatou te filifili i ai. O le feagai ai o Isaraelu ma le Atua, e le’i faigofie lea mafutaga. E tele ina fulitua le nu’u ma o ‘ese mai le Atua, a e le’i liliu ai le alofa o le Atua mo i latou. O le tunoa o lona alofa, na lotolotoi fa’atasi ai le Atua ma lona nu’u i taimi sa feagai ai i latou ma fa’afitauli, e pei ona faailoa mai i le tala a Esoto.

E i ai taimi o le soifuaga e lē ō gatusa ai a tatou fa’ai’uga fai ma o tatou mana’o. Ua avea lea ma ala e femoumoua’i ai o tatou lagona ma manatu, ma ua lē mautonu le mafaufau i le mea e tatau ona fai. A e peita’i, o le Atua ma lona alofa taumulimuli pea i lo tatou ola i aso uma, e faigofie ai ona faia a tatou filifiliga. O lona Agaga e fesoasoani i lo tatou ola vaivai. O le fesili e fa’atupu manatu, po o se tatou amio ea ua sa’o ma se aga ua tonu, ua mafua ai ona alofa mai pea le Atua ia i tatou? O a lava ni fa’ai’uga o tatou filifiliga na o tatou faia i le tuana’i, tuli i luma so tatou ‘ai ma taula’i pea i le Atua la tatou va’ai.

Tatalo: Fa’afetai lo matou Atua i lou mafutaina o i matou uma e ala i lou Agaga, ua faigofie ai fa’ai’uga o matou filifiliga fai, Amene!

Aso Lulu – Oketopa 1: “Fa’aeteete i mea e te mana’o i ai”

Tusi Faitau – 1 Samuelu 8:10-22 (*Beware of what you wish for*)

Matua – ff.19-20 : “A e le mafafai le nuu ona faalogo i le upu a Samuelu, ua latou fai mai, E leai lava, a e fai lava so matou tupu; ia pei o nuu uma i matou, ia faamasino mai lo matou tupu ia te i matou; ia alu atu foi o ia i o matou luma, ma ia tau i o matou taua.”

O se felafolafoaiga sa faia i le va o Samuelu ma tagata Isaraelu e uiga i se faigamalo. O lea fo’i o loo fa’aaauu pea i lenei vaitau. Ona tatou va’avaai lea i se pulega faakolone e ono lu’itau ai le ‘au faatuatua. E ao ona silasila i taunuuga o faiga faapea mo se manuia o tagata ta’itoatasi. Ua oo ina toeaina Samuelu, ona ia tuuina atu lea o le galuega faamasino e faaaauu e ona atalii. Peita’i, ua le faapeaina le tala, auā ua le savavali o atalii a Samuelu e tusa ma ala o le Atua. O lea sa faia ai ni felafolafoaiga i se tupu e ta’ita’ia le nuu. O nei felafolafoaiga sa lē faigofie ia Samuelu. Auā ua mananao Isaraelu i se faigamalo e faavae i le pule faa-le-tagata, e tele ai tigā, sauaga, taua, femisaaiga, malosi, ma faiga faa-kolone. ‘Ia fa’aeteete i mea e te mana’o i ai’. O lapataiga nei a Samuelu, e mafai ona aofa’i i manatu lelei mo soo se tagata. Ia manatua folafolaga i o tatou manaoga, ina ne’i lafoa’i le Atua ma lona ta’iala.

Tatalo: Le Atua e, ia aua ne’i galo ia te i matou lou agalelei ma lou alofa faamaoni, i taimi lelei ma aso e fetaia’i ai i faigata , Amene!

Aso Tofi – Oketopa 2: “Ia Faafaigofie” (*Keeping it simple*)

Tusi Faitau – Mika 6:1-8

f.8e: “Se a foi se mea e finagalo ai le Alii ia te oe, pe a le o ia mea, ia fai le amiotonu, ia naunau i le alofa, ma ia feooai ma lou Atua ma le loto faamaulalo?”

O loo ua manino lava le lē fiasia o le Atua e tusa ma lenei tala. Auā ua le amanaia e Isaraelu o lapataiga e tusa ma ala o le Atua. A ua filifilia e Isaraelu le faia o latou lava ala ma faaiuga. Peita’i, ua faailoa e le perofeta o Mika ia Isaraelu le finagalo o le Alii, ua faanoanoa ona o lona lava Nu. Aiseā ua toesea ai e Isaraelu le sootaga vāvā lalata ma le Atua o le na laveaina i latou mai le pologa? O le ola o le meaalofo na faatumauina ai e le Atua lona alofa mo Isaraelu. Sa faatumau ai fo’i le lalolagi o loo feagai ma le sauāina, olopalaina, ma le faatāfunaina. O a la ni auala faigofie e faalelei ai se faiā ma le Atua? “Se a foi se mea e finagalo ai le Alii ia te oe, pe a le o ia mea, ia fai le amiotonu, ia naunau i le alofa, ma ia feooai ma lou Atua ma le loto faamaulalo?”

Tatalo: Alofa tunoa e, ia faigofie ona matou iloa tonu ou ala, Amene!

Aso Faraile – Oketopa 3: “Auai i le taimi nei” (*Being present*)

Tusi Faitau – Ieremia 29:1-14

Matua – f.7: “Ia outou sailiili foi ia manuia le aai ua ou faatāfea ai outou; ma ia outou tatalo atu i le Alii mo lona aai; auā o lona manuia e manuia ai outou.”

O lea valaau mo nisi na faatāfea i Papelonia, o toeaina, faitaulaga ma perofeta. O se faamalosi o lo o i ai se fuafuaga a le Atua mo lo latou manuia ma le faamoemoe e tumau. O le faamalosi atu o le perofeta ina ia tumau i le tatalo ma le faatuatua i le Atua. O le augani i le ese’esega o le mea moni e manuia ai, ma perofeta pepelo e ono aafia ai i le taufaasesē. O le tatalo o se auala e fesootai ai ma le Atua i soo se taimi. O lea faatinoga e iloa manino ai

fo'i le auai o le Atua i se lalolagi vevesi ma se soifuaga filemu. E faapefea ona e auai faatasi ma le Atua i le taimi nei?

Tatalo: Ia matou mafuta atu i lau Afio i aso uma e ala i le tatalo, Amene!

Aso Toona'i – Oketopa 4: "Faamuamua" (Priorities)

Tusi Faitau – Hakai 1:1-11

Matua – f. 9: *"Ua outou faamoemoe i mea e tele, faauta foi, ua itiiti; ua outou aumaia i fale, ona a'u ulafia lea; ai se a? Auā o lo'u fale o loo ua faatafunaina lea, a e taitasi outou ma momo'e atu i lona lava fale."*

Ua toe fo'i le tafeaga o tagata sa luta, ua ta'itasi ma toe fausia o latou lava fale, a o le Malumalu o loo tumau pea le faatafunaina. Ua augani le perofeta o Hakai mo Isaraelu ia tautuana le Malumalu ia faamuamau o le maota o le Atua; e tapuai ai ma fai taulaga ai, auā o le punā oa lea o mea lelei uma, e liligi mai ai faamanuiaga i lo latou olaga fai soo. Ua faaiuina mataupu o lenei vaiaso i se iloiloga faaletagata ma le Atua. O fesouaiga o le olaga, ia aua ne'i suia ai le faamoemoe ua faavae i le Atua mo suiga ma lu'itau fou. Afai o se suiga ina ia auai le Atua i lona lava taimi, o faailoga lea i fuafuaga e ao ona faamuamua. O a ni faatinoga e ao ona faamuamua? O le fea e tatau ona faamumua?

Tatalo: Faafetai le Atua, o loo e faamuamua ina lava o matou ola, Amene!

SI'OSI'OMAGA FOU, LU'ITAU FOU (NEW SETTINGS, NEW CHALLENGES)

2. SUIGA I LE EKALESIA? (A changing Church?)

Aso Sā – Oketopa 5: "Aua le faanatinatia le faamasino atu"

Tusi Faitau – Galuega 5:33-39 (Don't rush to judgment)

Matua – ff. 33-34: *"Ua faalogo i latou, ona matuā lotoa ai lea, ua latou tau-pulepule e fasioti ia te i latou. Ona tulai lea o le tasi faresaio i le fono, o Kamalielu le igoa, o le a'oa'o i le tulafono, ua viia e le nuu uma lava, ua fai atu o ia, ua tuu atu le au aposetolo i fafo seia toe itiiti ane."*

O se si'osi'omaga vevesi na vaaia i lenei tala ona o ni vaega se to'atolu ua tatau i ai le fa'amasionga: muamua, o leoleo o le fale puipui ua tuua'ia i le sosola o pagota sa latou leoleoina; lua, o le ositaulaga sili ma le 'au satukaio, ua tuua'ia e le motu o tagata ua latou fasiotia Iesu; ma le tolu, o Peteru ma le 'au soo, ua tuua'iina i le faasalalau o talitonuga taufaasese sa a'oa'oina e Iesu, e feteenai ma talitonuga a le lotu lutaia.

O Kamalielu na tula'i e fai ma leo o le poto e fa'afilemuina ai le vevesi. O le feau a Kamalielu: soo se faamasinoga lava e faia e le tagata, e lē moni lona atoatoa. Pau le mea moni: e iai aafiaga e tutupu mai ona o filifiliga tatou te faia. Afai o ni aafiaga faale-tagata, e iai le taimi e mavae ai. Afai o ni aafiaga e auala mai i le Atua, e tumau. Ua tatou popolevale i le va'ava'ai mai o tagata ma lo latou faamasinoina o a tatou filifiliga ma faatinoga fai. E le gata ua saisaitia ai le faataunuuina o a tatou faamoemoega, a ua fai ma lavelave o le faatinoga o le ola valaauina mai le Atua. Manaia le faata'ita'iga ua aumaia e Peteru ma le 'ausoo: ia faatino pea galuega ua e talitonu ua valaauina ai oe e le Atua, e ui i aafiaga e tutupu mai. Fa'amata o fa'anatinati le faamasinoina o ni a tatou filifiliga ma faatinoga fai, ona tupu ai lea o le masalosalo i ni a ta faamoemoega ma le faatinoga o lo tatou ola valaauina?

Tatalo: Le Alii e, ia tau mamao lava le faanatinati ona faamasino atu, a ia faalagolago i lou faasinoala, Amene!

Aso Gafua – Oketopa 06: “Ia fai le mativa ma mea o le tuana’i”

Tusi Faitau – Galuega 4:32–37 (*Making poverty history*)

Matua – f.32a : *“Ua tasi lava le loto ma le manatu o e faatuatua uma lava;...”*

O mafai e le Ekalesia ona tasi le loto ma le manatu? Ua vaeluaina le lalolagi i nei ona aso i faiga faapolokiti, a o le faanoanoaga, ua faapea atu ai ma le Ekalesia. E le tu umi se Ekalesia e fevaevaea’i. Masalo ua nenefu i le vaai a le Ekalesia le mea moni. Ina ua fesiligia Iesu po o le a le poloaiga sili, na aofa’i faatasi e le Alii le tulafono i poloaiga e lua: ia e alofa i le Atua, ma ia e alofa i lou tua’oi. O poloaiga eseese, ae le mafai ona tuumavaevae.

O le alofa lea e ta’ua e Iesu i ia poloaiga, o le alofa e vaavaai i fafo atu o le li’o – o le alofa e saili e faamanuia atu. O faamanuiaga ua tatou maua, e le mo na’o tatou, a o faamanuiaga e faasoa atu i isi o lo o manaomia. Ina ia fo’ia le mativa ma fai ma mea o le tuana’i, e ao ona manatua: o le loto e tasi ma le manatu e tasi i totonu o le Ekalesia, e maua e le Ekalesia pe a faatino le alofa o le Atua ma le alofa i le tua’oi. I lenei lalolagi fevaevaea’i ua tatou iai nei, o le loto e tasi ma le manatu e tasi, o le ki lea e fo’ia ai le mativa.

Tatalo: Le Atua e, aumai le loto gatasitasi e fausia ai le ola fialia faale-agaga. Ma faamautu ai lou alofa silisili ese, Amene!

Aso Lua – Oketopa 7: “O suiga e manaomia le lototele”

Tusi Faitau – Kalatia 2:1-14 (*Change takes courage*)

Matua – f.14 : *“A ua ou iloa latou te lei savavali tonu e tusa ma le upu moni a le tala lelei, ona ou fai atu lea ia Kefa i luma o i latou uma, “O oe le lutaia, afai e te amio faanuuese, a e le faa-lutaia, se a le mea ua e taunanau atu ai i nuu ese ia latou faa-lutaia?”*

E le faigofie suiga; e mana’omia ai le lototele ma le lototoa e talia ai ni aafiaga e oo mai. O le tala e pei ona aumai e le tusi faitau o lenei aso, tatou te vaai ai le taua o le fesāga’i ma ē ua tetee i suiga, aemaise le faigata ma le maaleale o lona faagasologo. O suiga aanoa e manaomia ai le lototele; e laa ese ai ma mea ua masani ai, ae laa atu i mea fou ma mea e lei laasia muamua e nisi. Mo le ‘ausoo o Iesu, o suiga na latou faia na tuuese ai a’oa’oga faa-lutaia na a’oa’oina ai i latou mai le amataga, ae opogi a’oa’oga a Iesu. A o suiga lava ia na faamaasiasi ai e Paulo le ‘ausoo (Kefa), e pei ona molimau le tusi faitau. E fesootai lea ma le isi e manaomia mo suiga: talia aafiaga e oo mai.

O le lototoa e talia ai aafiaga e oo mai ona o suiga, e manaomia lea mo e o lo o naunau e faia suiga, aua e le o tagata uma latou te talia suiga. E iai le ‘au tetee ma le ‘au musuā. A o le tagata e talia aafiaga e oo mai, e faufautua ma faamalosi’au i le ‘au tetee i mafuaaga e manaomia ai suiga.

Tatalo: Le Atua e, foa’i mai le loto tele e talia ai suiga lelei, Amene!

Aso Lulu – Oketopa 08: “Ae faapefea tagata nuu ese?”

Tusi Faitau – Galuega 15:22–29 (*What about the gentiles?*)

Matua – ff.28-29: *“Auā ua lelei i le Agaga Paia ma i matou nei, ia le faaee atu se tasi avega ia te outou, na o nei mea e tatau: ia faamamao outou i mea e fasia*

mo tupua, ma le toto, ma mea titina, ma le faitaaga. Afai tou te taumamao ma nei mea, e lelei ai outou. Ia outou manuia."

O ananafi sa faasoa le tusi faitau i suiga e manaomia e le Ekalesia e aapa atu ai lana feau o le talalelei i Kerisiano nuu'ese. A o le tusi faitau o lenei aso, ua tuufesili le Ekalesia, aemaise o Kerisiano Iutaia, pe faapea ona latou fesootai ma Kerisiano nuu'ese e le tutusa a latou tu ma agaifanua. O le fa'a-iuga na i'u i ai le mataupu, o lo o afifi mai ai se feau taua.

E faamanatu mai e le tala le vaivaiga masani faale-tagata, o le faanatinati e fai faaiuga ma faamasinoga o isi, ae fua i luga o mea ua tatou masani ai. A tatou faamasino i tagata ese i luga o mea ua tatou masani ai, e tupu ai le fevae-vaea'i ma le le femalamalamaa'i o le tasi i le isi. E tamaoiga le felanulanua'i o faamanuiaga a le Atua, e tofu foi le aganuu ma lana ia auala e faaali atu ai. E eseese aganuu ma a latou faiga e faaali atu ai faamanuiaga a le Atua, e le fua tasi i se aganuu e tasi. E le o mea tatou te eseese ai, a o mea e maua ai le tasi.

Tatalo: Faatupu lo matou fiafia i le felanulanua'i o lau foafoaga, Amene!

Aso Tofi – Oketopa 09: “A e faapefea meaai?” (*What about food?*)

Tusi Faitau – Roma 14:18-23

Matua – ff.20-21: *“Aua le lepetia le galuega a le Atua ona o mea e ‘ai; e mamā mea uma, a e leaga i le tagata o le ai ma le tausuai. E lelei pe a le ‘ai ni aano o manu, ma ia le inu uaina, po o se tasi mea e tausuai ai lou uso.”*

O le faatalanoaina o lea mataupu i meaai, na faailoa ai e le aposetolo o Paulo, *“Aua le lepetia le galuega a le Atua ona o mea e ‘ai”*. O lenei mataupu ma'aleale o loo feavea'i ai le ese'esega o manatu i totonu o se faalapotopotoga o le 'au Kerisiano. O le mataupu o lo'o faatamilo faatasi ai ma le tulafono i mea'ai; o loo momoli faatasi ai le taua o ese'esega. E tulaga eseese tagata uma, ma e ese'esega manatu ma talitonuga. E ui i lea, e taua le taliaina o ese'esega o nisi, mo se lalolagi filemu. Ua faamamafa e Paulo le taua tele o le lagolago atu i suiga, ina ne'i tautevateva pe faiaina tagata taumafai. O fea lava filifiliga ma gaiioiga, ia atagia le lotogatasitasi ma le filemu. O se manatu fa'aauau pea, *'Afai e mafaia ia te outou, ia outou nofo lelei ma tagata uma lava'* (12:18).

Tatalo: Le Alii e, ia faatumauina se lotogatasitasi ma le filemu, mo le manuia faaauau a ou tagata i lenei lalolagi ma le lagi e faavavau, Amene!

Aso Faraile – Oketopa 10: “A e faapefea tagata pologa?”

Tusi Faitau – Filemoni 1:1-25 (*What about slaves?*)

Matua – ff.15-16a: *“Auā atonu o le mea lea na te'a ese ai o ia i sina itu aso, ina ia e toe maua o ia e faavavau; e le toe faapei o se pologa, a e sili i le pologa, o le uso pele ia ia te au lava.”*

O le tusi lenei o Filemoni, o loo ta'ua ai e Paulo le isi lea o mataupu ogaoga e uiga i le pologa. O Onesemo, sa avea ma pologa, e foliga mai sa agaleagaina e lona matai. E mautinoa ea le toe taliaina o Onesemo e lona matai, pe faamagalo ma fusi ia te ia e pei o se uso; pe toe avea lava Onesemo e fai ma pologa? O lea mataupu e lagaga ai pea se fesili taua mo le 'au faatuatua uma ia Keriso Iesu. E faapefea ona taliaina se tagata sa avea muamua ma pologa e fai ma uso? Afai e faamagalo ma alofa i ai, pe faaigoa pea o le pologa poo le tagata agasala? Afai fo'i sa agaleaga, e talia pea e pei o se uo poo se aiga?

Tatalo: Le Tamā alofa e, ia tatala loto ma lagona e talia ai le tagata agasala ma le pologa, i le alofa ma le faamaoni, Amene!

Aso Toona'i – Oketopa 11: “E talia tagata uma”

Tusi Faitau – Kalatia 3:23–28 (*All are welcome*)

Matua–f.26: “*Aua o atalii o le Atua outou uma lava i le faatuatua ia Keriso Iesu.*”

O le oloa faa-le-faatuatuga faa-Kerisiano e maua ai lagona masauli e savavali ma le lotogatasitasi. O Iesu Keriso ua militino faatasi ma tagata uma, e ala i le Agaga Paia (3:2,3,5a,14). O lea fuaitauga o loo atagia ai le lavelave o le faamasinoga, suiga, ma faavae, faapea le lotogatasitasi ma le faamautuina pea o ese'esega. O lenei manatu autu e tofu sao i le tala o le Atua i lona alofa mo tagata uma, ma talia soo se tasi. O le feau e le faailoga ai se lutaia poo se nuu ese, pologa poo se sa'olotoga, tane po o se fafine, aua ua tasi tagata uma ia Keriso Iesu ff.27-28. O le folafolaga o loo manino lava, mo tagata ta'ita'otasi, e tusa lava poo a tamaoaiga, tulaga, faailoga, talaaga, tuafanua, ma ituaiga tagata ese'ese; e tutusa le taliaina o nei tagata uma i le alofa e le faatuaioa o le Atua. O se faamanatu i se faitoto'a matala pea o le Atua i lona alofa tunoa mo le lalolagi atoa, ma tagata o loo sailili i lona suafa.

Tatalo: O lou alofa tunoa e aofia ai tagata uma i lou malamalama, Amene!

O LE SAMARIA MA TAGATA SAMARIA

(*SAMARIA AND THE SAMARITANS*)

Lotu a Tamaiti (*White Sunday*)

Aso Sā – Oketopa 12: “O tagata ma atua ua feifiloi”

Tusi Faitau – 2 Tupu 17:24–34 (*A mix of people and gods*)

Matua – f.33a: “*Na latou matatau i le ALII, a e auauna foi i o latou lava atua.*”

Amata faitauga o lenei vaiaso i tala o le vaitaimi na faatoilalo ai e Asuria le malo o Isaraelu. O le auala na pulea ai e Asuria lona malo, e aveese tagata ua latou faatoilaloina mai o latou atunuu ma laueleele, ae ave faaaunuua ma faanonofu i isi atunuu. E pei ona faailoa mai e le tusi faitau, ua ave tagata Isaraelu e faaaunuua i isi atunuu, ae aumai tagata o isi atunuu e faanonofu i laueleele o Isaraelu, lea ua faimai ai le matua, “*Na latou matatau i le Alii, a e auauna foi i o latou lava atua.*” Faamata o le a talia e tagata fou ia le Atua o Isaraelu; pe latou te tumau pea i o latou atua sa masani ai?

O le avanoa ua maua e mafuta atu ai i le Atua, ua maua nei e tagata fou mai i isi atunuu. Faamata o le a faaoga le avanoa, pe tumau pea i o latou atua tuai? O le fesili foi lea e talafeuga ai se feau faale-talalelei: o tatou faaogaina avanoa ua maua e mafuta ai ma le Atua, po o tatou tumau lava i faiga tuai ua tatou masani ai? Atonu o se feau matagofie lea mo le Aso Sa a Tamaiti.

Tatalo: Le Alii e, ia faamalositia pea o matou loto e tuuina atu le ola atoatoa mo lau Afio, Amene!

Aso Gafua – Oketopa 13: “E to'aitiiti ē faatuatua ” (*A faithful few*)

Tusi Faitau – 2 Nofoaiga a Tupu 30:1–12

Matua – ff.2-3: “*Auā na filifili e le tupu, ma alii sa ia ta ia, ma le faapotopotoga uma i Ierusalem, e fai le paseka i le lua o masina. Auā ua le mafai ona fai ai i*

ia ona po, auā o le au faitaulaga e lei uma ona faapaiaina i latou e i latou; o le nuu foi e lei faapotopotoina i latou i Ierusalemā.”

O lenei fuaitauga e manatua ai se tasi o so’o upu na ta’ua e tagata su’esu’e ‘Margaret Mead; ‘Aua le masalosalo, o se vaega o tagata to’aitiiti o ia tagata nuu, e mafai ona suia ai le lalolagi atoa’. Sa aau atu e Esekia Isaraelu uma atoa ma Iuta, Efaraima, Manase, Asera ma Sepulona ina ia auai uma i Ierusalemā mo le faia ai o le paseka i le Alii le Atua o Isaraelu. O lea sauniuniga sa faamauina i le ta’i lua o masina. O isi tagata o Asera, Manase, ma Sepulona ua latou faatuatua ma maua le loto maulalo e talia ai le savali. E faigofie ona talanoa i le upu faamaulalo. E masani fo’i ona ta’u faaleiloga pe a faatino. O le i ai faatasi o manatu ma le loto, e mafaufau ai pea i le tulaga o le lototele, mo se laasaga faaaauu pea. I totonu o lagona, o loo i ai se faamaufaailoga o le ‘au tauemu, ma se vaega to’aitiiti o tagata faatuatua. E to’atele le ‘au tauemu i soo se galuega faatino. A o se lesona taua lea ua aumaia e le tala i lenei aso, o le a’oa’o mai lea i galuega faatino, ma faaaauu pea. E le o le faitauto’etele, a o galuega o le lototele e faalagolago i aao malosi o le Atua.

Tatalo: Le Atua o le uo sili, ia a’oa’o mai pea i ala o lau Afio, e manino ai galuega a ou lava aao, Amene!

Aso Lua – Oketopa 14: “Ofo e fesoasoani ae teena”

Tusi Faitau – Esera 4:1-3 (*An offer to help refused*)

Matua – f.3: *“Ona fai atu lea o Serupapelu, ma Iosua, ma matai sili uma o Isaraelu ia te i latou, Tatou te le faia le fale o lo matou Atua ma outou; na o i matou nei lava matou te faia le fale o le Alii le Atua o Isaraelu, pei ona fetalai mai le tupu o Kuresa le tupu o Peresia ia te i matou.”*

O e na fai ma fili ia Iuta ma Peniamina, atonu o tagata ia e auala ai se mataupu e uiga i le mamalu. O le tala faasolopito o Isaraelu, sa fa’afefiloi ai e tagata Samaria o talitonuga, tu, ma aganuu a Isaraelu, a o i ai faatasi ma malo ese’ese, e pei ona ta’ua i se tasi o mataupu o lenei vaiaso. O lea faiga na avea ma pa pupuni o mea manino e faanenefu ai lo latou fesootaiga vāvā lalata ma le Atua. Peita’i, sa latou tu’u ina atu se fesoasoani tele o loo moomia lava i se galuega. Ae sa lagona e Serupapelu ma Iosua lea fesoasoani ua ofoina atu e tagata Samaria, ae ua latou teena, ona o lea sa faaunua i latou, faatasi ai ma le poloa’iga a le Tupu o Kuresa, o tagata Iutaia o i latou e tataua ona toe fausiaina le malumalu. E i ai fesoasoani e afua i le taleni, agavaa, meaalofo, poto masani, ma le poto su’esu’e e faatino ina ai se galuega. Atonu e mafai ona i ai le lelei, faatasi ai ma faaletonu; pe afai e leai se ola fesoota’i, toefuataina, liua ma avea ma mafutaga atoatoa ma Iesu Keriso.

Tatalo: A’oa’o mai e manino ai i uiga lilo o le ola galulue faatasi, Amene!

Aso Lulu – Oketopa 15: “E lē o saunia” (*Not ready yet*)

Tusi Faitau – Mataio 10:1-6

f.5: *“Ua aauina atu e Iesu o lenei toasefulu ma le toalu, ua ia fetalai atu ia te i latou, “Aua tou te ui i se ala o nuuese, aua foi tou te o atu i se aai o Samaria.”*

“E leai se mea e tupu, a o le i oo i lona taimi.” O tusitusiga o le Feagaiga Tuai, o loo aumai ai tala ma fuafuaga o le Atua; ua faatuatuai i le faanoanoa o Isaraelu, fefe, po o le leai o se faalogo ma usita’i. E i ai taimi e faanatinati ai le

tagata i le faataunuu o se mea, a e le'i oo i lona taimi e tupu ai. E taua ai le faatalitali, ma onosa'i. Mo Iesu lava ia, na ia finagalo i lona lava ala e na te asiasi atu ai i Samaria. Peita'i, e le'i o'o i le taimi e 'au saunia ai.

O tagata nuu ese e le'i 'au saunia, ae mo Isaraelu ua saunia e pei ona auina atu e Iesu o lana 'ausoo e to'a 12. O le uiga ma le afuaga o lenei saunoaga, e le o tagata uma ua saunia e latou te talia le galuega tala'i o le 'au soo. O lea se lapataiga ina ia tapenapena ai pea le 'Au Soo, pe a o'o ina fetaia'i i le ala ma nisi o tagata e lē taliaina i latou. E i ai atunuu e foliga latou te taliaina le Tala Lelei, a o latou loto, e lē 'au saunia mo lea faamoemoe/valaauina. O tagata uma, ua uma ona valaauina, e le o tagata uma fo'i, ua 'au saunia. Ua valaauina tagata uma i le toe liua. A o ai e tatau ona faailoa i ai le Tala Lelei, o afea?

Tatalo: Iesu e, fesoasoani mai ina ia iloa tonu nofoaga ua saunia mo le faailoa atu o le Tala Lelei, Amene!

Aso Tofi – Oketopa 16: “Faato’ilaloina o pa pupuni” *(Overcoming barriers)*

Tusi Faitau – Ioane 4:1-10

Matua – f.10e: *“Ona foai atu lea e ia ia te oe o le vaiola.”*

O le tala i le fafine Samaria i le vaieli, ua 'au iloa ma faamatala i le tele o le 'au faigaluega. O le fafine e tupuga mai i se itu aiga tagata nuu, e teena i le ituaiga o tagata Iutaia, e leai sona tulaga. Peita'i, e le'i alo ese Iesu mai fete'enaiga i va o ia tagata nuu. A o ia ua faaali tino i le fafine, na faia o ia i le faatusa o le Atua. Ua faafesaga'i nei Iesu ma faafitauli o lea fafine, na ala ai lona auai i totonu o se mataupu o fete'enaiga. O le fetufaaina o le alofa o Iesu, faatasi ai ma manaoga o lenei fafine, ua na ona faalogo lava o Iesu, aunoa ma le faamasino atu. Ua faafofoga Iesu, masalo o nei folasaga ua misi e le to'atele. O le alofa mutimutivale o Iesu, na ia tuuina atu ai i le fafine le tali o ana manaoga sa mo'omo'o i ai, i le taliaina lea o ia o le fafine e le tauoloaina. O lea lagona to'ilalo sa i le fafine, sa ia talia ai le vai o le ola. E tele ona taumafai nisi e foia faafitauli o loo alia'e pea, e ala i faamasinoga, ma fesiligia pea le amiotonu o le Atua i faafitauli e aliali a'e. Afai e feagai ma lenei faafitauli, e faapefea ona taulimaina atu uiga faalia o le agalelei, alofa, ma le filemu?

Tatalo: Le Atua Paia e, ia faamanatu mai pea lou alofa faamaoni mo le faato'ilaloina o lagona taotaomia, Amene!

Aso Faraile – Oketopa 17: “Avanoa e talitonu ai” *(Open to believe)*

Tusi Faitau – Ioane 4:19-42

Matua – f.19e: *“Le Alii e, ua ou iloa nei o oe o le perofeta.”*

O le talitonu i se mea po le iloa o se mea, o le 'saili lea i le vaai *(find out by seeing)* 'ia iloa tino *(to discern)* ma fa'autagia lelei *(to behold)*. E tele uiga o le 'ia iloa *(to percieve)*, e tele fo'i tala o loo faamatalaina ai se faasoa o Iesu ma le toatele o tagata. E faapei o tagata fai faiva aga'i i talitonuga. O le tele o ia faatalanoaga e tali lava le tagata i lo latou lava iloa, a'o nisi e lē malamalama. I lenei la fefaasoa'i o le fafine e le'i ta'ua lona igoa, ma Iesu; sa tele lava se vaega o le soifuaga o loo tauaveina e lenei fafine. O lea fo'i faafitauli e le'i faaogaina ai e Iesu ni talitonuga po o fea tonu latou te tapua'i i ai, poo se vaega o tu ma aganuu e iloa manino ai lo latou tua'ā(ancestors) e ono faatauaina. A o se fofō e uiga i le faaitiitia o le faalumaina na faailoa ai e Iesu le taua o le

fafine ma lona manaoga o loo moomia ona faia. E le iloa lava e nisi manaoga o isi tagata, pe afai tatou te le amanaia ma faalogo atu i o latou mafatiaga.

Tatalo: Le Atua faafofoga tatalo e, i se avanoa tatau ia mafai ona fefaasoa a'i lagona ma faalogo atu i loto mafatia, Amene!

Aso Toona'i – Oketopa 18: “Nofoga mo le misiona” (*A mission field*)

Tusi Faitau – Galuega 8:14–17

Matua – f.17: *“Ona la faee atu lea o laua lima ia te i latou, ona maua lea e i latou o le Agaga Paia.”*

I lenei fuaitauga ua faato'ateleina tagata Samaria e talia le afioga o le Atua i a'oaoga a Iesu. O i latou nei e avea ma molimau i se nofoga ma faamallosia tagata i se talitonuga fou i le galuega o le Agaga Paia. E i ai ea ni tagata i se Ekalesia latou te fefaasoa'i mo nisi ma va'avaai pe faapefea le tali ifo o le Atua? O Peteru ma Ioane ua auina atu e le au aposetolo i le papatisoina o tagata Samaria i le faapaiaina, ina ia maua le Agaga Paia. O lenei taliaina ma lona faamoemoe, na mou atu ai feteenaiga i pa o tuaoi. Na afua le lē faatuai ona auina atu o se tasi ina ia faatumauina ai pea le ola fesoatai ma le Atua.

Tatalo: Aumaia le fafia e faauo atu i nisi o tagata faatuatua, Amene!

FINAFINAU (PERSISTENCE)

Aso Sā – Oketopa 19: “Ua feutaga'i Aperaa mo le Atua”

Tusi Faitau – Kenese 18:16–33 (*Abraham bargains with God*)

f.24: *“Pe afai o i le aai tagata e tolimagafulu o e amiotonu, e te faaumatia ea a e le faasaoina le nuu ona o le tolimagafulu o e amiotonu o i ai?”*

O le ā se i'uga e ono tupu ane pe afai e feutaga'i se tagata ma le Atua? O le faitauga o le asō, o loo ua aumaia ai se filifiliga e aga'i i se sa'olotoga, ma aumai ai se lagona gaua'i mo soo se tagata i le faamasinoga tonu a le Atua. E ui i le augani a Aperaa mo se faamagaloga, a o le finagalo naunautai o le Atua, e faaolaina ma tumau lona alofa faamaoni i le tagata. O le aioi a Aperaa, ua ia manatu ai mo se fuainumera maulalo, ina ne'i le ausia fuainumera maua-luga, mo se sa'olotoga. O le faamoemoe o Aperaa na faalagolago i le alofa mutimutivale o le Atua.

O loo i ai pea tofotofoga e iloa i nei ona aso. O lea gaioiga o loo alia'e ai pea le lagona o le fetu'una'i e faia ai se faatau ma le Atua i se mataupu tala feagai, aemaise lava pe a oo ina feagai ma se lalolagi vevesi ma le lē mautonu. O loo ua aogā ea se faia o se faatau poo se faasoa ma le Atua? O le to'atele o nisi e talitonu i le Atua, o loo latou faia se aioi (appeal) mo se siosiomaga saogalemu. O nisi o loo augani i se fesoasoani mo lo latou lava sa'olotoga.

E mafai faapefea ona fesoasoani atu i e matitiva, sauaina, tu'ulafoaina, e faapea fo'i i se olaga o tagata Sotoma ma Komoro? O loo ua talafeagai ea, pe lelei, pe aogā fo'i le felafolafoaiga o se tagata ma le Atua? O le Atua na te faamallosia loto ma lagona ina ia finafinai ai le tagata i le tatalo. A o i ai i se mataupu o le FINAFINAU, o le faasa'olotoina ma le faamagaloina, o le amiotonu ma le alofa lava lea o le Atua e faaalua i lona lava faamasinoga tonu.

Tatalo: Le Atua alofa e, ia faia lou finagalo e pei ona faia i le lagi, o le manuia lea o tagata uma, Amene!

Aso Gafua – Oketopa 20: “O le finau o Isaako na maua ai le tau”

Tusi Faitau – Kenese 26:12-33 (*Isaac’s persistence brings reward*)

Matua – f.22: *“Ua tuua e ia lea mea, ua eli le tasi vai; ua latou le fefinauai ai, ona ia faaigoa ai lea o Reopo, ua faapea ana, Auā ua faalauteleina nei e le Alii se mea e nonofo ai, tatou te uluola ai i le nuu.”*

O le oge, faate’aina, matau’a, misa, ma le finauga; atonu o nei gaioiga na fausiaina ai se lesonea mo Isaako, ma faatulagaina ai o ia i se faatusa o le onosa’i ma le amiolelei. O le taofimamau pea o Isaako i le faatuatua, o se faamanatu taua tele i le tausia o le filemū ma le onosa’i. O lana finauga, ia faatino ina pea le amio lelei mo se tau. Ua ia te ia vai i Reopo. E faapefea ona malamalama i ni mataupu faigata i se olaga filemu; o le a tonu se manatu? O le fea fo’i ni ala ua saunia e le Atua e mafai ona a’oa’oina ai le tagata? E faapefea ona saunia se olaga e finafinau mo se tau? O lo o galue le Atua mo avanoa, e saunia nofoaga mo se gaioiga o le finafinau e fa’ate’aeseina ai mafauauga faaletonu, ma fausia ai taunuuga lelei. E ono maua lea tau pe afai o loo finafinau faatasi ma le Atua.

Tatalo: Ia matou finafinau pea pe a feagai ma faafitauli o le ola, Amene!

Aso Lua – Oketopa 21: “Talia le talosaga” (*Request granted*)

Tusi Faitau – Mataio 15:21-28

Matua – ff.24-25,28a : *“A ua tali atu ia, ua faapea atu, “E lei auina mai a’u i nisi, a e tau lava o mamoe o le aiga o Isaraelu ua le iloa.” Ona sau ai lea o ia, ua ifo ia te ia, ua faapea mai, “Le Alii e, ia e fesoasoani mai ia te au... Ona tali atu lea o Iesu, Funa e, ua tele lou faatuatua.”*

O le faailogaina (distinguish), e faatupuina ai le lagona o le lē agavaa. O le faitauga o le asō, o loo faalia ia gaioiga o le faailogaina, ma le gaioiga o le taliaina o nisi e lotovaivai, ma le lē amanaia. O lea fafine na sulufai ia Iesu, o se tagata nuu o Kanana, o ia o le Eleni. Ua na faalogo i vavega tetele ma fa’a-malologa sa faia e Iesu. A o lona faatuatua na ia faanatinati ai ma lana talosaga aua ua ia mautinoa e faataunuu lava e Iesu lona manaoga. *E lei auina mai a’u i nisi, a e tau lava o mamoe o le aiga o Isaraelu ua le iloa.* E ui i lea saunoaga a Iesu na ia faalogo ai, ae na le’i aveesea ai lona talosaga mo se lavea’i mo lona tama teine. Ua a’e malo ai le sailiga ma le finafinau a le fafine ese, ina ua tonu lona filifiliga e na te le solomuli i lona teena. Ua ia talitonu ma lona faamoe-moe e tali Iesu e ala i lona alofa mutimutivale. O lea manumalo na faia mo lona sa’oloto ma le faaeaina o le faatuatua e tumau pea.

Tatalo: Faafofoga mai i la’u tatalo, ma ia oo atu la’u alaga ia te oe, Amene!

Aso Lulu – Oketopa 22: “Finafinau i le alofa mutimutivale”

Tusi Faitau – Mataio 18:15-17,21-22 (*Persistence in mercy*)

Matua – ff.15a,16a,17a: *“Afai e agaleaga mai lou uso ia te oe, ia e alu, ma aoi ia te ia tau lava o oulua ma ia.... A e afai e le faalogo mai o ia, lua te o ma se tasi, po o se toalua,.... A le faalogo lava o ia ia te i lona, ia e ta’u atu i le ekalesia;....”*

O le fefinaua’i, malosi ma le faamagaloga o le faamaopopoga o se mafutaga e atagia ai le manatu autu o lenei aso ‘finafinau i le alofa mutimutivale’. Na faailoa e Iesu le fete’enaiga i totonu o ekalesia ma atunuu i se lagona le lē to’afilemu. A e o se faiga e moomia tele ai o le faaititia mai vaaiga eseese agai

i le alofa. O le finafinai i le alofa e amata i le faafesaga'i. E tumau le finafinai i le alofa mutimutivale ona ua faataua le amanaiaina. O se finauga tau faatauva na mafua ai le augani mo le alofa. O lea finafinai e toe faamanatu mai i ai tatou, e le mafai ona aveesea ai le vaaiga faale-malo. E masani ona faasoa Iesu, ua tasi o Ia ma le Atua, e faamautinoa mai ai o tagata uma ua tasi. Pe tatou te mafaia ona faate'a ese mai lo tatou so'otaga ma le Atua, aemaise o lo tatou lava feagaiga mafutaga ma le Atua ma isi?

Tatalo: Ia matou faailoa lou alofa i so'otaga matou te auai ai, Amene!

Aso Tofi – Oketopa 23: “E ala i mea uma” (*Through it all*)

Tusi Faitau – 2 Korinito 11:24-33 & Filipi 3:13a-14

Matua – Filipi 3: ff.13e-14: “...Ou te faagalologo i mea ua tuana'i, ou te momo'e punou a'i foi i mea o lumanai, ou te tausisi atu i le faailoga, ia maua ai le tau i na valaauina ai a'u mai lugā e le Atua ia Keriso Iesu.”

Aisea e taua ai mo i tatou le tumau i le faamoemoe(hope)? O le a se'i o tatou tulimata'i le tautinoga a Paulo i le tusi faitau o lenei aso. O le tauanauina, vaai i luma, ma le aga'i i le lumanai, o se faamoemoega tele lea o Paulo i lona valaauina mai le Atua; e silisili lona taunuuga i le lagi. O le tautinoga i le Atua o le faaaoaoga na faamalosi atu ai Paulo i le Ekalesia i Korinito i le faiva o le aposetolo, e laveaina mai i faatinoga ma mafatiaga e ala i le ola ia Keriso. Ua faiaina le tuana'i, ua logotino manuia mea o lumanai, E faapefea ona tumau, ina ua gagase le ola talitonu, ma faaitiitia le iloa tino i se faamoemoe?

Tatalo: Ia leai se pa pupuni e taofia ai faamoemoega lelei, Amene!

Aso Faraile – Oketopa 24: “O naunautaga o le ola finafinai”

Tusi Faitau – Eperu 12:1-13 (*The demands of persistence*)

Matua – f.1: “O lenei o i tatou foi, o loo ua vagavagaia e le faapotopotoga o e matamata mai e faapea ona toatele, ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma.”

Soo se taufetuliga mamao ma se tausinioga, ia iloa le ala tutu'u e faigofie ma fesoasoani ai i laasaga ta'itasi. O le malamalama i se sini autu, o le a fai lea ma fesoasoani ina ia tumau ma taulai pea le finafinai. Ua tatou iloa fuafuaga lelei a le Atua mo tagata uma. E faapea fo'i lona finagalo alofa, e le tu'ulafoaina i tatou uma. O le faatuatua fo'i e fesoasoani pe afai e oo mai tiga ma faigata. E ui lava i le iloa o le suiga o le olaga ma faafitauli e ono faaosofia ai le fesiligia o le finagalo o le Atua. A e ui i lea, o le poloaiga o le finafinai o loo i ai le lago-lagoina. Ua faamautinoa mai e le Atua ia i tatou, o le a ia lavea'i, puipui, ma apoapoina oe ma a'u mai le faiaina ma le solomuli i faafitauli o le soifuaga. E manaomia ai lo tatou taufetuli pea ma le onosai i le sini autu o loo i o tatou luma. Ia aua ma le faavaivai. O le poloaiga o le finafinai, o loo tausinio ai e sa muamua ia i tatou, e o'o atu i augatupulaga fou.

Tatalo: Ia matou faalagolago i au poloaiga ina ia taunuu manuia le faigamalaga o lou fanau faatuatua, Amene!

Aso Toona'i – Oketopa 25: “Ia fa'amalosi – E faatasi le Atua ma oe”

Tusi Faitau – Isaia 41:10-14 (*Be encouraged – God will be with you*)

Matua – f.10: *“Aua e te fefe, auā ou te ia te oe; aua le fetepatepai, auā o a’u o lou Atua; ou te faamalosi oe; e moni, ou te fesoasoani ia te oe; e moni, ou te taofia oe i lo’u lima taumatau e i ai le amiotonu.”*

O le fefe, o se lagona e avea ma faalavelave i le soifuaga faaleagaga. E silafia e le Atua le matatā’u tele o tagata i le fefe. Peita’i, o lona finagalo ia ‘aua ne’i faavaivai ona o le fefe. O le folafolaga e pei ona aumai i upu o le matua, ua tuuina ai le faamalosi ina ia talitonuina le fesoasoani mai ma le amiotonu o le Atua. O lea fo’i folafolaga ua u’unaia ai le faatuatua i le Atua, e au saunia mo soo se taimi. ‘Ou te ia te oe’. O lea folafolaga o loo aumaia ai le mautinoa i taimi uma, o loo faatasi mai lava le Atua. O lea faamalosi mo le lototele pe a fetaiai ma faafitauli. E leai se mea faiaoga i le Atua. O lona uiga, tatou te le mafaia se mea pe aunoa ma le Atua. Ua polili e le perofeta o Isaia le mafutaga a le Atua ma le tagata. O le Atua na te faatoilalo tupu, faatupu matagi, faataapeapeina nuu; na te faia le vaipuna i laueleele naumati, ma taofia i tatou i lona aao.

Tatalo: Faatumauiina lou alofa matou te manumalo ai i le fefe, Amene!

O LE TUSI IA TITO MA IUTA (LETTERS TO TITUS AND JUDE)

Aso Sā – Oketopa 26: “O se fa’aa’oa’oga mo tagata uma”

Tusi Faitau – Tito 1:1-16 *(An example to all)*

Matua – ff.8-9: *“A o lē alofa i tagata ese, o lē alofa i e amio lelei, o lē faautauta, o lē amiotonu, o lē amio Atua, ma le amio mamā; o lē taofi mau i le upu moni, faapei ona a’oa’oina o ia, ina ia mafaia e ia ona apoapoai atu i le a’oa’oga e ola ai, ma aoi atu i e finau mai.”*

A o tatou faitau i le tusi a Paulo ia Tito, atonu o se tusi faafaigauo. Peita’i, ua faailoa e Paulo, o Tito o se atalii i la le faatuatua. O le tusi atu o Paulo ia Tito, ia faamalosi lona aoa’i atu i tagata, aemaise o tagata o Kereta, faimai o tagata tala pepelo lava i latou, o manu feai leaga. E le tatau ona faaa’oa’o i ia ituaiga amioga fa’alilolilo ma le loto eleelea. Na filifilia e Paulo le aai o Kereta ona o le itu malū lea o Kuperu i le itu i Sasa’e, e faigofie ai le faalauaiteina o le Tala Lelei. Ma, o lea sa tuu ai Tito i Kereta, ina ia faataunuuna le Tala Lelei i atunuu o totoe, ma taofia toeaina i lea aai. Ia taofiofi mamau i le avea o Iesu e fai ma a’oa’oga o lo tatou ola i aso faisoo.

Tatalo: Le Alii e, ia fai ma a’oa’oga o lou ala i lenei lalolagi, ma ia matou tumau ai e o’o i le faavavau, Amene!

Aso Gafua – Oketopa 27: “O se fe’au mo tagata pologa”

Tusi Faitau – Tito 2:1-15 *(A message to slaves)*

Matua – ff.9-10: *“Apoapoai atu i pologa ia usiuitai i latou i o latou lava matai, ia latou taumafai ona faafiafia i ai i mea uma lava, aua ne’i faatau upu i ai. Aua ne’i latou gaoi, a ia faaalua e i latou ua latou faamaoni ai, ina ia viia ai i mea uma lava ona o i latou le a’oa’oga a le Atua lo tatou Faaola.”*

Po ua mautinoa ea ia Paulo le manatu ua leai se pologa, e pei ona ia ta’ua i le Ekalesia i Kalatia; po o le i ai o le pologa e pei ona ta’ua i le matua? O lea ua amata le apoapoaiga faamalosi a le aposetolo o Paulo ia Tito i le mataupu e 2, e uiga i tagata eseese. O se mataupu faapitoa, e faamatala ai le taua o vaega ta’itasi o tagata eseese i totonu o se ekalesia. 1. **Toeaina.** Fai atu i

toeaina ia mataala, ia faaoteaina, ia faautauta, ia faamaoni i le faatuatua, ma le alofa, ma le onosai. 2. **Loomatua.** Ia amio fa'aaloalo, aua ne'i faatuaupua, ia fai ma a'oa'o i mea lelei, etc. 3. **Taulelea.** Ia faautauta, ia avea ma faaa'oa'o o galuega lelei, ia a'oa'o i le upu e ola ai, e le mata'uleagaina, etc. 4. **Pologa.** Ia usiusitai, aua ne'i faatau upu, aua ne'i latou gaioi, etc. O lea mataupu ua faamanatu ma fa'aalia mai le alofa tunoa o le Atua mo tagata uma, e faatupuina lava e le Atua lona fa'olataga i tagata uma; ia ola i le onosai ma le amio Atua.

Tatalo: Le Atua alofa e, ia fesoasoani mai ia te i matou i le faatauaina o tulaga eseese e faafouina ai o matou ala, Amene!

Aso Lua – Oketopa 28: “Feau e autupulaga mai se aganuu ese”

Tusi Faitau – Tito 3:1-15 *(A timeless message from a different culture)*

Matua – ff.5a, 7: *“Ona faaola mai ai lea o ia ia i tatou,...e tusa ma lona alofa i le faataeleina i le toefuataiina ma le faafouina e le Agaga Paia, ua na faamaligi tele mai i luga ia i tatou, ona o Iesu Keriso lo tatou Faaola; ina ia ta'uamionuina i tatou i lona lava alofa tunoa, ia fai i tatou ma sulie tusa ma le faamoe-moe i le ola faavavau.”*

O lea mataupu o se faasoa alofa a Paulo mo Tito ina ia taula'i atu lea i galuega i se aganuu ese'ese. O se fesoasoani i mafutaga faa-Kerisiano i totonu o le Sosaiete o Kereta. E faatau tele mo Paulo le taimi e le faatulagaina lea mo se tagata. A o se tagata e tautala fo'i i le upu moni. Na ia faafeso'otai ai le mataupusilisili faa-le-lagi i le lalolagi i se finauga poo a'oa'oga. Peita'i, o lona popolega autu, o le Tala Lelei ona Iesu Keriso o ina e faaleleia ai Sosaiete ta'itasi. O le Ekalesia e tatau ona agamalu i tagata uma lava. Na faaalua le agalelei ma le alofa i tagata uma i le toefuataina mai le Atua Faaola, ona o Iesu Keriso. E faapefea ona faaalua amio faa-Kerisiano i se aganuu ese e tete'e i faiga faa-Kerisiano? E faapefea fo'i ona tatou pepese i le Alii i se aganuu ese?

Tatalo: Ia ta'iala ina pea i matou i ou ala le Alii e. Ia fesoasoani ia avea i matou ma auauna e faamaoni, Amene!

Aso Lulu – Oketopa 29: “Finau mo le faatuatua” *(Contend for the faith)*

Tusi Faitau – Iuta 1:1-4

f.3: *“Le au pele e, o loo ou matua faamalosi e tusi atu ia te outou i le faaolataga ua tuu tele, ua tatau ai lava ona ou tusi atu ia te outou, e apoapoai atu ia outou faamalolosi ona finau mo le faatuatua na tuuina mai faatasi i le au paia.”*

O lea fuaitauga, o loo momoli mai ai se feau faamalosi e uunaia ai le 'Au faatuatua e o'o lava i augatupulaga. O se fautuaga mo tagata faalematau ma faafiti i a'oa'oga o Iesu Keriso. A o le finauga ua faaleaogaina ai faavae iloga i le alofa tunoa o le Atua. O lea na ala ai se faalaeiau i tagata nuu ese ua avea ma Kerisiano ina ia finau mo le faatuatua. Aua e faaalua lava faamasinoga o le Atua i a'oa'o pepelo, o e faalematau, i latou ua faaleaga o latou lava tino, o e ta'ufaatauvaa ma upu leaga i e ua mamlu, ma nisi e le faatuatua i le Atua.

Mo le 'au Kerisiano e ao ona tutu faatasi ma faamausali le ola faalefaatuatua e tete'e atu i faiga poo a'oa'oga taufaasese, ma maua'a i le alofa silisili ese o le Atua e ala ia Iesu Keriso. O le amio mamā, ma le amio Atua, o se faailoga o le ta'uamionuina i le upu moni ma le alofa tunoa o le Atua. O se lu'i faaleagaga i e o loo ola i se olaga taumafai faatasi ai ma nisi o loo tumau

pea i le faatuatua ia Iesu Keriso. O le faatuatua e aofia ai le tino, le mafaufau ma le agaga. E faapefea ona tatou finau mo le faatuatua; a'o i ai faatasi ma nisi o a'oa'o pepelo ma latou faamata'u i le ola faatuatua ia Iesu Keriso?

Tatalo: Le Atua alofa e, ia matou finau e tusa ma lou finagalo, Amene!

Aso Tofi – Oketopa 30: “Ia filigā i le faatuatua” (*Persevere in the faith*)

Tusi Faitau – Iuta 1:5-11

Matua – ff.8, 10a : *“E faapea foi lava o ia tagata moemiti, latou te faaleaga le tino, ma latou ta’ufaatauvaa i alii, ma upu leaga i e ua mamalu....A o ia tagata, latou te upu leaga i mea latou te le iloa....”*

O lea lava o loo faaauau mai i le asō, fuaitauga o ananafi. Peita'i, lea ua faamanatu atu e Iuta mea sa tutupu i aso anamua, e tusa ai ma le faamasinoga o le Atua, ona o amioga faapaupau e pei o Sotoma ma Komoro. O a'oa'o taufaasese, o loo tautala i upu faasausili ma le taufaatauvaa ina o le 'au faatuatua. O i latou ia o loo teena i le mamalu o le Atua, ma tuuaiga o e ua talitonu i le Atua ma lona pule aoao. E le o ni auauna i latou nei a Iesu Keriso. *O e muimui ma faameo, o loo savavali e tusa ma o latou tu'inanau.* O ia faafitauli, e faapefea ona tatou fesoasoani atu i ai, ae pe faapefea fo'i ona tatou filiga faatasi ai ma le 'au faatuatua i le faatuatua e silisili ona paia?

Tatalo: Le Alii e, ia faalototeleina i matou i le faatuatua i lau Afio, Amene!

Aso Faraile – Oketopa 31: “Faaeteete i a'oa'o pepelo ma ē tautalatala”

Tusi Faitau – Iuta 1:12-19 (*Beware false teachers and loose talkers*)

Matua – f.16: *“O e muimui i latou ma faameo, o loo o savavali i latou e tusa ma o latou tu'inanau, ma ua tautala mai o latou gutu i upu faasausili, o loo faaneenee atu i latou i tagata e maua ai ni mea.”*

O fete'enaiga na afua ai le polili o upu faamalosi o Iuta i le 'au faatuatua. Ia faaeteete i a'oa'o pepelo ma e tautalatala i upu faasausili. E ao lava ia i latou ona faaalua le lotogatasi ma fefaasoaa'i lo latou faatuatua na maua mai i le 'au aposetolo e ala ia Iesu Keriso. O le alofa tunoa lava na amanaia ai le ua faaletonu, ma faaola i le ua saili i le amiotonu ma le faatuatua ia Iesu Keriso. E tele se vaega o le Tusi Paia o loo taua ai lenei fefaasoaa'iga, e uiga lava i a'oa'o pepelo. O se vaega lava o lenei tusi sa faamautinoa ai e Iuta o lona fesoataiga ma Iakopo, ae faapea fo'i Iesu Keriso ma le 'au aposetolo. O lea mau mo le faamautinoaina o uiga faaalua o e ua uma ona a'oa'o ina i le faatuatua, ma le amiotonu. Ia taumamao ai i a'oa'o pepelo ma faaeteete i le laulau faiva e faaleagaina ai le tino atoa (Iakopo 3:6).

Tatalo: Ia le aunoa o matou upu ma le alofa i tagata uma, Amene!

Aso Toona'i – Novema 1: “Manuia” (*Blessing*)

Tusi Faitau – Iuta 1:20-25

Matua – ff.20-21: *“A o outou le au pele e, ia outou ati ae ia te outou i lo outou faatuatua e silisili ona paia, o le Agaga Paia tou te tatalo ai; ia outou faatumau ua te outou i le alofa o le Atua, ma faatalitali atu i le alofa mutimutivale o lo tatou Alii o Iesu Keriso, e oo atu i le ola faavavau.”*

O le alofa mutimutivale e le faavaivaia. O se talosaga mo le 'au faatuatua e tusa ma le faamasinoga tonu o le Atua e ala i lona alofa mutimutivale. Sa

matua saua lava luta i lana tusi e uiga i faiaoga pepelo ma o latou amioleaga sa faaalua. Peita'i, i ana upu faai'u'u, na ia finau malosi i le manuia o e taula'i lo latou faamoemoe i le Alii toe Tu o Iesu Keriso, ma faamaoni pea. O lana apoapoa'i maututu, e tusa ma le alofa mutimutivale o le Atua. O le tatalo fo'i o luta mo le Ekalesia ia faatalitali ma le loto talitonu i le alofa mutimutivale o le Atua e faaalua lava i lona lava taimi. Ia faamalolosi le Ekalesia ma tumau pea i le faatuatua i le alofa mutimutivale o le Atua, a o feagai ma a'oa'o pepelo.

Tatalo: Le Atua manumalo, faafetai i lou lava alofa e leoleoina ai i matou i ituaso le taugamalie, Amene!

SAILIGA O LE FILEMU (SEARCHING FOR SHALOM (1))

Aso Sā – Novema 2: “Sailiga faanaunauta'i o le filemu”

Tusi Faitau – Esoto 2:23e-25 (*Desperately seeking peace*)

Matua – ff.23e-25: *“...A ua mapuitiga le fanauga a Isaraelu ona o le galuega; ua alalaga foi,...Ua faafofoga foi le Atua i lo latou feoi, ua manatua foi e le Atua lana feagaiga na na faia ma Aperamo, ma Isaako, atoa ma lakopo. Ua silasila mai foi le Atua i le fanauga a Isaraelu, ma ua silafia i latou e le Atua.”*

O le sailiga o se filemu, o lea se naunautaiga o tagata uma. O lea sailiga atonu o loo moomia fo'i i totonu o galuega i le malo, kamupani, pisinisi ma so'o se atiina'e o fale faigaluega. Peita'i, e ese mai le fuaitauga o le asō, e uiga lea i se nuu o lo'o i ai se pulega malosi po o le pule. O lea faiga na lagona ai ua mapuitiga le nuu o Isaraelu na afua ai lo latou alaga “A ua mapuitiga le fanauga a Isaraelu ona o le galuega; ua alalaga foi...Ua faafofoga foi le Atua i lo latou feoi”. O le naunau i se filemu, atonu ona o se aafiaga i aso uma, ua leai se toomaga. E masani ona faatusatusa le filemu, i se totogi mo tagata galue. E faapea fo'i i tagata fai faatoaga, i le aso o seleselega. A o lenei tala, ua leai se tau, ua leai se manuia e masani ona maua e tagata galue.

O le upu Eperu *shalom* i lona faaliliuga masani, o le '**FILEMU**', o se faauiga e sili lona taua. E tele fo'i se sao taua o lenei upu i lagona masani e pei o le fete'enaiga, popole, lē mautonu, ma le atuatuva'e, e faasa'olotoina mai ai le ola tauivi ma le ola taumafai. O loo ua faailoa mai lava i lea mataupu uiga o le sauaina ma le faapologaina o tagata Isaraelu. O le a tatou tulimata'i pea lenei vaiaso atoa i faitauga Tusi Paia, mo le sailiga o se filemu i mataupu ta'itasi, ma le faamoemoe ia malamalama atili i meaalofo o le Atua e uiga i le filemu.

Tatalo: A o matou i ai i le sailiga o se filemu, le Alii e, ia matou maua le onosa'i ma le loto matala, Amene!

Aso Gafua – Novema 03, “Sailiga o le filemu i le tamaoaga”

Tusi Faitau – 1 Timoteo 6:6–10 (*Seeking peace in wealth*)

Matua – ff.6, 10: *“A o le amio Atua ma le loto malie, o le oloa tele lava lea...Auā o le manao i tupe, o le pogai lea o mea leaga uma lava; ua mananao tele i ai nisi, ona sese ai lava lea o i latou i le faatuatua, ua tu'ia ai ua atu i latou e i latou i puapuaga e tele.”*

O le fuaitauga o le asō, o lo'o aumaia ai vaega se lua i le sailiga lava o le filemu. O le sailiga o le amioatua, ma le sailiga o le tupe. I totonu o soo se faalapopototoga, e faapefea ona molimau i le upu moni, a e po fea o nei vaega

e lua e pei ona taua, e sili lea? O lenei mataupu o loo faaalua mai ai se vaega taua lava, o le *faamoemoe*. O lea faamoemoe, ua folafola mai ai le taua e faavavau mo i latou e faatuatua ma taula'i pea le vaai i le Atua.

Tatalo: 'Aua ne'i ta'ita'iina i matou i le faaosoosoga e fano ai, Amene!

Aso Lua – Novema 4, “Sailiga o le filemu i puapuaga”

Tusi Faitau – Mareko 5:24e-34 (*Seeking peace in personal suffering*)

Matua – ff.25, 28, 34: *“O le tasi fafine fo'i, ua ia te ia le puna toto i tausaga e sefulu ma le lua...auā ua faapea o ia, “Afai ou te pa'i atu tau lava o ona ofu, ona ou malolo ai lea... A ua fetalai atu ia ia te ia, “Lo'u afafine e, o lou faatuatua ua e malolo ai; ina alu ia oe ma le manuia, ma ia e malolo i lou ma'i tiga.”*

Afai e tatou te faasao i le uiga o le faatuatua. Atonu, o le a mafai ona tatou va'avaai i le upu malosi (stong), mamana (powerful), poo le upu toa (heroic). O le faatuatua o se gioiga e afua mai i se faanaunautaga, e taula'i atu lea i se faamoemoe mautinoa. E faapea se vaaiga i le sailiga o le fafine na maua i le ma'i puna toto, pe a ma le 12 tausaga o loo ia tauivi ai. Peita'i, na iloa manino i lenei tala le maoa'e o le faatuatua o lenei fafine, na ia faapea ai *“Afai ou te pa'i atu tau lava o ona ofu, ona ou malolo ai lea”*. O le sailiga o lenei fafine mo se filemu a'o feagai ma ona mafatiaga, na ofoina ai e Iesu ia te ia le *filemu*.

Tatalo: Le Atua e, auina mai lou filemu a o feagai ma puapuaga, Amene!

Aso Lulu – Novema 5: “Filemu i le pota ma le mafaufau”

Tusi Faitau – Faataoto 3:13-26 (*Peace in wisdom and understanding*)

Matua – f.13: *“Amuia le tagata na te maua le pota, ma le tagata na te maua le mafaufau;”*

O le lapataiga e lē faatulagaina i se soifuaga. O se apoapoiga faamalosi i le sailiga o le pota ma le malamalama; peita'i, o loo uunaia ai le faalagolago i le Atua i le feutaga'i ai i se faamoemoe mo faamanuiaga matagofie. *“O ona ala o ala matagofie; ma ona magaalā uma o i ai le manuia. O ia o le laau o le ola i e tago atu ia te ia.”* Ua faamatalaina lenei faataoto i se faamanuiaga e sili atu ona aoga nai lo le ario, auro, ua sili atu fo'i nai lo penina. Ua aumaia faatasi ai ma le ola atali, faapea fo'i ma le filemu i a'i latou e taliaina.

Atonu e tele faataoto o loo faamatala ai le taua o amioga e tatau ona ola ai le tagata. Peita'i, i lenei lava faataoto, e foliga mai e sili ona malosi o apoapo-a'iga e uiga lea i amioga e tatau ona faatino. O le pota fo'i ma le malamalama o se taua lea mo le amio ua faalagolago i le Atua. O se oloa taua foi e faamua-mua le Atua i ona ala uma. O lea pota ma le malamalama e faavae i le laau o le ola, *“O ia o le laau o le ola i e tago atu ia te ia.”*

Tatalo: Ia matou maua le pota ma le mafaufau e saili ai le filemu, Amene!

Aso Tofi – Novema 6: “Na te faafoisia mai lo'u agaga” (*He restores my soul*)

Tusi Faitau – Salamo 23:1-6

Matua – ff.-1-3a : *“O le Alii o lo'u leoleo mamoe o ia; e leai se mea ou te matua ai; na te ave a'u i le mea e i ai le vao mu'a ou te taoto ai. Na te ta'ita'i ia te au i tafatafa o vai e tafe lemu; na te faafosia mai lo'u agaga....”*

Po ua e maua se moe filemu? Atonu e i ai taimi e maua ai le moe filemu, a e le o taimi uma fo'i. O lenei vaega taua o loo aumaia faapitoa lava e le fai

salamo le mafutaga o le tagata ma le Atua. O le mafutaga na faavae i le filemu, ona o le Atua na te faafosia agaga. O lea lagona ona o se mafutaga mafanafana lea na faatusaina ai le Alii, *‘O le leoleo mamoe o ia’*. Na te aumaia le filemu, e tusa pe feagai le tagata ma mafatiaga o le soifuaga.

Tatalo: Le leoleo mamoe lelei, faasao o matou ola mai faigata, Amene!

Aso Faraile – Novema 7: “Filemu e ala mai ia Iesu Keriso”

Tusi Faitau – Sakaria 9:9–17 (*Peace comes through Jesus Christ*)

ff. 9-10: *“Ia matua fiafia o oe le tama fafine a Siona; ia alaga fiafia o oe le tama fafine a Ierusalem; faauta o le a alu atu lou Tupu ia te oe; o ia o le amiotonu ma le faaola; e agamalu o ia, o loo tietie i le asini, o le tamai asini foi. Ou te faaumatia le kariota i Efaraima, ma le solofanua i Ierusalem, e faauma-tia foi le aufana o le taua; na te tautala foi i le leleiga i nuu ese; o lana pule e pau mai i le sami e oo atu i le sami; e pau mai le vaitafe e oo i tuluiga o le lalolagi..”*

E faapefea ona maua le filemu i se lalolagi ua faaleagaina ma nuti-momoia? *“Ia matua fiafia o oe le tama fafine a Siona; ia alaga fiafia o oe le tama fafine a Ierusalem; faauta o le a alu atu lou Tupu ia te oe; o ia o le amiotonu ma le faaola”*. O lea se tali sa faamautinoa ai e le perofeta o Sakaria e tusa ai ma feteenaiga. O se valaau mo tagata o loo i Ierusalem ina ia olioli i le afio ifo o lo latou tupu, e agamalu, e amiotonu, a o Ia o le faaola. O lea tupu e aumaia le filemu mo tagata uma, e oo atu i tuluiga o le lalolagi.

Tatalo: Afio mai, ia matou maua lou filemu i aso uma, Amene!

Aso Toona’i – Novema 8: “Filemu i le faatasi mai o le Agaga”

Tusi Faitau – Roma 8:5–11 (*Peace through the Spirit’s presence*)

Matua – f.5-6: *“Auā o e i la le tino e loto atu i latou i mea a le tino; a o e i la le Agaga e loto atu i mea a le Agaga. Auā o le loto i la le tino o le oti lea; a o le loto i la le Agaga o le ola lea ma le manuia.”*

O lenei fuaitauga o loo aumaia ai se uiga faalilolilo e uiga i le faamoemoe i le faatasi mai o le Agaga. O se faamautinoa mo se sa’olotoga ua maua ia Iesu, faatasi ai ma le alofa e le mavae o le Atua. O le so’otaga lea o le loto i le Agaga e ola ai i le manuia tumau. I le tele ai o mafatiaga ma tiga, e mafai ona maua le mafanafana ma le filemu i le faatasi mai o le Agaga. O le ola filemu i se lumana’i olioli e le mafai ai ona vavaeeseina mai ai le tagata i le alofa o le Atua. O le Agaga ua maua ai le ola ma le filemu i le feagai ai ma le lalolagi faigata.

Tatalo: Fesoasoani mai i aso e lē taugamalie ai le ola, Amene!

SAILIGA MO SE FILEMU (SEARCHING FOR SHALOM (2))

Aso Sā – Novema 09: “Aua le popole” (Do not worry)

Tusi Faitau – Mataio 6:25–34

ff. 33-34: *“A ia outou muai saili lona malo ma lana amiotonu; ona faaopoopo-ina atu lea o ia mea uma ia te outou. “O lenei, aua tou te popole i le aso a taeao; auā e popole le aso a taeao i ana lava mea. E tataui i le aso lona lava leaga.”*

O le fuaitauga o le asō, ua felu’iaina ai tagata faatuatua ma nisi sa faalologa i le lauga faaauau a Iesu i le mauga. Ua na iloilo lelei mataupu faaleagaga i le uunaia ai lagona popole, ia taula’i i le Atua ma lona malo. O le

faalagolago i le Atua e mafai ona maua ai le tamaoaiga ma le amiotonu o le Atua. *“A ia outou muai saili lona malo ma lana amiotonu; ona faaopoopoina atu lea o ia mea uma ia te outou. O lea apoapoiga ina ne'i popole i manaoga o le tino. O le Atua e manatu mamafa i le natura o se faamaoniga i ana sauniuniga mamalu. O le manaoga poo le faamalieina o le ola e le mafai ona foia ai faafitauli o le manaoga faapitoa. E le o le ofu, meaai, poo le vai, “Se a foi le mea tou te popole ai i ofu? aua ne'i outou popole i o outou ola, i mea tou te aai ai, ma mea tou te inu ai, po o outou tino, i mea tou te oofu ai”.*

O le su'esu'eina o mea lilo loloto i se nofoaga e pei o le mauga na lauga ai Iesu. O lea sa lalaga ai se lapataiga malosi i amioga e ao ona faatino i le faamaoni. Ua valaauina ai tagata uma ina ia malaga ma le faatuatua, ia aunoa ma le lagona popole i manaoga o le tino. O le malaga e moomia ai le saili i le Atua i lona filemu e tetea atu i tofotofoga o le soifuaga. O le Atua ma ana sauniuniga e faamaoni, o lona lea malo amiotonu.

Tatalo: Le Alii o lo'u leoleo mamoe, e leai se mea ou te mativa ai, Amene!

Aso Gafua – Novema 10: “Mai le vao lafulafua” (*Out of the wilderness*)

Tusi Faitau – Isaia 32:14-20

Matua – ff.16-18a : *“Ona mau ai lea o le faamasinoga i le vao lafulafua, e nofo foi le amiotonu i le fanua lafulemu. O le mea e tupu i le amiotonu o le manuia lea; e tupu mai foi i le amiotonu le filemu ma le saogalemu e faavavau. E nonofo foi lo'u nuu i le mea e manuia ai, ma fale e saogalemu ai...”*

O suiga o le lalolagi i mea na tutupu ai, e oo mai lava i ona po nei, lea o loo atagia mai i le fuaitauga o le asō. Ua tele fanua tuufua na afua i fete'enaiga, e faapea fo'i i suiga faalenatura. E afua lea faafitauli ona o le faaogaina o suau'u ma susunuina ma aafia ai eleele ma mumū afi ai le faatoaga atoa; e o'o fo'i i le ea lea e maua ai le okesene ma isi. E ui i lea faatafunaina, o lea fuaitauga o loo aumai ai se faamanatu e i ai lava le mana faamalolo o le Atua ma lona filemu i le foafoaga. O le mana ta'ita'i o le Atua, ma lana amiotonu e faamalieina ai le tagata feagai ma tofotofoga, e o'o fo'i i le faatafunaina o le soifua taumafai, e faatasi mai lava le Agaga o le Atua.

Tatalo: Agaga Paia e, faamalosia i matou e tausia le foafoaga, ma avatu i ai le filemu i lou faamalologa, Amene!

Aso Lua – Novema 11: “O le faatuatua e pese” (*A faith that sings*)

Tusi Faitau – Galuega 16:22-34

Matua – ff.25-26: *“O le tulua o po ma ao, ua tatalo ai ma pepese o Paulo ma Sila i le Atua; ua faalogo foi ia te i laua e ua noanoatia. Ona faafuasei mai lea o le mafui'e tele, ua luluina ai le faavae o le fale puiui; ua matala mai ai uma faitotoa, ua maunuunu ai foi o latou noanoaga uma lava.”*

I se taimi o le atuatuvaale po o le fememea'i, o lea sa faateia ai pagota ma leoleo o le falepuipui i se mafui'e tele. A o le'i tupu lea faalavelave, sa muamua lava ona i ai le pogisa, o e na saisaitia, ua le mautonu ma ua fefefe. I lea lava pogisa sa i ai tagata ua pepese leo tetele. Peita'i, o le leoleo falepuipui ua lagona le fefe ina ua ala a'e ua matala uma faitotoa o le fale, ua oo fo'i i e sa noanoatia. O le pese, o se tasi o faatinoga e faailoa ai se faanaunautaiga. I le iai i taimi o puapuaga, e moomia ai le pese ia maua ai le to'afilemu o le loto.

Tatalo: Faafetai mo pese e faatuputele ai lo matou ola faatuatua, Amene!

Aso Lulu – Novema 12: “Faamafanafanaga i le sailiga”

Tusi Faitau – 1 Tesalonia 4:13–18 (*Encouragement in the search*)

Matua – f.18: “O lenei, ia outou fefaamafanafanai i nei upu.”

O le alofa o se vaaiga masani e taula'i lea i le faatinoga na faia e Iesu i luga o le sataro. O lea fo'i alofa atonu e saili ai se ala sopo i le tasi itu o le ala. O lea lava alofa ia atagia ai le amanaia mo nisi o loo faanoanoa, ma puapuagatia, o pologa, ma feagai ma faigata mata'utia. E faatupuina le faamoemoe i le feagaiga faavavau faatasi ma le Alii i le ofoina o le faamafanafanaga mo e ua nutimomoia. O le saili fo'i i le filemu e tusa ma le alofa tunoa o le Atua. O le apoapoai atu o Paulo e tusa ma e ua momoe ona o Keriso. Ua latou momoe ma faatalitali i le feagaiga tumau, i le manuia faavavau e tusa ma le faamoeme ona Iesu Keriso. O Iesu Keriso na te saunia le faamafanafanaga i e o loo ola pea, ma i latou ua momoe, o Iesu lava e faatasi ma i latou i le ola e faavavau. O lea faamalosi e ta'ita'iina atu ai le 'au faatuatua i se faamoemoe mautu.

Tatalo: Le Atua e, faamalosia i matou i le taofi mau le faatuatua, Amene!

Aso Tofi – Novema 13: “Finafinai” (Perseverance)

Tusi Faitau – Roma 5:1–5

Matua – ff.3-4: “E le gata foi i lea, a ua tatou mitamita foi i puapuaga, ina ua tatou iloa o le puapuaga e tupu ai le onosai, o le onasai e tupu ai le mautinoa, o le mautinoa e tupu ai le faamoemoe.”

O le mausali, o le finafinai, ma le filigā; o loo aumaia ai le malosiaga e tutumau ma tete'e atu i faigata. E aofia i lenei ituaiga gaioiga eseese le taua o o le onosai. O le manumalo mai mafatiaga, o le finafinai i le faatuatua, mitamita i le faamoemoe i le manuia mai le Atua. O lea mautinoa ua faamaligi mai i le alofa o le Atua e le Agaga paia. E amata lava le faamamafa o le aposetolo i le ta'uamiotonuina e ala i le faatuatua e maua a le filemu. O le faamoemoe o loo i ai le olioli i puapuaga, e faapea fo'i le agalelei i le maliu ma le toe tu o Iesu Keriso, e faamalosia ai le tagata faatuatua.

Tatalo: Ia faatumauiina pea lo matou ola talitonu i lou alofa, Amene!

Aso Faraile – Novema 14: “O le ala e ta'ita'iina ai i aiga”

Tusi Faitau – Ioane 14:15–24 (*A path that leads home*)

Matua – ff.17-18: “O ia o le Agaga o le upu moni, e le mafai e le lalolagi ona talia o ia, auā, ua le vaaia o ia, ua le iloa foi o ia; a o outou, ua outou iloa o ia, auā e tumau pea ia ia te outou, e i ai foi o ia i totonu ia te outou. Ou te le tuua outou o mātuaoti, ou te sau ia te outou.”

“O a'u nei le ala, ma le upu moni, ma le ola” (f.6). So o se atunuu e moomia lava ni ata ta'iala. O se fesoasoani mo tagata fai malaga. O fale fausia e moomia ai ni ata ta'iala mo tagata uma. Mo se taufetuliga faa-le-faatuatua, o lea ua faamanino ai e Iesu se ta'iala faamafanafana ma faamalosi mo tagata faatuatua. O lea folafolaga ua saunia ai se ala mo tagata talitonu e aga'i atu i se nofoaga matagofie. E tele ala eseese e mafai ona iloa pe afai e savalia. Peita'i, o le ala lea e fetalai i ai Iesu, o Afioga o le Atua. O lea ala e moomia ai le fesoasoani o le Agaga, e fautua, e fesoasoani, ma faalototele ai i ona soo.

Tatalo: Faafetai i le Tusi Paia e ta'iala ai o matou ala uma, Amene!

Aso Toona'i – Novema 15: “Saunia se nofoaga” (*Preparing a place*)

Tusi Faitau – Ioane 14:1-3

Matua – ff.1-3: “*Aua le atuatuvaile o outou loto; ia outou faatuatua i le Atua, ia faatuatua mai foi ia te au. E tele mea e nonofo ai le maota o lo'u Tamā; ana leai, po ua ou fai atu ia te outou, ou te alu e sauni se mea e nonofo ai outou?*”

O lea faitauga e amata lava i le faailoaina o se lagona “*aua le atuatuvaile o outou loto; ia outou faatuatua i le Atua, ia faatuatua mai foi ia te au*”. O lea upu atuatuvaile o se faafitauli loloto sa feagai ma le 'au soo. O lea lagona sa faamalosia ai e Iesu le faatuatua i le Atua, faatasi ma Ia. O se nofoaga e moomia ai le lototele, nai loo le masalosalo. O le ta'iala e maua ai le nofoaga filemu. O lenei folafolaga, ua faailoa mai ai le tele o nofoaga ua uma ona saunia mo tagata uma e faatuatua ma talitonu. O le Agaga Paia e ta'ita'i ma mafutaina loto ma agaga o e usiusitai i a'oa'oga ma malamalama i le sootaga ma le Atua. Mo tagata matitiva, e faapefea ona saunia se nofoaga mo i latou?

Tatalo: Foa'i mai le lototele ma le onosai e maua ai le manumalo, Amene!

AURO (GOLD)

1. O LE TAUA O AURO (*The value of gold*)

Aso Sā – Novema 16: “Na faia e le Atua le auro” (*And God created gold!*)

Tusi Faitau – Kenese 2:10-14

Matua – f.12: “*E lelei foi auro o lea nuu; e i ai petala ma maa soama*”

O le faitauga o le asō, ua aumaia ai le auro o se vaega taua tele i le vaaiga a tagata. Atonu o lea ata faatusa mai se vaega o le foafoaga na faaiu i ai galuega foafoa o le Atua, o mea uma ua lelei ma atoatoa. Peita'i, i se vaaiga uiga loloto i le auro, e foliga mai o se faatusa e uiga i le laueleele e lausiusi ma tupu olaola. Aisea na ta'ua ai e le tusitala o Kenese le auro i lea fuaitauga?

O le auro o se u'amea taugata o loo faamatalaina foi i se vaitaimi o le Tusi Paia sa ofoina e tagata mo le teuteuina o fale ma le fausiaina o le Malumalu. O le petala o se tasi o oloa taua e pei ona faaigoaina o le pulu (resin) mai se laau. E faatusaina o se manai na saunia e le Atua i le vao e fafaga ai lona nuu o Israel (Numera 11:7). O le maa soama o se tasi o oloa taua e felanulanua'i e faatusa i le toto na maligi o Keriso e faamamaina ai agasala pe soloiesea ai le pogisa o loto faigata ma faamalamalama e pei o se ie sinasina o le kiona. Ua faamanuiaina e le Atua le foafoaga i oa matagofie o lona lea alofa tunoa ofoofogia e aumaia ai se faaleleiga i le tagata ma le Atua foafoa.

Tatalo: Ia matou iloa tino lou faamaoni i le foafoaga, Amene!

Aso Gafua – Novema 17: “O se talosaga faa-auro” (*A golden proposal*)

Tusi Faitau – Kenese 24:15-27

Matua – f.22: “*Ua uma ona feinu o kamela, ona avatu lea e le tagata o le mama auro, o le vaeluagalemu o le sekeli lona mamafa, ma taulima auro e lua mo ona lima, e sefulu sekeli o lo la mamafa lea.*”

O lea tala ua faaalai ai le faamaoni o le Atua ia Isaako ma le auauna o lona tama o Aperaamo. O se tusitusiga e taula'i i se vaaiga i faiga o pulega a alii i se

faamoemoe o se feagaiga poo se faaipoipoga. Aiseā na auina atu ai e Aperamo lana auauna e saili se avā mo lona atalii o Isaako; ua lē afafine o Kanana, ae o le ava o le ituaiga o lona tamā? Atonu o lea se faaeteetega auā o tagata uma ua fesoota'i i le Atua. Sa faaalua ia Repeka se gaioiga tala feagai e uiga lea i le agalelei atu i tagata ese. O le a se faatusa o le auro i lea tala?

Tatalo: Faafetai le Atua, o auala e sailia ai le sa'olotoga i se talosaga faa-auro i o matou tagata, Amene!

Aso Lua – Novema 18: “Aua le faaputua auro” (*Don't store up gold*)

Tusi Faitau – Teuteronomie 17:14–17

Matua – f.17e: “*Aua foi ne'i faateleina naua e ia o ario ma auro mo ia.*”

O le faitauga o le asō, ua aumai ai se lapata'iga i ta'ita'i e ono maua i le faaosoosoga, i le faaogaina o tulaga, e avea ma ala e maua ai ana lava mea. O se faatonuga e uiga i le sailia lava o se tupu e manino lava le tele o tamaoaiga ona o se tofiga e ao i tagata uma ona auauna i ai. Peita'i, o se tofiga e ao ona faia se faamasinoga tonu ma le filemu, ma faamautinoa le sa'olotoga mo tagata uma. E faapefea ona faasa'olotoina i tatou mai le taua o tupe, ma tulaga, aga'i i faamanuiaga a le Atua?

Tatalo: Matou te faafetai le Atua, i lou faamalamalama ina i matou i le auauna ma le alofa, Amene!

Aso Lulu – Novema 19: “O le taunuu o Seepa le tupu fafine”

Tusi Faitau – 1 Tupu 10:1–13 (*The arrival of the Queen of Sheba*)

f.10a: “*Ua foi mai e ia i le tupu o auro e tasi le selau ma le luafulu o taleni....*”

E lua nai vaega e fia faailoa: muamua, o le amanaiaina e le tupu o Solomona le oo ifo o le Masiofo o Seepa, e faapea foi i le fefaasoaai o meaalofo e aofia ai le auro ma mea manogi. O lea faiga o loo atagia i lenei seneturi 21; Ma le vaega mulimuli, o fuafuaga sa faataunuuina e Solomona e faailoa atu ai le paia o le Atua mo Isaraelu e ala i le tōsina o lagona o tagata e faapea foi le taliaina o le Masiofo o Seepa, i le agaga fiala ma le aloia. Ua avea ai foi Solomona ma tupu e faatino le faamasinoga tonu ma le amiotonu o le Atua. E faapei ona faaalua e Iesu i ona Soo ia ola mo le alofa, filemu, ma le faamasinoga i le lalolagi e o'o mai i ona aso nei.

Peita'i ane, i le pisi ai o le taugata o lenei soifuaga ma le tau o meaalofo poo auro. O le faagaetia e mafai ona faaogaina e pei o le faatinoga sa faia e Solomona. O se faamanatu i le taua o mafutaga e faailoga ai le faaaloalo o le tasi i le isi, ma se faamanatu ina ia faaalua le amiotonu o le Atua i le lalolagi.

Tatalo: Le Alii e, faafetai i le mafaufau fetuunai e faalia ai le alofa e faavae i lou amiotonu, Amene!

Aso Tofi – Novema 20: “Ofoina atu o auro” (*Offerings of gold*)

Tusi Faitau – 1 Nofoaiga Tupu 29:1–9

Matua – f.9a: “*Ona fiala lava lea o le nuu, aua na foi ma le loto, aua na latou foi ma le fiala ma le loto atoatoa i le Alii....*”

O lea ua faaalua le lē mautonu e uiga i le auro, peita'i o faamanuiaga mai le Atua ua faaalua ai le fiala tele. E pei ona aumaia e le fai Salamo 133 faamanuiaga o le “ola e faavavau, ola atoatoa e faavavau. O lea faamanuiaga e

auala mai ai le manumalo i le nonofo faatasi *“Faauta o le mea e matua lelei ma le matagofie lava, pe a nonofo faatasi lava o uso.”* O a ni auala e ta’ita’ia ai le ‘au faatuatua i le ofoina o meaalofo?

Tatalo: Le Atua e, ia faailoa ou ala e ta’ita’iina ai i le ola ofoina, **Amene!**

Aso Faraile – Novema 21: “O le fale o auro” (*A house of gold*)

Tusi Faitau – 2 Nofoaiga Tupu 3:1-8

Matua – ff.4e, 9e: *“...Ua ufi ai e ia i totonu i auro lelei...Ua ufi foi e ia o afeafe aupitoaluga i auro.”*

O lea ua auiliili mai i lenei faitauga, le fausiaina o le malumalu lea na faia e Solomoa. O lea galuega tele sa faatino ma le faateete. O se galuega e faamanatu ai le faiā o le tagata ma le Atua. Atonu e faapea fo’i ona pese le fai Salamo 139, e leai se mea e lilo i le silafaga o le Atua i le tagata. O le tagata o le malumalu matagofie na faia e le Atua. E faapefea ona vaavaai le tagata i ia te ia lava, o le fale auro na fausiaina e le Atua foafoa?

Tatalo: Faafetai i lou matagofie ua matou molimauina i aso uma, Amene!

Aso Toona’i – Novema 22: “O mea e lē mafai ona faatau e le auro”

Tusi Faitau – Iopu 28:12-19 (*What gold can’t buy*)

f.12: *“A o le poto e maua lea ifea? Po o ifea foi le mea o i ai le mafaufau?”*

Pe mafai ea e le tupe ona faatau mea uma i le lalolagi? Pe mafai foi e le auro ma le ario ona maua mea uma i le lalolagi? O lea faitauga na faamatala ai e Iopu, e lē mafai ona faatauina le atamai, poto, ma le mafaufau i se auro. E faatauaina le tamaoiga; ae o lea ua faatau e le tusi faitau o lenei aso le poto ma le mafaufau, o mea e aumai e le Atua.

Tatalo: Faapulaina o matou ala uma i lou poto mai le lagi, Amene!

AURO (GOLD)

2. SILI ATU NAI LE AURO (*Better than gold*)

Aso Sā – Novema 23: “Poto: o le filifiliga sili – sili atu nai le auro”

Tusi Faitau – Faataoto 8:1-21 (*Wisdom: a better choice – better than gold*)

Matua – f.10: *“Ia outou talia la’u a’oa’o atu, a e aua i le ario; ma ia talia le poto e sili le auro e aupito lelei”*

O le a se’i o tatou iloilo mataupu e uiga i auro ma ario; e faapea fo’i faamatalaga i mea eseese e aupito i sili ona taua, i faitauga mai le Tusi Paia i lenei vaiaso. A o lenei lava Aso Sa, ua aumaia ai se faamatalaga mo se gaoiga e moomia ona faaleleia atili ai, ma aga’i i se filifiliga sili. E faapefea ona faatusalia le auro i le poto e sili atu i le lagi ma le lalolagi? O le poto o se faatinoga na siitia e fai ma faavae e uiga i le tino paia, o se sao taua tele mo se faipaaga e faavavau ma le Atua i se faatulagana o mea na foafoaina e le Atua.

I lenei faataoto, o loo faatusaina ai le poto e tu i mea maua ma taua ma le leo tele i fanau a tagata. E faapea fo’i i le auro ma le ario ua faatusa lea i le amio ua leaga, ua ino’ino i le upu moni ma le faamaoni. E faapefea se anoanoa’i o le mafaufau i se olaga faaleagaga? O le poto mai se manatu faavae i amioga faapaiaina o se tino e paia. O lea mataupu e faailoa mai ai le taua o le poto poo le atamai, e sili atu nai lo le auro ma le ario. O lea

faamalosi e uunaia ai le ola sailiili, faalagolago, ma filifili tatau mo se olaga paia. O le poto o se ala i le faamasinoga tonu ia maua ai le ola, ma se olaga atoatoa i se lalolagi fetausia'i.

Tatalo: Faatumu i matou i le poto, le alofa, ma le malamalama, Amene!

Aso Gafua – Nov. 24: “O poloaiga e suamalie nai lo le meli ma sili nai lo le auro” (*Commandments sweeter than honey and more precious than gold*)

Tusi Faitau – Salamo 19:7-14

Matua – ff.9e-10a: *“O faamasinoga foi a le Alii e moni ia ma tonu uma lava...E silisili ona lelei i le auro, o le auro e sili ona lelei e tele...”*

O lenei poloaiga, o loo auiliili ai e le fai Salamo faamanuiaga i le tausisi ai i afioga a le Atua. O se poloaiga e uiga i le faafouina o agaga, poto, atoa ai ma le malamalama (ff.7-8). O se faamanatu faamalosi e uiga i le mamalu o le Atua. O ana tulafono e i ai le amiotonu. O se ta'iala fo'i i lona alofa tunoa ma se faamagaloga. O lenei poto paia, e suia ai lagona ma taula'i ai le faamoemoe i le Atua, na te foa'i mai mafauauga ma upu e gagana ai, e ala i ana afioga.

Tatalo: Ia matou faatāua lau Afioga i o matou ala, Amene!

Aso Lua – Novema 25: “Fiafia i tulafono a le Atua e sili lona taua nai lo le auro” (*Delight in God's law that's more valuable than gold*)

Tusi Faitau – Salamo 119:127-136

Matua – ff.127-128 : *“O le mea lea ua sili ai lo'u manao i au poloaiga i le auro, o le auro lelei lava. O le mea lea ou te manatu ai ua tonu au feau atoa uma lava; ou te ino'ino i ala pepelo uma lava.”*

O loo faaauau mai lava se vaaiga i tusitusiga o ananfi, i le faitauga o le asō. E pei ona faamamafa mai ai afioga o le Alii, ff.9e-10a. Peita'i, o le tulafono lea ua aumaia i le tusi faitau o lenei aso. Ua faamamafa mai ai le tulafono e sili atu lona taua nai lo le auro. O le tulafono o ta'iala, faamanuiaga, atoa ai ma le ino'ino i ala o le pepelo. O lea Salamo o loo aumai faatasi ai ma lona faamatalaina e uiga i le alofa atoatoa i le faia o se mafutaga. E faapefea ona puipuia le alofa mai le faatulafonoina?

Tatalo: Faamalamalama au tulafono i o matou loto, Amene!

Aso Lulu – Novema 26: “Tofotofoina ia pei o le auro”

Tusi Faitau – Iopu 23:1-10 (*Tested to be like gold*)

Matua – f.10: *“A e peitai ua silafia e ia lo'u lava ala; a tofotofoina a'u, ou te sao atu ai e pei o le auro.”*

O lea ua faailoa mai le agaga o le fiafia i le faia ai o se mafutaga alofa. Peita'i, o loo ua suia aga'i i se lagona o le atuatuva/popole ona o tofotofoga. A ua faailoa manino mai lava i le matua, *“O se tasi o mafuaaga taua o le manatunatu loloto i afioga o le Atua, ina ia saunia lagona i taimi ma aso o faigatā (Salamo 19:14)”*. O galuega poo fale faigaluega, e i ai lava manuia e tutupu i ai faatasi ma faigata. O se ata faapea lea o loo aumaia i le faitauga o lenei aso. Ua taumafai uo a Iopu e faamafanafana ia te ia ma taumafai e tuufaafaeagai ona tiga, atonu o se agasala, po ua tu'ulafoaiina o ia e lona atua. Peita'i, o lea vaaiga na tali ai Iopu i lona faatuatua e toe faafosia e le Atua mea uma lava. O le malamalama ma le atamai, na faatau ai e Iopu le Atua, nai loo

le faaalua atu o ia i le amiotonu. E ui lava na le iloa e lopus le afuaga o ona puapuaga po ona mafatiaga. A o se taimi o puapuaga a lopus, na ia lagona ai e lē tu'ulafoain e le Atua o ia *"Ona fai ai lea e le ua amiotonu le faatonuga ma ia, ona ou sao ai lea e faavavau i le na te faamasino mai ia te au...A e peitai ua silafia e ia lo'u lava ala; a tofotofoina a'u, ou te sao atu ai e pei o le auro."*

Tatalo: Le Alii e, fesoasoani mai i taimi ma aso o faigata o le ola, Amene!

Aso Faafetai (*Thanksgiving Day*)

Aso Tofi – Novema 27: "Faamamaina pei o le auro" (*Refined like gold*)

Tusi Faitau – Malaki 3:1-12

Matua – f.3a: *"E nofo o ia, o lē tunu ma faamama i le ario; na faamamaina le fanua a Levi, na te faate'a ese foi le eleele ia te i latou e pei o le auro ma le ario..."*

I se vaaiga i taulaga, e tatau i tagata ona avatu taulaga atoa ma taulaga sefuluai e fai ma faailoga o lo latou alolofa i le Atua. O lea manaoga o se faamoemoe e tuuina atu a latou taulaga e fai i le amiotonu. O le faailoga, e faailoa ai le alofa mutimutivale o le Atua. Peita'i, sa faaletonu le 'au Sa Levī, ua ala ai se tautinoga, e auala mai i le Atua, i le faamamaina o agasala *"E nofo o ia, o lē tunu ma faamama i le ario; na faamamaina le fanua a Levi, na te faate'a ese foi le eleele ia te i latou e pei o le auro ma le ario"*. O lea valaaulia e aofia ai tagata uma i le faamamaina e o'o lava i le foafoaga.

I le feagai ai ma tofotofoga faigata, e mafai ona taulimaina se faamoemoe ma le olioli i se faamalologa, faamafanafanaga, ma faalototeleina i le avea ai o fanua, eleele, e faapea foi i tagata e pei o le auro ua faamamaina. E faapefea ona ofoina se taulaga i le Atua? O le faitaulaga ea i le Atua o le agalelei atu i e mama'i, matitiva, mafatia,, popole, ma atuatuvalet? O nei vaaiga eseese ua faaalua ai le taua tele o le ofoina o mea silisili ua mafai ona faatinoina.

Tatalo: Le Atua e, ia faasaga tonu o matou ala e faia le amiotonu, Amene!

Aso Faraile – Novema 28: "Faatuatua e silisili nai le auro"

Tusi Faitau – 1 Peteru 1:3-9 (*Faith more precious than gold*)

Matua – f. 7: *"O le tofotofoga foi o lo outou faatuatua, e silisili ona aoga i le auro e faaumatia, e ui lava ina tofotofoina i le afi, e avea ma mea e iu ai i le viiga, ma le mamalu, ma le manuia, pe a faaalua mai Iesu Keriso."*

Ua faailoa e Peteru, o Keriso o le afuaga o le faamoemoe ola mo se olaga faatuatua. O le faamamaina, o le aveesea lea o uiga faiaina ma le faaletonu; aua na faia le tagata ma faatusa o le Atua. O lea faatinoga mae'ae'a, o le a le toe i ai se faaleagaina, i le tofi matagofie na faia ai le tagata(f.4). O lea faamalosia ua faamautuina ai se lumanai e sili atu nai lo i le taimi nei. A feagai ma mafatia i le faanoanoa ma soo se ituaiga tofotofoga *"O le tofotofoga foi o lo outou faatuatua, e silisili ona aoga i le auro e faaumatia, e ui lava ina tofotofoina i le afi, e avea ma mea e iu ai i le viiga, ma le mamalu, ma le manuia, pe a faaalua mai Iesu Keriso."* E faapefea ona ausia le ola tofotofoina? Pe faapefea fo'i ona faalia le faatuatua ia Iesu Keriso e le vaia lava? O le alofa i le Atua e taofiofi ai i le faatuatua ma le onosai, i tofotofoga ma faanoanoaga. E gauai le loto faafetai i le Atua ona o mea ua foaifuaina mai. O le faamoemoe e ola ai e maua ai le olioli ma faaolaina ai.

Tatalo: Le Alii e, siomia i matou i le alofa ma le agalelei o lau Afio, Amene!

Aso Toona'i – Novema 29: “O se aai auro” (*A city of gold!*)

Tusi Faitau – Faaaliga 21:15–21

Matua – f.18: *“Ua ati foi lona pa i maa iasepi; o le aai o le auro lelei lea, ua pei o le tioata manino.”*

O le gagana e uiga i faaaliga lea o loo faamatala ai le matagofie o le Ierusalema fou. O le a sili atu nai loo se isi lava mea, e fausia i le auro ua pei o se maa taua. O le foliga vaaia o le Ierusalema fou e matua telē lava! O lona aofa'i pe tusa ma maila e sefulu lima afe. O lea faaaliga, o se ata e fa'aalia ai o lo'o avanoa lava le aai mo tagata uma. Ma o se faatusa o le aai, o se vaega o le lagi ma le lalolagi fou. O lea se valaau i se olaga e sili ona lelei ma a'oa'oina pea e taula'i i le Atua i lenei soifuaga atoa. E faaaliga lava le Atua i ona tagata i taimi ma aso o le olaga. E faapefea foliga vaaia o le lagi?

Tatalo: Le Atua foafoa, o lau Afio e fou ai mea uma lava, Amene!

O UIGA VA'AIA O LE ATUA: O LE ATUA UA AFIO MAI

(THE CHARACTER OF GOD: THE GOD WHO COMES)

1. O LE FAAMOEMOE O ISRAELU (*The hope of Israel*)

Uluai Aso Sa o le Ativeni (*Advent Sunday*)

Aso Sā – Novema 30: “Taimi o filifiliga mo Maria” (*Decision time for Mary*)

Tusi Faitau – Luke 1:26–38

Matua – f.38: *“Ua fai atu Maria, Faauta, o a'u nei o le auauna a le Alii; ia faia ia te au e tusa ma lau fetalaiga. Ona alu ese ai lea o le agelu ia te ia”*

O le faitauga o lenei aso, o Maria na faali ai le Agelu ona ua alofaina e le Atua. Ua faailoa ia te ia, o le a ia fanauina se tama tane, atonu e uliuli lona lauulu ma pa'epa'e pe enaena fo'i. Aiseā na taua ai Maria, o se taupou o le aiga o Tavita? Atonu, o se auala lea na afio mai ai le Atua i le lalolagi e taulimaina atu i le tagata se auala e ao ona ola ai, mai se lalolagi vevesi e taumafai e tu'ufaafegai mea uma. E le'i fanau Iesu i se maota o le tupu, poo se falema'i. Na fanau Iesu i le fale o manu. Peita'i, o lea tala ia Maria ma Iosefa, e leiā so laua tulaga i se sosaiete poo se faalapopotoga. A o lenei se auala na faa-manino ai tu ma aga o se atunuu e lē taliaina se faalumaina, to'ilalo, faiaina, ma le lē amanaiaina. A o le faatuatua i le Atua, o le Atua na te mafaia ona taulimaina se faailoga ofoofogia, atonu na afua ai le lototele o Maria, *“o a'u nei o le auauna a le Alii; ia faia ia te au e tusa ma lau fetalaiga.”*

O lea tala e uiga ia Iosefa o ia o se alii, a o Maria, o ia o se tamaita'i taupou. Ua suia ai e le Atua le talafaasolopito e uiga i se taupou ma se alii talavou; ona o lo laua lototetele e feagai ma lagona popole ma le tauiviga mo se filifiliga. I lenei vaiaso o le a tatou va'avaai ai 'O le Atua ua afio mai' o le vaitau o le Ativeni (advent), o se tasi vaitau e tulimata'i ai e tagata o latou filifiliga i le Atua. E faapefea ona faia se filifiliga faale-faatuatua i se tasi e faaolaina mai?

Tatalo: Le Atua e, ia faia lava ia te a'u e tusa ma lau fetalaiga, Amene!

Aso Gafua – Tesema 1: “O se tasi o itua'iga itiiti o luta

Tusi Faitau – Mika 5:2-4 (*One of the little clans of Judah*)

Matua – f.2a *“A o oe, Peteleema Efarata, e itiiti oe i afe o luta, a e tupu mai ia te oe mo a'u o lē na te fai ma faipule ia Israelu...”*

O le tala o Peteleema e manino le faatauva'a pe a fua i le laueleele. O le tala i le Malaga a Iosefa ma Maria i Peteleema mo le fanauina o Iesu sa atagia ai fo'i le manatu lea pe a fua i le tau su'e o se mea e nonofo ai faatasi ai ma le nonofo i le fale o manu. Peita'i o le tala a Mika o Peteleema na fanau mai ai le tupu o le lalolagi, o se itu'aiga itiiti o Iuta lea ua avea ma nofoaga sili ona taua tele ma ta'uta'ua ona o faiga a le Atua. E mafai ona fa'aogaina e le Atua i tatou e fa'avae ai lona malo i le lalolagi, e fa'aalia ai lona alofa e ala ia Iesu.

Tatalo: Faafetai i lou faaaogaina o mea faatauva'a ma le itiiti, Amene!

Aso Lua – Tesema 2: “O le Atua o le leoleo mamoe” *(God the Shepherd)*

Tusi Faitau –Ioane 10:11-18

Matua – f.14 *“O a'u nei o le leoleo mamoe lelei; ua ou iloa a'u mamoe, ua iloa fo'i a'u e a'u mamoe.”*

O le avea ma leoleo mamoe o se galuega tumau. E tatau lava i le leoleo mamoe ona latou nonofo faatasi ma a latou mamoe, ma maua ai se sootaga vavalalata i le va o mamoe ma le leoleo mamoe. O le leoleo mamoe na te puipuia mamoe mai luko feai. Afai e leiloa se mamoe pe alu ese mai ma le lafu, e le malolo le leoleo mamoe, e saili ma le finau ina ia toe maua mai. O le Atua lea e afio mai ia i tatou ia Iesu. E faatasi le Atua ma i tatou i taimi uma, na te taitaia i tatou, na te puipuia i tatou, na te silafia i tatou ma mafai ai ona tatou iloa o ia, na te le tuulafoaiina i tatou pe a tatou o'o ifo i le agasala. O i tatou o lana lava lafu, o ona lava tagata. Fetalai Iesu, “O a'u o le leoleo mamoe lelei. O se vaai mai foi ia te au, ua vaai foi o ia i le Tama' (Ioane 14:9), o ia foi o le leoleo mamoe lelei mo ana foafoaga uma.

Tatalo: Faafetai Tama, le leoleo mamoe lelei e te tausi pea mai, Amene!

Aso Lulu – Tesema 3: “O le atali'i ua auina mai” *(The Son who is sent)*

Tusi Faitau –Isaia 9:6-7

f.6a – *“Auā ua fanau mai mo i tatou le tama, ua foaiina mo i tatou le atalii...”*

O le auina mai o Iesu Keriso ua manino ai se fuafuaga tele ua finagalo ai le Atua mo le lalolagi. O Iesu e foliga tutusa lelei ma lona Tama, ua faatasi ma ia, o loo galulue faatasi ma ia i le galuega lava lea e tasi o le faaleleia o le va o le Atua ma tagata. Ina ia usiusitai tagata i le Atua, ma faalagolago i le Atua. O Iesu, o se atalii moni, ua faaalua ai le alofa o le Atua mo i tatou i mea uma na te fetalai mai ai ma faia. O le tama foi lenei, o le Alo, ua foaiina mai e le Atua ia te i tatou. O le pule na te faatuina ma lagolagoina le malo o Tavita (f.7).

Ae e le o le malo tonu lena e afio mai ai le Atua e faatuina. E seāseā ona ta'ua Iesu, o le 'Faufautua Silisili, le Atua Malosi, le Tamā Faavavau, le Alii o le Filemu' (fuaiupu 6). Na afio mai le Atua ia Iesu e faafetaia'i ma faato'ilalo le leaga, e faaali atu i tagata se olaga ese, e faasa'oloto ai i latou mai le nofo pologa i le agasala, e faaali atu ia i latou le filemu e maua mai i le iloaina o i latou e le Atua, o i latou o se vaega o lona aiga. O Iesu o le Alo, e faailoaina le faamasinoga tonu, o le amiotonu, ma le filemu e tumau ma e faavavau.

Tatalo: Faafetai Iesu, mo le faaalua mai o le alofa faamaoni o le Atua i lenei lalolagi, Amene!

Aso Tofi – Tesema 4: “O le Atua o le Pule” *(God the ruler)*

Tusi Faitau –Kenese 49:10-12

Matua – f.10: *“E le avea le tootoo ia luta, poo le faipule ai ona vae se ia maliu mai Sailo, e usiusita’i fo’i atunuu ia te ia.”*

Ua faamatalaina e le tusitala o Kenese se lesona o le faatuatua, salamo, ma le alofa tunoa o le Atua. O lea tala ua faailoa mai ai se mavaega o Iakopo mo lona aiga. O ia faamanuiaga na ala i le tomai o le Atua, e pule aoao i mea na ia faia. E manuia lana fanau ma lona aiga ta’itasi i le faalagolago i fuafuaga silisili ese a le Atua. O lea ituaiga e sefulu ma le lua o Isaraelu, o le a mautinoa lo latou faamanuiaga i le lumanai e tusa ma lo latou malo, i le lotogatasitasi aua o i latou o tagata filifilia a le Atua.

Tatalo: Le Atua e, o lau Afio na fa’atuina Iesu mai i le oti, e te toe faatuina fo’i lou malo i lenei lalolagi ma lou e faavavau, Amene!

Aso Faraile – Tesema 5: “O le areto o le ola” (The bread of life)

Tusi Faitau – Ioane 6:25-40

Matua – f.33: *“Auā o le areto mai i le Atua, o le mea ua alu ifo mai le lagi lea, ma aumai le ola i le lalolagi.”*

I le amataga o le mataupu e 6 o le Evagelia a Ioane, na fafagaina ai e Iesu le lima afe o tagata. A o lea na le popole ai Iesu aua o ia o le areto o le ola; na te faatofusia tagata uma. O le areto e maua ai le ola, e faapena fo’i le tausiga a le Atua i ona tagata. O le faamoemoe ina ia ola le tagata i se olaga moni na foafoaina ai e le Atua. O se sau ia te au e le toe fia ai lava (f.35). I le faai’uga o lana faiva i le lalolagi, i lana talisuaga mulimuli, na faaaogā ai e Iesu le areto e fai ma faailoga o le ola, o se faamanatuga mo tagata uma.

Tatalo: Fa’afetai ua e foa’i mai pea ia te a’u le areto o le ola, Amene!

Aso Toona’i – Tesema 6: “O le a susulu mai le malamalama”

Tusi Faitau –Numera 24:15-19 (The light will shine)

Matua-f.17: *“Ou te iloa o ia, a e le o ona po nei; ou te vaai atu fo’i ia te ia, a e le latalata mai; e alu le fetu mai ia Iakopo; e tu mai fo’i le tootoo mai ia Isaraelu.”*

O loo savalia e tagata Isaraelu le vao, ma ui atu i lea nuu ma o ituaiga eseese. Ina ua latou taunuu i le laueleele o Moapi, ona latou tolauapi ai lea i le auvai o le Vaitafe o Ioritana, e feagai ma le aai o Ieriko. Na filifili e Palako le tupu o Moapi, o le a le faasagatau ia Isaraelu, o le a ia taumafai e aveesea i latou e ala i le aumaia o Palaamo, o se tagata e fesootai ma le Atua, e na te mafaia fo’i ona valoia le lumanai. Ua le mautonu Palaamo pe usitai ia Palako po o le Atua. I le faitauga o le asō, ua valoia ai e Palaamo le tupu o Isaraelu i le lumanai o le a avea e pei o se fetu, o se pule fou mo le lalolagi. **“Auā ua matou vaaia lona fetu i sasae, ua matou o mai e ifo atu ia te ia.”** O le Atua lava lea na ala ia Iesu le tupu o tagata lutaia; o le a avea ma malamalama e susulu atu i le pouliuli ua le mafai ai le pouliuli ona manumalo.

Tatalo: Le Alii e, ia susulu mai lou malamalama e pei o se fetu pupula, e tulieseai lo matou pogisa uma, Amene!

O UIGA VA’AIA O LE ATUA, O LE ATUA UA AFIO MAI (THE CHARACTER OF GOD: THE GOD WHO COMES)

2. O se malamalama sili (A great light)

Aso Sā – Tesema 7: “O a’u nei o le malamalama o le lalolagi”

Tusi Faitau –Ioane 8: 12-30 (*I am the light of the world*)

Matua – ff. 12e, 17-18: *“O a’u nei o le malamalama o le lalolagi; o le mulimuli mai ia te a’u, e le savali o ia i le pouliuli, a e ia te ia le malamalama o le ola...Ua tusia i la outou tulafono, e moni le mau a tagata e toalua. O a’u nei lē molimau ia te au, o loo molimau foi ia te au le Tamā ua auina mai a’u”*

O le tautinoga o le alofa moni lea ua faasoa mai e Ioane le aposetolo, ina ia ola mautinoa ai le tagata faatuatua i le faaolataga ua foaiina mai e le Atua. Ua faamalamalama e le Alii i tagata, o ia o le malamalama ua uma ona silafia e lona Tamā. O lona uiga, o le mea mautinoa e aunoa ma se masalosalo, tau lava o le faatuatua ma talia i le loto ma le agaga faafetai. O le mulimuli i le Alii o le faia lava lea o lona finagalo, o lo tatou laveaiina fo’i lea mai i le loloto o le agasala i lenei lalolagi. O lea fetalaiga a Iesu, sa faalaeiau ai le au soo, ina ia aua nei pouliuligia le lalolagi i le taufaasese, ma le faapologaina. O lea malamalama e faasusuluina ai le mea moni, ma le sa’olotoga mo tagata uma. O le sulu e tau pulapula a’e e pei o le alu a’e o le la i le taeao segisegi, ina ia pepese fiafia ai manulele, e fafanuina ai le foafoaga ma le lalolagi i lona pupula matagofie. Ua faaalua e Iesu o lona natura paia e tutusa ma le Atua, e valaaulia ai tagata uma ia opogi le malamalama o le upu moni e faasa’oloto mai i latou i le pologa. O se faamalosi i le itu faaleagaga i le ola ai ia Iesu o le malamalama.

Tatalo: Ia matou susulu atu lou malamalama i le lalolagi, Amene!

Aso Gafua – Tesema 8: “Ua vaaia e tagata le malamalama sili”

Tusi Faitau –Isaia 9:2-5 (*People have seen a great light*)

Matua – ff.2, 3a-4a: *“O le nuu sa savavali i le pouliuli, ua latou iloa le malamalama tele; o e sa nonofo i le nuu o le ata o le oti, ua pupula mai ia te i latou le malamalama. Ua e faato’ateleina le nuu, ua e faateleina lo latou fiafia... Auā ua e gauia le amo o lana avega....”*

I le Ativeni tatou te tutuina ai le moliga’o mo le fiafia. Tatou te aloa’ia fo’i le faamanatuina o le Kerisimasi ma le agaga fiafia. E maua le agaga fiafia i le avatu ma le aumai o meaalofa, ma feiloa’i ai ma aiga ma uo. O le lagona e faamanatu mai ai pea i o tatou loto le agaga fiafia, ma le malamalama ua suluia ai le pogisa sa nofo pologa ai i le lalolagi e ala i le agasala.

Tatalo: Le Alii e, ia matou olioli e manatua lou afio mai ia i matou i lenei tausaga., Amene!

Aso Lua – Tesema 9: “O le ‘olo maualuga” (*Fortress*)

Tusi Faitau –Salamo 94:17-23

Matua – ff.18-19,22 : *“Na ou fai ane, o loo mapeva lo’u vae; ona taofi a’e lea o a’u e lou alofa, le Alii e. O le tele o manatunatu i lo’u loto, ua fiafia ai lo’u agaga ona o faamafanafanaga mai ia te oe... A e faia le Alii mo’u ‘olo maualuga; o lo’u Atua fo’i o le papa lea ou te malu ai.”*

Faataoto manino e le tusitala o le Salamo lea le fatu o le olataga o le tagata. O le gagana o le mautinoa mai i le molimau o mata ma le loto i mea ofoofogia ma galuega lavea’i ua faia e le Atua i le ola. O le pese e lagiina pea ma faamantu i le lalolagi, ua na o ‘aao lava o le Atua tatou te mapu ai i taimi o faigata. O talaatu o faafitauli tuga o le ola e le au iai le malosi o le tagata, ua na

o le Atua e faia vavega I taimi faapena. O le ala lea o le pese a le fai Salamo. O le Atua o lo tatou 'olo maualuga, o le papa lea tatou te malu ai.

Tatalo: Le Atua o le malamalama, o lou faatasi mai matou te iloa ai o 'au folafolaga e pei o se olo i o matou olaga, Amene!

Aso Lulu – Tesema 10: “O a’u nei o le faitoto’a” (*I am the gate*)

Tusi Faitau – Ioane 10:1-10

Matua – ff.7,9 *“Ona toe fetalai atu lea o Iesu ia te i latou, “E moni, e moni, ou te fai atu ia te outou, o a’u nei o le faitoto’a o mamoe...O a’u nei o le faitotoa, afai e ui mai se tasi ia te a’u, e faaolaina ia, e alu atu ma ulufafo, e maua fo’i e ia le mea e ‘ai.”*

O loo ua manino le fetalaiga a Iesu, 'o Ia, o le faitoto’a o mamoe.’ O lona uiga o le galuega e aofia ai le leoleoina o mamoe, tausiana o mamoe, ma le faamoemoe maualuga ia maua lo latou saogalemu. O le faitoto’a e fuafua lona tatalaina i le tulaga o loo iai le mamoe. Fetalai le Alii,”afai e ui mai se tasi ia te a’u, e faaolaina, e alu atu ma ulufafo, e maua fo’i e ia le mea e ai.” E saili le tagata ma le loto mauilalo i ala o le Alii ma mulimulita’i iai, ona matala mai lea o le faitoto’a mo ia. O lea a’oa’oga o loo auamaia ai se malamalama sili mo e faatuatua, ma tagata e le o talitonu i le natura mamalu o le Atua. O Iesu o le ositaulaga alofa. O lana pule mamalu ma le paia, na faamautinoa ai se ola ofoina e faaolaina ma e le mativa i faamanuiaga sili mai le Atua. O se faamafanafanaga sili e tusa ma lana fetalaiga ina ia mulimuli atu ia te ia ma le faatuatua, aua e faamaoni lava, o ia o le leoleo mamoe, o le ki e sao atu ai i le faitotoa o le manumalo.

Tatalo: Le Atua alofa e, faafetai ona e te tausia i matou e pei ona tausia e leoleo mamoe a latou mamoe, Amene!

Aso Tofi – Tesema 11: “Faatuina se lālā amiotonu”

Tusi Faitau – Ieremia 23:3-8 (*Raise up a righteous branch*)

Matua – f.3 : *“Ou te faapotopoto fo’i e totoe o la’u lafu mamoe mai i nuu uma na ou tulia ai i latou, ma ou toe faafo’i mai ia te i latou i o latou lotoa; latou te fanafanau ai ma uluola ai.”*

O loo tautala leni mau i le folafolaga a le Atua e faatuina se lala o le a nofotupu ma le pota e lavea’i Iuta ma Isaraelu. Ma o le a tula’i atu le nei ta’ita’iga fou i le faamasinotonu ma le amiotonu i le atunuu. O le a toe amata le Atua i se tala amiotonu o le aiga o Tavita, o le a nofotupu se leoleo mamoe pota, o le a maua e tagata le malutaga ma le ola i lalo ma fesoota’i atu i le na lala. E le faasa’olotoina e le Atua le amioletonu ma le agasala e pule i ola o tagata, aua o Ia lava le pule aoao. E na te amata se taeao fou o le amiotonu, ina ia ola sa’oloto le tagata ma iloa lona silisili ese.

Tatalo: Le Atua alofa e, ia pupula o matou mata i le uiga o le soifua manuia ua e saunia mo i matou, Amene!

Aso Faraile – Tesema 12: “O a’u nei o le vine moni” (*I am the true vine*)

Tusi Faitau –Ioane 15:1-7

Matua – ff.1, 4: *“O a’u nei o le vine moni, a o lo’u Tamā o le galue vine ia...Ina tumau ia outou ia te a’u, o a’u fo’i ia te outou. Faapei o le la e le mafai ona fua*

pe a na o ia, pe a fai e le mau i le vine; e faapea fo'i outou, pe afai tou te le tumau ia te a'u."

O le a le uiga o le ekalesia, mo i tatou taitoatasi, o le ola tumau i le vine: po o se vaega o na lala e fesootai ma Iesu e pei ona faamatalaina i le fuaitauga o le asō? Afai o Iesu o le vine ma o tatou o lala, e faapefea e lenei mafutaga ona vavaeeseina ai i tatou mai le sosaiete o loo tatou maua ai? O le ata o le vine ma lala e tautala e uiga i le felagolagomai ma le fealolofaa'i, e faamamafaina ai le manaomia o lo tatou sootaga ma Keriso mo le fafagaina faaleagaga ma le tuputupu ae. O lenei talafaatusa e faasino atu i le alofa i tuaoi e pei ona faaalai i tagata uma i fafo atu o lo tatou li'o masani, e pei lava ona mulimuli-ta'ia ai mamoe ma tausia e le leoleo mamoe lelei.

Tatalo: Le Atua e, ia ta'ita'iina i matou e la matou tapua'iga ma le olaga o se Ekalesia, Amene!

Aso Toona'i – Tesema 13: "Faaeaina le loto maulalo" (*Humility exalted*)

Tusi Faitau – 1 Peteru 5:1-6

ff.2a, 5-6 : *"Ia outou leoleo le lafu mamoe a le Atua ua ia te outou...la faapea outou o e talavou ia usiusita'i i toeaina; ma ia oofu outou uma lava i le loto maulalo o le tasi i le tasi, auā, e tete'e atu le Atua i e faamaualuluga, a e foaiina mai le alofa tunoa i e faamaulalo. O le mea lea ia faamaulalo ai outou i lalo o le aao malosi o le Atua, ina ia faamaualugaina outou e ia i ona po e tatau ai."*

I la tatou mau, tatou te faitau ai e uiga i le lotomaulalo o le Atua ia i tatou, ma le lotomaulalo o loo manaomia. O la tatou faitauga i aso nei o lo'o i ai se fe'au fa'apitoa mo le eseesea i totonu o nu'u Kerisiano. O le tusi 1 Peteru, o loo faamatala ai le sootaga i se auala manino maoti. O nisi e iai ni tiute tauave i le lautele o le atunuu, ae o lenei tusi ua faamanino mai ai le matafaioi a tagata uma. E leai se fa'atonuga o atugaluga ma galuega se'i vagana ai le va fealofani. O le mea moni, o le tusi e fa'amafola le fa'atonuga i lalo o le aao malosi o le Atua. O le tumau ma fesootai i lala o le vine o le Atua, tatou te iloa ai la tatou vaega i le tagata, e le o le Atua, ae o le malamalama o le Atua i lo tatou lalolagi.

Tatalo: A'oa'o mai ia maua le ola faamaulalo e iloa ai lou alofa, Amene!

O UIGA VA'AIA O LE ATUA: O LE ATUA UA AFIO MAI

THE CHARACTER OF GOD: THE GOD WHO COMES

3. O le ala (*The way*)

Aso Sā – Tesema 14: "Fouvalega" (*Conspiracy*)

Tusi Faitau – Isaia 8:11-15

Matua – f.12 *"Aua tou te fai atu, o le fouvale, i mea uma e ta'ua o le fouvale e le nei nu'u; aua fo'i tou te fefefe i mea latou te fefefe ai, aua fo'i tou te matata'u..."*

Fouvalega: O se taupulepulega a malo e fa'amalosia ai le tu'u ina atu o se malosiaga e faia ai se palota e foliga mai o lo'o fiafia ai tagata uma ae o loo i ai lava le manatu o le fouvalega. Atonu, o se faamafanafanaga e maua mai ai lea ituaiga lagona e pei ona ta'ua, FOUVALEGA. Peita'i, o lea lagona o loo aga'i i se lalolagi feteena'i, ma le lē talitonu. O nisi taimi, masalo o lea lava taupulepule e faauigaina i se itu faaletonu, ua mamamuina ai se gaoiga o le tau-fa'afefe, e ala i se tupu malosi poo se tasi o loo umia se tulaga faapitoa.

O lea ua faamanatu e le perofeta i tulaga o le faatafunaina e le mafai ona tupu. O se taupulepule, e mafai ona faaleaogaina. Peita'i, o se augani faalaua'i tele, ia latou fefefe i le Atua. Ia latou matatau i le Alii o 'au, aua e paia, e mamalu, e pauū ai fo'i malo. O se faamoemoe e lotolotoi lava le Atua i taimi o faanoanoaga. O le Atua e mata'utia e ao ona faalagolago i ai le Isaraelu. O le Atua e laveaina o e ua sulufa'i atu ia te Ia. EMANUELU! "Ua ia te i tatou le Atua – o le Atua ua afio mai". O lea taunuuga e aumai ai ala o le Atua i lona faatasi mo ona tagata, i le tausia pea o le lototele ma le faatuatua i le Alii, a o i ai i se lalolagi ua puapuagaina ma faatafunaina.

Tatalo: Faafetai ona o oe o le ala, o le upu moni, ma le ola, Amene!

Aso Gafua – Tesema 15: “O le perofeta” (*A prophet*)

Tusi Faitau – Teuteronome 18:14-22

Matua – ff. 14-15 : *“Auā o nuu nei, o le a e fai mou, ua faalogo i latou i e iite i ao o le lagi, ma e fai togafiti faataulaitu; a o oe, e le mafai le Alii lou Atua ona e faia faapea. E faatuina e lou Alii lou Atua mai ia te oe, o so lou au uso, se perofeta mo oe e pei o a'u nei, tou te faalogo ia te ia.”*

O ananafi na tatou mafaufau ai i taupulepulega leaga. O lea fouvalega e aumaia ai le faamafanafanaga eseese. Ma, e mafai ona avea ma folafolaga taufaaseese, e faalavelaveina ai le mea moni. O tagata e fai mai latou te tautala fa'amaoni e fai ma sui o le Atua ae e leai. O mea latou te fai mai ai atonu e moni pe taunuu foi. Peita'i, o lea faailoa mai i le faitauga o lenei aso, o se perofeta e faalogo uma ai tagata. E pei o Paulo ma le 'au aposetolo, o i latou nei o pologa a le Atua Silisili Ese, o ē folafola atu iā te outou le ala o le faaolagata. (Galuega 16:16-18). O valoaga e faatatau i le fai ma perofeta o i latou ia e tautala atu i le upu moni i le alofa (Efeso 4:15).

Tatalo: Le Alii e, fesoasoani mai ina ia avea pea i matou e faailoa lou alofa faamaoni, Amene!

Aso Lua – Tesema 16: “O a'u nei o le ala” (*I am the way*)

Tusi Faitau – Ioane 14:6-10

Matua – f.6-7 : *“Ua fetalai atu Iesu ia te ia, o a'u nei le ala, ma le upu moni, ma le ola; e le alu atu lava se tasi i le Tamā, pe a le ui mai ia te a'u. Ana iloa e outou o a'u, po ua iloa foi e outou lo'u Tamā; e amata nei foi ona iloa o ia e outou; tou te vaai foi ia te ia.”*

O loo tau faamanino mai e Ioane le malamalama e ao ona faasusulu atu mo le 'au faatuatua, ina ia latou faamalolosi ai e faailoa le Atua i le lalolagi. O lenei folafolaga e uiga i se nofoaga ua saunia e tusa ma le tautinoga a Iesu “o a'u nei le ala, ma le upu moni, ma le ola; e le alu atu lava se tasi i le Tamā, pe a le ui mai ia te a'u”. A o se faamalosi ia gauai i le folafolaga, e ala i le faamafanafanaga o le Agaga Paia e ta'ita'i ma faamausali le mafutaga o le tagata ma le Atua e ala ia Iesu. O se sootaga mafanafana pe afai e faalagolago ma faamoemoe i le Agaga Paia, e tusa ma a'oa'oga ua tuuina mai e Iesu Keriso.

Tatalo: Le Alii e, faafetai ina ua tatou savavali faatasi ma lau Afio, Amene!

Aso Lulu – Tesema 17: “E vaai atu o ia i lana fanau”

Tusi Faitau – Isaia 53:9-12 (*He will see his offspring*)

Matua – f.10a *“A ua finagalo le Alii e tu’i momomo, ua ia faatigaina o ia; pe afai na te faia se taulaga mo agasala, ona iloa lea e ia o lana fanau, e faalevalaina ona aso.”*

O ai na mafai ona mafaufauina lona lumana’i? O le tali lea a le perofeta i mea na ia vaai i le ata o le taimi, ma e le mafaamatalaina le matautia. E leai se fa’amoemoe iinei, leai se avanoa, o se toe fa’amalolo minute, na’o le savaliga faifai pea agai i le le tonu, i se maliu fa’asauāina, fa’alumaina, ma se tuugamau nono. I se isi mea, ina ua vaai atu i lea lava mea, ua fesili ai Isaia, o ai e mafai ona tautala i ana tupulaga? Ae ui i lea, tatou te faalagolago i se Atua na te tusia se iuga sili atu. E le maua e le oti le upu mulimuli. Ma e tutusa foi lo tatou faamoemoe. O le mana lava e tasi na galue i le toe fa’atuina mai o Keriso nai le oti, o lo’o galue nei i totonu ia i tatou. Po o le a lava le pogisa o le ata, po o le a lava le mautinoa o valoaga, e mafai e le Atua e afio mai ona tusia se i’uga sili atu.

Tatalo: Le Alii e, faafetai ona ua e tusia se i’uga e sili atu nai lo le mea e mafai ona matou mafaufauina, Amene!

Aso Tofi – Tesema 18: “O le feagaiga e faavavau”

Tusi Faitau – Ezekielu 37:26-28 *(An everlasting covenant)*

Matua – f.26 *“Ou te osia fo’i ma i latou le feagaiga e manuia ai; e fai fo’i ma feagaiga ia te i latou e faavavau; ou te faanofomauina i latou, ma faato’ateleina i latou, ou te tuu fo’i lo’u malumalu ia te i latou e faavavau..”*

O le galuega lenei a le Atua-o ia e tolu ae tasi lava, o loo galue pea i le faatupuina o le lotogatasi mai le eseesea-i lo tatou ala, o le tasi malo mai atunuu vaeluaina o Isaraelu ma luta e faasino atu i se lotogatasi sili atu nai lo lena. E le gata i lea, fai mai Ezekielu e le o se vaifofo le tumau, o le galuega a le Atua o le aumaia lea o le atoatoa tumau, o se filemu tumau i se feagaiga e faavavau e leai se gataaga. O se tala lelei lenei mo i tatou, o se lalolagi ua fevaevaea’i ai atunuu, lea e fevaevaea’i ai tagata i totonu o se atunuu, e fevaevaea’i tagata ta’ito’atasi, o loo tau ai tagata i le natura ma ua vavaeese ai tagata mai le Atua. -o le tala e mafai e le Atua ona aumaia le faamalologa ma le manuia o se tala lelei moni!

Tatalo: Le Alii e, matou te faafetai atu iā te oe ona o lou tino ua momomo ma le toto ua faamaligiina, o lau feagaiga e faavavau lava lea, Amene!

Aso Faraile – Tesema 19: “Faauta, ou te tu i le faitoto’a”

Tusi Faitau – Faaaliga 3:14-22 *(Behold, I stand at the door)*

f.20 *“Faauta, ou te tu atu i le puipui ma tu’itu’i atu; ai se faalogo i lo’u leo, ma tatala mai le puipui, ou te ulufale atu ia te ia, ma talisua ma ia, o ia fo’i ma a’u.”*

O le feau faamalosi mo Laotekaia, a o se faamanatu mo tagata faatuatua o e tapua’i i le Atua i le agaga ma le faamaoni. O le Alii e tu i le faitoto’a ma talia ma le agaga faafetai lana fanau o e sulufa’i atu ma le agaga mafatia ma le iloa o le Atua. O le tu i le faitoto’a, o le galuega a le tagata leoleo ma puipui e tusa ma le matafaioi ua tofia ai. Ua faamanino mai i le feau, ia ola mautinoa le tagata o le Atua o lea ua iai le puipuiga mo ia i aso uma o le ola.

Tatalo: Le Alii e, matou te faatuatua iā te oe faafetai i lou taliaina o i matou, Amene!

Aso Toona'i – Tesema 20: “O a'u nei o le toe tu ma le ola”

Tusi Faitau – Ioane 11:21-27 (*I am the resurrection and life*)

Matua – f.25 : “*Ua fetalai atu Iesu ia te ia, “O a'u nei o le toe tu ma le ola; o le faatuatua mai ia te a'u, e ui lava ina oti, a e ola lava ia.”*

O le ta'utinoga o le alofa e le gata ua uma ona faataunuaina, a ua faaauau pea se ia oo i le gataaga o le ola. O le tino mai o le fetalaiaga lea a le Alii, e le gata e tupu ai pea le mautinoa i le loto o le tagata faatuatua, a ua fai lava o se galuega e toa ai pea le loto e fesaga'i ma faafitauli o le ola i aso uma. Ua faamatala atu e Iesu ia Mareta le eseese o mea manatu iai le tagata ma le finagalo o le Atua I le faagasologa o le ola. Ua tali le Alii i le mea e faia e le Atua i le taimi e finagalo iai, ma le mea e na te finagalo e fai. O lona uiga e le o le gataaga e pei ona mafaufau ai Mareta, a o le taimi lava e finagalo iai le Atua.

Tatalo: Le Alii e, matou te faafetai i lea faaolataga, Amene!

EMANUEL: UA IA I TATOU LE ATUA (1)

(*EMMANUEL: GOD WITH US*)

Aso Sā – Tes. 21: “Tula'i ia, Inā malamalama ia! O le a te'a atu le pogisa”

Tusi Faitau – Isaia 60:1-6 (*Arise, shine! The night is nearly over*)

Matua – ff. 2e-3 : “*E ufitia le lalolagi i le pouliuli, e ufitia fo'i nuu i le pogisa; a e afio a'e le Alii i ou luga, ma le pupula o le Alii e aliali mai lea i ou luga. E o mai nuu ese i lou malamalama, o tupu fo'i e o mai i latou i le pupula o lou alu a'e.”*

O le tapenaga o se malamalama uiga ese o le a oo mai. O le vaega lea o le tusi o Isaia o lo'o faamatala ai le Atua na te faaauau ma tuu le ola fou i se faa-moemoe o le a aga'i ina leai se ola e maua ai. O le valoaga o le Mesia, o se malamalama uiga ese o le a oo mai i le lalolagi. E ui o le Isaraelu olopalaina i Papelonía, a o lea ua maanu le feau o le faaolataga e tauaofia ai le tagata faatalitali ma e nofo faatalatalanoa. O le fatu o le taulogologo, ia tapena ma le agaga maulalo le loto e talia le malamalama o le faaolataga ua oo mai.

E tusa fo'i pe e te alala i se nofoaga e susulu ai pea le la, e iai lava le aso e pogisa ai ma faigata. E fa'apena fo'i lo tatou ola. E iai le taimi e solo lelei ai, e iai fo'i le taimi tatou te fetaia'i ai ma puapuaga ma faigata. E le mafai ona tatou maalofia le pogisa i lenei olaga. Peita'i, ua fa'amanatu mai e le tusi faitau o lenei aso, e manaomia le malamalama e tulei ese ai le pogisa. O le malamalama pito sili lava ona taua, o le Emanuel, ua ia te i tatou le Atua i taimi uma lava, i tiga, puapuaga, pe olioli fo'i ma fiafia. O le malamalama o Keriso, o le malamalama sili lea o le a fa'afeiloa'ia i tatou uma i lenei Kerisimasi.

Tatalo: Le Alii e le Atua, fa'afetai mo le malamalama susulu pea e ala i le soifua o lou alo pele o Iesu Keriso, Amene!

Aso Gafua – Tesema 22: “O ai lea ma lea?” (*Who's who?*)

Tusi Faitau – Mataio 1:1-7

Matua - f.1 “*O le tusi i le gafa o Iesu Keriso, o le atalii o Tavita o le atalii ia o Aperamo.”*

E iai se polokalame a le televise i Peretania fa'apea, “*Who do you think you are?*” “O ai e te manatu, o ai oe?” O lea fesili o loo tau saili ai le talaaga o aiga i aso anamua. E masani ona iai ni fete'enaiga ma ni lavelave o talaaga o

ni aiga. E fa'apea foi i se talaaga o le aiga o Iesu e pei ona aumaia e Mataio. Na amata le tala fiafia a Mataio i le soifua, maluu ma le toetu o Iesu Keriso. Ina ia fetau lelei le gafa o Iesu ma le tala fa'asolopito o Isaraeli. O le matagofie lea o le tala'ina o le gafa o Iesu, ona e le'i taumafai le tusi tala e nana le tupu'aga o Iesu, e o'o lava i tagata agasala, na tupuga mai ia Iesu.

Tatalo: Faafetai ua e taliaina i matou uma i le gafa o Iesu Keriso, Amene!

Aso Lua – Tesema 23: “O le usita'i ma le loto alofa o Iosefa”

Tusi Faitau – Mataio 1:18-25 *(The obedience and kindness of Joseph)*

Matua – f.20, 21 : *“Ua faaali mai ia te ia le agelu a le Alii i le miti, ua faapea mai, Iosefa e, le atalii o Tavita, aua e te fefe ina aumai ia te oe o Maria lau avā; auā o lana to mai le Agaga Paia lea. E fanau mai e ia le tama tane, e te faaigoa fo'i ia te ia o Iesu; auā e faaola e ia lona nuu ai a latou agasala.”*

E mata'utia lenei tala! O Maria, o se taupou, sa fa'amau o ia ma Iosefa, o le a fa'aipoipo i la'ua, ae ua to o ia, ae le o se to a Iosefa! O le mea moni, e tataua ona fa'asala fa'atasi Maria ma Iosefa, ma fetogi i ma'a tusa ai ma le tulafono a Iutaia. Ae fa'auta, fai mai Mataio, “O Iosefa o le tagata amiotonu ia, e le'i loto fo'i o ia e fa'amasiasi ia te ia i luma o tagata. Peita'i, sa ia Iosefa se lagona e fa'ate'a lemu ia Maria. Afai e taunu'u lea manatu sa ia Iosefa, o le a se mea o le a tupu ia Maria? Masalo e tausi to'atasi e Maria Iesu, pe ta'uvalea fo'i Maria pe a fanau ae leai sona to'alua. Ae peita'i, o Iosefa e tumu i le loto alofa, ma e tausi tulafono, ma usita'i i le Atua.

Tatalo: Le Atua alofa e, matou te vivii atu iā te oe ona o lou alofa, ua liligiina ifo mo tagata uma iā Iesu, Amene!

Aso Lulu – Tesema 24: “O le fetu i Sasa'e” *(The star in the East)*

Tusi Faitau – Mataio 2:1-6

Matua – ff.1-2 *“Ua fanau Iesu i Peteleema i Iutaia i ona po o Herota le tupu, faauta, ua oo mai ai makoi mai sasa'e i Ierusalem, ua faapea mai, Po o fea o iai le ua fanau mai o le tupu o tagata Iutaia? Auā ua matou vaaia lona fetu i Sasa'e, ua matou omai ai e ifo atu ia te ia.”*

O le 'au makoi e toatolu ma tupu uma, o lo'o mulimuli atu i le fetu. E sa'ili Iesu ona tu'uina atu lea o meaalofo auro, pulu lipano ma pulu muro. E leai se tala o le Kerisimasi e atoatoa pe a aunoa ma i latou. A e aiseā na tāua tele ai ia Mataio le fefefe o le tupu o Herota ma Ierusalem uma? Atonu o tagata popoto o ni tagata sa'ili'ili i fetu, ma vaavaai atu i fetu mo faamatalaga e uiga i mea o loo tutupu i le lalolagi. E mautinoa lava o i latou o tagata o nuu ese nai lo o Iutaia ma atonu na faamamafaina e Mataio o Iesu o se tupu e le na o Iutaia o le a iloaina ae o isi atunuu uma. O le mea moni, atonu sa ia manatua le faitau lea na tatou faitau i ai i ni nai aso ua mavae i le Isaia: E ufitia oe i kamela e tele, o kamela taanoa o Mitiana ma Efa; e o mai i latou uma mai Seepa. O le a latou aumaia auro ma pulu lipano, ma latou folafola atu le viiga o le Alii. E leitioa popole le tupu o Herota. Na ō mai nei tagata popoto e su'e se tupu e tauva, o se tasi e ono faamata'uina lana pulega. Ioe, o le mea na te le'i talisapaia, ae o le mea na iloa e Mataio, o se tupu lea e iai se eseese. E lē o se pule puupuu faaletino o lē sa mai i lenei lalolagi lona malo ma sa pulea e Herota e pei o le mata'u—ae o se tupu e mo tagata uma ma pule ma le alofa.

Tatalo: Faafetai i lau meaalofo mo le lalolagi uma e ala i le pepe o le Kerisimasi, o Iesu Keriso lea, Amene!

Aso Kerisimasi (*Christmas Day*)

Aso Tofi – Tesema 25: “Ia alaga fiafia i lenei Kerisimasi”

Tusi Faitau – Salamo 98: 1-9 (*Make a joyful noise this christmas*)

Matua – f.4 : *“Ia alalaga i le Alii le lalolagi uma; ia leo tele lava; ma ia alalaga fiafia, ma ia fai pesega.”*

Faamanatu e le faisalamo le sootaga a le Atua ma Isaraelu, o le afio mai o Iesu, o le Keriso, o le Atua na soifua mai o se tagata, ua tatou iloa ai o lenei alofa e sili atu i lo Isaraelu. O tagata uma na faia i le faatusa o le Atua. E oo i le foafoaga, o le fanua o loo patipati o latou lima, o mauga o loo pepese faatasi ma le olioli, o se faatusa matagofie o le ola, o loo lagi fetalai i le olioli.

O le salamo lenei e mafai ona faapea, o le viiga i aso ua mavae, o le salamo o le viiga mo aso nei, aemaise o le faamanatuina o le soifua mai o Iesu, o le Keriso. O loo ua faapea ona faailoa i le lumanai e pei ona faamanatu mai e le faisalamo, o le a faamasinoina e le Atua nuu uma ma le amiotonu. O lea lava Salamo e faamanatu mai ai ia i tatou o loo taofia e le Atua mea uma, taimi ua tuanai, taimi nei, ma le lumanai, e oo lava i le tagata. O lea gaioiga ina ia faasaogalemu ina mea na foafoa i ona aao alofa; i le manuia e faavavau. O lea la, ia tatou usuina se pese fou i le asō ma faia le leo sili ona fiafia e ta’u atu ai i le lalolagi o lo’o i ai le Atua i le taimi nei, ma le lumanai. Manuia le Kerisimasi!

Tatalo: Le Atua alofa e, matou te ofo ma avatu le faafetai i lou alofa ma lou mamalu, e oo i le faavavau, Amene!

Aso Faraile – Tesema 26: “Ofoina o mea silisili” (*Offering treasures*)

Tusi Faitau – Mataio 2: 7-12

Matua – f.10-11: *“Ua latou iloa le fetu, ona matuā tele ai lea o lo latou fiafia. Ua latou ulufale atu i le fale, ua latou iloa ai le tama itiiti ma Maria lona tinā, ona latou faapau ai lea, ma ifo atu ia te ia; ua talai fo’i a latou oloa, ona latou avatu ai lea ia te ia o meaalofo, o le auro, o le pulu lipano, ma le pulu muro.”*

O lea faitauga o le a tatou iloa tonu ai; pe aisea na aumai ai e le au makoi nei meaalofo e agagata toe taugata? A o loo feagai ma lagona o le popole, poo le faaososoina o le mafaufau. O Iesu o se tupu mai le Atua, o le tupu e afio mai e malii ma toetu mai. O le faamoemoga atoa o lea feau, o Iesu o se meaalofo sili mo le lalolagi agasala. O le ata o loo faailoa mai e uiga i le fetu na iloa e le ‘au makoi. O loo aumaia ai se faamanatu taua tele e uiga i ta’ita’iga o le Atua i le lalolagi. O se tala faa-olioli loto ma le fiafia tele i le faataunuaina o le o valoaga o perofeta. Ua faailoa manino ai le Atua e faamaoni i lana fetalaiga i lea tupulaga ma lea tupulaga.

Tatalo: Le Atua alofa, ia matou tapuai atu foi ia te oe ma avatu ia te oe le meaalofo mo i matou lava i lenei Kerisimasi **Amene!**

Aso Toona’i – Tesema 27: “Tagata sulufa’i i nuu ese”

Tusi Faitau- Mataio 2: 13-15 (*Refugees in a strange land*)

Matua f. 13: *“Ua o i latou, faauta, o le agelu a le Alii ua faaali mai ia Iosefa i le miti, ua faapea mai, Tula’i ia, ina ave le tama itiiti ma lona tinā, ma sosola i*

Aikupito ma nonofo ai se ia ou fai atu ia te oe; auā o le a saili Herota i le tama itiiti ina ia fasioi ia te ia."

O uluai masina ma se pepe fou e mafai ona faatupulaia ai le vaivai o le tino, atonu e le mana'o se tina e malaga mamao. O lea tala ua faamalosia ai le uunaia o le ola talitonu i aao laveai o le Atua. Ua faali le agelu ia Iosefa, ina ia sosola vave i Aikupito. O le anoanoai o tagata ua sulufai solo, ua faamalosia e sosola ona o sauaga, ma tulaga ogaoga e tusa ma le poloaiga a Herota. Pe faapefea ona maua se mapu, mai i sauaga?

Tatalo: Le Atua alofa e, ia e a'oa'o mai ina ia matou lototetele i taimi o faaosoosoga ma inosia ai, Amene!

EMANUEL: UA IA I TATOU LE ATUA (2)

(EMMANUEL: GOD WITH US)

Aso Sa - Tesema 28: "Malaga ese ia saogalemu" (Flight to safety)

Tusi Faitau – Mataio 2: 16-18

Matua f. 18: *"Ua lagona le leo i Rama, o le auega, o le fetagisi, ma le tagitu'i tele; ua tagiaue Rasela i lana fanau, e le mafai fo'i ona faanaina o ia, auā o i latou ua lei"*

O le pule a Herota na logologoa lava ona talaaga. O taimi faapea e mafatia ai lagona. E malamalama Iesu i mea e mafai e le olaga ona lafo mai ia i tatou, o le fefe, o le ola le le mautonu, o loo manaomia ai le lototele. Ma i le iloina o lena mea, na te savali faatasi ma i tatou ma e le tuua i tatou. Emanuel! Le Atua ua faatasi ma i tatou. O lenei faitauga na faali ai le agelu a le Alii ia Iosefa i se miti. O lea faatonuga ina ia sola i Aikupito, o ia ma Maria faatasi ma Iesu. O lea malaga ese, ina ia faasaina mai ai le folafolaga e faataunuaina, o le faaolataga mo le lalolagi. E ui lava o se faamoemoe i le fia faasiotia o Iesu, ae ua le mafai ona faataunuaina, ona o fuafuaga o le Atua mata'utia. Sa usitaia lava e Iosefa le faatonuga poo le faaliga na ia iloina, lea sa latou nonofo ai lava i Aikupito, se ia oo lava ina ia maliu Herota. O lenei soloaga o se mataupu taua tele i le tala faasolopito o Iesu le pepe. O lea feagaiga na afua i le alofa tunoa ma le alofa mutimutivale o le Atua, a o ana folafolaga e le mafai ona faalavelave e se tasi. O lea faamoemoe ua soo gafa ai le Atua i le lalolagi agasala ina ia faatuatua le tagata na ia faia i lona lava faatusa (image of God). O lona lava atoatoa ua faamanatu ai i le tagata o loo avanoa pea lona alofa tunoa mo tagata uma.

Tatalo: Fa'afetai ua e fa'asaina i matou i lou lava alofa tunoa, Amene!

Aso Gafua - Tesema 29: "Ese le auala na fai ai" (A Different return)

Tusi Faitau – Mataio 2: 19-25

Matua ff. 22e-23: *"...Ae peita'i ua faailoa ia te ia i le miti, ona alu ai lea o ia i le nu'u o Kalilaia. Ua o'o fo'i i le tasi aai e igoa ia Nasareta ua nofo ai."*

E le uma upu a Mataio i le fa'amatalaina o fa'afitauli sa feagai ma le fanau mai o le Mesia o Iesu Keriso. Sa mulimulita'i pea le matamata ita ma le tau lamalama o le lalolagi i le pepe o le fa'aolataga o le a fanau mai. Peita'i, o le silisili ese o le Atua, e le gafatia e le malosi a le tagata. O le mea e finagalo iai le Atua e na te tapena fo'i le auala e fa'ataunu'uina ai. Ua maliu Herota ae

tumau pea le taulamalama i le pepe o le fa'aolataga. Taunu'u folafolaga ina ua suia e le Atua auala i lona mana silisiliese. O le manatu o le tagata, e le'o le finagalo lea o le Atua. O o tatou ala, e le'o ona ala fo'i ia. E silasila pea le Atua ma le alofa i o tatou fa'afitauli.

Tatalo: Le Alii e, ia 'aua ne'i galo 'ia te a'u o lo'o e faatasi mai 'ia te a'u i taimi uma, Amene!

Aso Lua - Tesema 30: "Ua ia i tatou le Atua- E fa'aapefea ona tatou iloa?"

Tusi Faitau – Isaia 63: 7-9 (*God with us - how do we know?*)

f. 9 *"O latou puapuga uma na le fai ai o ia mo latou fili; na fa'aolaina i latou e le agelu mai ona luma; na ia fa'atauina i latou i lona alofa ma lona agalelei."*

E faapefea ona tatou iloa o le Atua? I se lalolagi e le talitonuina i taimi uma ia fesootaiga ma savali, o se fesili moni i aso nei. O a tatou manatunatuga ua faamatalaina ai le fetalai mai o le Atua i miti e oo lava i le tafe o se vaitafe. Mo Isaia, e iloagofie le Atua o le na te faafogogaina mafatiaga o tagata—o se puapuga e masani ona oo i ai pe a tatou lavea i mea e le'i faatalitalia, i vevesi e le'i tupu muamua, o taimi o le toesea ma le faavauvau e le'i mafaufauina. O lona alofa e tumau (f.7) O le mea moni sa faatasi le Atua ma i tatou i ia tulaga e masani ona oo mai mulimuli ane. O le taimi e toe tepa ai i tua ma manatunatu e ese mo tagata uma. A o matou manatunatu i le malamalama o la matou faitauga, sa mafai ona iloa e le au matutua o le fale talimalo le galuega a le Atua. le Atua faatasi ma i tatou. Mulimuli ane, e mafai ona tatou malamalama ma faailoa atu le moni o lona faatasi mai e pei ona maua i o tatou aafiaga moni i le olaga. O le alofa ma le lagolago, ma uo e uiga i mea uma. O le faamanatui na o le soifua mai o Keriso- le Atua na avea ma se tasi e pei o i tatou - o se taimi lelei lea e manatua ai i latou sa avea ma afioaga o le Atua mo i tatou.

Tatalo: Le Atua e, ia e foa'i mai ia i matou le alofa tunoa, Amene!

Aso Lulu - Tesema 31: "O le agaga fa'afetai, o le tali atu o le loto"

Tusi Faitau – Salamo 148:1-14 (*Thankfulness, the heart's reply*)

Matua ff. 12-13a *"O taulele'a atoa ma teine, o toeaina atoa ma tama. Ia latou vivi'i atu i le suafa o le Alii..."*

O le pese a le fai Salamo fa'aali ai le agaga fa'afetai ma le vivi'i o le foafoaga uma i le Atua. O le tagata o le pale Ali'i o le foafoaga, e foliga mai o lo'o palasi iai le fa'amamafa o lea pese. Fai mai upu o le fai Salamo, o taulele'a atoa ma teine o toeaina atoa ma tama Ia vivi'i atu i le suafa o le Ali'i. E mafua ona vivii ona o galuega lelei ua pa'i i le loto. O le gagana lea a le loto ua tumu i le fiafia ma le fa'amalieina. O le feau a le fai Salamo, o se mea e tatau ma onomea i tagata ola uma ona tali atu i le Atua i le agaga fa'afetai e afua mai i le ta'ele o le loto. O lea faamanatu o loo auamaia ai se matagofie o fuafuaga tutusa o le foafoaga atoa. O le ola vivii atu ma le alofa i mea na foafoaina e le Atua.

Tatalo: Fa'afetai mo meaalofo ua maua mai i lau Afio i lea tausaga o le a tuana'i atu, Amene!



TAUTUA PRINTING PRESS

1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkasonline.org>